

# Wedau Mark



The Gospel of Mark in the Wedau Language of Papua New Guinea

**Wedau Mark**  
**The Gospel of Mark in the Wedau Language of Papua**  
**New Guinea**  
**Buk Mak long tokples Wedau long Niugini**

copyright © 2010 Wycliffe Bible Translators, Inc.

Language: Wedau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-30

---

PDF generated using Haiola and XeLaTeX on 18 Apr 2025 from source files dated 31 Aug 2023

aa19f3e3-98fb-51fa-9c53-3906edc75f11

Contents

Mark . . . . .	1
Apasol . . . . .	48

# Mark

## Riwana Aiaina, Mark i girugirumia

### Pariverena

Wei lamna God Natuna Iesu Keriso Messiah Riwana Aiaina karena. Rava wei bukana i girumi, wavana eġa ita riweta. Wate tauviararamana e ririwa da Mark i girumi. Mark, lamna eġa Apasol, wate tauviararamana maġamaġau i notai da tauna, Peter maiteni au Rome i mae. Ma Peter, Iesu ana kua ma ana viararamana maġamaġau Mark i riwei. Anina ma Mark wei riwana i girumi da tauvitumaġana au Rome ita aramanei, Iesu aiwai i kauei.

Riwa karena i girugirumia e vivieġeta da wei lamna Iesu Keriso Messiah God Natuna Riwana Aiaina. Aubaina, wei au bukana ta inainai Iesu awarina rewapana da kua maġamaġau ita kauei. Wei kauai tana inainai maranai: e viviararamana; ma arua-apoapoei e viviaġaġana-opunei; ma rava doridoriai e vivilawani; ma ġo'apoapoe e notanota tawanei. Mark, Iesu ana nola ma ana kua i girumi ma eġa ana viararamana ita giruma-guratei. Mark i vieġeta menanare Iesu au korosi i 'raġe da rava anatapui ita vilawanai ma God menanare, Iesu iragālei i vovaimairini.

*John Taubabataito, Iesu ana aninae i vovokaukauei  
(Matthew 3:1-12; Luke 3:1-18; John 1:19-28)*

1 Wei lamna Iesu Keriso Messiah God natuna Riwana Aiaina karena.

<sup>2</sup> Wariaġa peroveta Isaiah i girugirumia nanare:

*“Ona rautaniġana! Au peroveta au naom ana paritawanei  
da am aninae ina vovokaukauei.” (Malakai 3:1)*

<sup>3</sup> ☆ *“Peroveta au mutulua e viviġoreġore:*

*“Taumi BADA ana aninae ona vovokaukauei,  
ana eta ona vovai-jijimani!” (Isaiah 40:3)*

4 Ma taupariverena John i nei au mutulua da rava i bababataitoi ma God riwana i jimejime i pa, “Ami ġo'apoapoe ona voterei, ma ona mae-taviremi God awarina ma ami ġo'apoapoe ina nota-tawanei ma ana babataitoimi.”

<sup>5</sup> Ma rava anatapui Judea au paratana ma au Jerusalem i nae da John ita rautaniġanei. Maranai ai ġo'apoapoe i rupeni, John, tau i babataitoi au waira Jordan.

<sup>6</sup> Ma John, *kamel* aparana metametanana i oteoteni ma ana tairoro ġamoġamo opina. Ana lam kapau ma manigewa.

7 Ma tauna, rava i ririwei i pa, “Rava au muriu e nenei i ġetelara, eġa me tau. Eġa tagotagogiu da ana ae uma ġuravana ana rupeni.

8 Tau wairei a babataitoimi, wate tauna, Arua Vivivireinei ina babataitoimi.”

*John, Iesu i babataitoi*

*(Matthew 3:13-17; Luke 3:21-22)*

9 Lamna maranaina Iesu, Nasaret, Galili i netawanei ma i nei ma John au waira Jordan, tauna i babataitoi.

10 Ma maranai Iesu wairei i ġeġetai, i'nana da mara i wanatawanei ma Arua Vivivireina me gabubu i ġairai.

11 ✨ Ma God ponana marei i opu ma i riwa i pa, “Tam, tau natu au nuavaina ma u vinuaininiu.”

*Satan, Iesu i raelari*

*(Matthew 4:1-11; Luke 4:1-13)*

12 Ma lamna au murina God Aruana Vivivireina Iesu i paritawanana-opunei au mutulua.

13 Ma au pom 40 au mutulua i mae. Ma Satan, tauna i raelari. Ġamoġamo ġaiġaiawai nai au dobuna i mamae ma God ana anela marei tauna i paini.

*Iesu, lebalebagaġai ruaġa ma ruaġa i raukwatuei*

*(Matthew 4:12-22)*

14 Ma gulau Herod, John i pani. Ma muriai Iesu i nae au Galili da rava awarii God Riwana Aiaina i jimei.

15 Ma Iesu i ririwa i pa, “God ana mara vinevinena i ġetai. God ana vibadana vouna rava aubai, lamna i turiai. Ami ġo'apoapoena ona rupeni ma ona mae-tavirem ma Riwana Aiaina ona vitumaġane!”

16 Mara tagogi Iesu Galili topana au gerana i bababara nae. Ma lebalebagaġai ruaġa i 'nanai, Simon\* ma ana tevera Andrew au topa i rarauagida.

17 Iesu i riwei i pa, “Ona nei ma ona votaġotaġoiu. Ma me marina iana o tutuarui; nanare, ana viararamanimi da rava ona tuarui da ina vitumaġaneu!”

18 Ma maratogogi ai agida i voterei ma Iesu i votaġotaġoi.

19 Ma tau i au gera i verau-nae. Iesu, Zebedi natunatuna i 'nanai, James ma John ai au waga ai agida wanawanarorona i vokaukauei.

20 Ma maratogogi tau i ġorei, “Taumi ona nei ma ona votaġotaġoiu!” Ma tau amai Zebedi† ana taunola maiteni i voterei ma Iesu i votaġotaġoi.

✨ **1:11:** Gen 22:2; Isa 42:1; Mrk 9:7      \* **1:16:** Wavana ġelauna Peter      † **1:20:** Eng. Zebedi.

*Iesu, arua-apoapoena rava awarina i viaḡaḡana-opunei  
(Luke 4:31-37)*

21 Iesu ana Tauvotaḡotaḡo maiteni i nae au Capeniam.‡ Ma au Sabat, Iesu i rui au pari numana ma God Riwana Aiaina, viararamanana i vikarei.

22 Tauna ana rewapanana i viararamana eḡa me mai Jew ai tarawatu babadai § nanare. Ma taurautaniḡana ana viararamana i baiei.

23 Maranai Iesu pari au numana i viviararamana ma oroto arua-apoapoena orana i ruiruinia i garara

24 i pa, “Iesu Nasaretei, aiwai e ḡoeḡoei awariai. Tam weka u nei da ma viapoapoeniai bo? Tau a aramanei tam aiai. Tam Vivivirem Godei!”

25 Ma Iesu riwa bagibaginei i riwei i pa, “Ma genuana! Nai orotona ma opu-tawaneii!”

26 Ma arua-apoapoena orotona i viaikwajiei ma ponana i rata, i garara ma i opu-tawanei.

27 Ma rava anatapui i bana-kauei ma tau i ava i vitarapiri, “Wei aiwai? Wei viararamana vouna ma ana rewapana maiteni! Wei ravana awarina rewapana e mamae da arua-apoapoena i riwei ma tauna i vovoteletelei!”

28 Iesu nolana, maratagogi i tua Galili au anatapuna.

*Iesu, rava maḡamaḡau i vilawani  
(Matthew 8:14-17; Luke 4:38-41)*

29 Nai marana pari numana i opu-tawanei ma ana tauvotaḡotaḡo maiteni i nae Simon ma Andrew ai au numa. James ma John maiteni i nae.

30 Simon poi ana wavinena ini ḡuḡurana ana au animatave i matamatave ma maranai Iesu i ḡeta ma numa ravai, tauna i pariverei.

31 Tauna i nae wavine awarina, nimana i vojijini ma i voagui da i vomairi. Lamna maranaina, ini ḡuḡurana i voterei ma wavinena, tau i paini.

32 Ma au bigai madeḡa i neulai au murina, rava, ai rava doridoriai ma aiavoi arua-apoapoei au orai maemae, i neiai Iesu awarina.\*

33 Ma rava anatapui nai au melagaina i vitagogiei numa au metaetana.

‡ 1:21: Eng. *Capernaum*. § 1:22: Wariaḡa BADA, ana Tarawatu Moses i verei

mai Israel aubai. \* 1:32: *Madega ina neulai au murina* anona lauvitau ana mara damona. Mai Jew ai lauvitau ana mara au Friday madeḡa e neneulai au murina e vivikarei da Saturday madeḡa e neneulai au murina e vorovorovei.

<sup>34</sup> Ma Iesu, maḡamaḡau ai doria nununai i vilawani ma arua-apoapoe maḡamaḡau rava awari i viaḡaḡana-opunei. Ma arua-apoapoena i aramanei da tauna anina God natuna ma lamna aubaina tau i viḡaei da i genuana.†

*Iesu au Galili i raugugula nae*  
(*Luke 4:42-44*)

<sup>35</sup> Ubaubanai boiboḡi, Iesu i vomairi ma numa i opu-tawanei ma i nae gabu au genugenuanana. Ma kampa, God awarina i raupari.

<sup>36</sup> Muri ai, Simon ana rava maiteni i nae da i baiei.

<sup>37</sup> Ma maranai Iesu i nelaḡai, ma i riwei i pa, “Rava anatapui e baibaieim.”

<sup>38</sup> Iesu i paribelei i pa, “Tana nae taon ḡelau i au ḡereḡere, ma kampa maiteni God Riwana Aiaina ana raugugulei. Tau wei lamna aubaina a nei.”

<sup>39</sup> Ma Galili au anatapuna i naeni ma pari au numai i raraugugula ma arua-apoapoei i viopuni.

*Iesu, oroto opi doriana i vilawani*  
(*Matthew 8:1-4; Luke 5:12-16*)

<sup>40</sup> Anina ma rava awarina opi doriana, i nei Iesu awarina ma au naona i peu ma i raudune ma agu i vibaḡei i pa, “Mepa da ma ḡoei, anina da ma viaiainiu.‡”

<sup>41</sup> Ma Iesu nuabola orana i oai ma urana i viloloi da i vodadani ma i riwa i pa, “Anina a ḡoeḡoei, ma aii!”

<sup>42</sup> Ma maratogogi opi-doriana, oroto i voterei ma tauna i aii me.

<sup>43</sup> Anina ma Iesu i riwana-guratei i pa,

<sup>44</sup> “Tam ma nae! Aiwai i tuputupua awarim, eḡa rava ma vieḡei! Ma jijimanina ma nae pirisi pulo tau apuna awarina ma vietataiana-melem ma viaiaina pulona Moses i ririweia ma kauei da ina vimataira tau awari! Pirisi pulo tauapuina ana vianina ina verei da tam u lawana.”

<sup>45</sup> Wate orotona i nae ma aiwai awarina i tuputupua lamna melagai au anatapuna i babaniana-naiei. Ma lamna aubaina Iesu melagai anatapui i vorei ma mepa eḡa rava ita mamaelana kampa i nae. Wate rava mepa maemaiei i nei Iesu awarina.

† **1:34:** Iesu i aramanei, mepa da ita kauei da arua-apoapoei ita riwa da tauna Keriso; lamna rava tauna ita egari da sorodia ita vibadei ma ta viḡavia, me tau i vivinua-notenotei nanare. Jhn 6:15 ma inanai. ‡ **1:40:** Mai Jew ai Tarawatu e ririwa da rava lepeleperai, tau mirimirai me dobu ḡela ravai - *Jentail*. Mai Jew amapo nai ravai eḡa ina vodadani. Rava mirimirai eḡa maiteni ina vitaparoro bo au melagai ina mae. Lamna aubaina mepa da rava mirimirana i lawana, tauna ina ai-me, God tauna ina vaimelai ma rava maiteni ina mae ma ina taparoro.

## 2

*Iesu, oroto gwaḡagwaḡana i vilawani*  
(*Matthew 9:1-8; Luke 5:17-26*)

<sup>1</sup> Iesu ana tauvotaḡotaḡo maiteni i wanavira-melei au Capeniam. Ma au pom ruaḡa au murina, rava nolana i nonori da tauna i nememei au melagai.

<sup>2</sup> Ma rava maḡamaḡai i vitagogiei au numa. Patara i rata guratana da numa i oai ma metaeta maiteni i mae-potai. Iesu, God riwana i raraugugulei.

<sup>3</sup> Nelara ruaḡa ma ruaḡa, oroto gwaḡagwaḡana rasirasiei i avarai da i neiai Iesu awarina.

<sup>4</sup> Rava i maḡa guratana ma eḡa tagotagogina da ita neiai Iesu awarina, lamna aubaina da tetelei i amḡaena da au poewa ma gavogavo i bauni ma kampa gwaḡagwaḡana ana rasirasina i tere-ḡairei Iesu au naona.

<sup>5</sup> Ma Iesu, nai ravai i 'nanai da ai vitumaḡana i rata, lamna aubaina gwaḡagwaḡana i riwei i pa, "Natu, am ḡo'apoapoei, a nota-tawanei."

<sup>6</sup> Anina mai Jew ai tarawatu babadai ḡelau kampa i kiakiala, au orai i vinua-notanota i pa,

<sup>7</sup> "God ainelana ḡo'apoapoei e notanota tawanei. Aiwai aubaina wei ravana nanare e bababani? Tauna, God e vivijiboḡi ma e ririwa da tauna, God nanare."

<sup>8</sup> Maratagogi, Iesu Aruanei ai nota i vaia ma i riwei i pa, "Aiwai aubaina wei kauai o vivinua-notenotei?"

<sup>9</sup> Metauna i telatela: ḡwaḡagwaḡana ata riwei, 'Am ḡo'apoapoe a nota-tawanei.' Bo ata riwei, 'Ma vomairi, am animatave ma vaia ma ma babara?'

<sup>10</sup> A ḡoei da taumi ona aramanei da Rava Natuna au dobu ana rewapana e mamae da rava ai ḡo'apoapoe ina nota-tawanei ma ina vilawani." Ma gwaḡagwaḡana i riwei i pa

<sup>11</sup> "A riwem, ma vomairi, am animatave ma vaia ma ma nae au numa!"

<sup>12</sup> Orotona i vomairi ma maratagogi aravi i vaia ma i babara nae. Ma patara i raraubiga, i bana-kauei ma God i voepaepai ma i ririwa, "Tauai eḡa melanai kua wenanare ata inanai!"

*Iesu, Levi i kwatuei*  
(*Matthew 9:9-13; Luke 5:27-32*)

<sup>13</sup> Iesu, Capeniam i voterei ma Galili topana au gerana i bababara ana tauvotaḡotaḡo maiteni. Ma patara i nei awarina ma tauna God riwana viararamanana i vikarei.

<sup>14</sup> Ma i verau-nae aburuna ma Apius\* natuna Levi i 'nanai, ana bagibagi au gabuna i kiakiala ma *tax* i tamitami Rome

\* 2:14: Eng. *Alphaeus*.



gabemanina aubaina. Iesu i riwei i pa, “Ma votaḡotaḡoiu!” Levi i vomairi ma i votaḡotaḡoi.

15 *Tax* tautami ma ḡo’apoapoei ravai maḡamaḡau, Iesu ma ana tauvotaḡotaḡo i votaḡotaḡoi. Ma anatapui, Levi ana au numa i kiala gogona ma i amam.†

16 Tarawatu Babadai ḡelau lamna Pharisi, ma tau i ’nanai da Iesu *tax* tautami ma ḡo’apoapoe ravai maiteni i amam. Anina ma Iesu ana tauvotaḡotaḡo i riwei i pa, “Aiwai aubaina Iesu *tax* tautami ma ḡo’apoapoei ravai maiteni e amam?”

17 Ma maranai Iesu wei riwana i nononori ma tau i riwei i pa, “Rava lawalawai, doketa eḡa ita ḡoeḡoei ma rava doridoriai, doketa e ḡoeḡoei. Tau a nei ḡo’apoapoei ravai aubai ma eḡa rava jijimani aubai.”

### *Uji vitaraviravirana*

(*Matthew 9:14-17; Luke 5:33-39*)

18 Mara tagogi, John Taubabataito ma Pharisi ai tauvotaḡotaḡo i ujiuji. Ma rava ḡelau i nei Iesu awarina ma i vitaravirevirei, “Aiwai aubaina John Taubabataito ma Pharisi ai tauvotaḡotaḡo e ujiuji, wate tam am tauvotaḡotaḡo eḡa ita ujiuji?”

19 Iesu i paribelei i pa, “Taumi o notanotai da tau aiavo i raukwatuei tavine ana au torela, ina mae lota bo? Eḡateni kau! Maranai tavitavine vou orotona, tau maiteni e mamae, tau eḡa ina uji.

20 Wate mara ina ḡeta maranai tavitavine vou orotona ina vaitawanei ma lamna maranaina ana rava ina uji.”

21 Ma riwa e mamae, “*Tau kaua vouna a neiai eḡa me taumi ami kaua wadubona nanare*. Eḡa aiai ravana, gara vounei gara au wadubona ina popo-ratui da gavogavo ina vopotai. Mepa da nanare lamna, gara vouna gara wadubona ina roroi ma gavogavo ina rata.

22 Ma nanare, eḡa aiai *wine* vouna ina vaini da *wine* aniterenana wadubona ḡamoḡamo opinei au orana ina iwaḡi. Mepa da ina kauēi, lamna *wine* vouna ina dodo ma *wine* aniterenana wadubona ina viaroroi ma *wine* ma aniterenana ina wanabauni‡. Wate *wine* vouna, anina da *wine* aniterenana vouna au orana ina iwaḡi.”

### *Iesu ana riwa Sabat aubaina*

(*Matthew 12:1-8; Luke 6:1-5*)

† **2:15:** Moses, BADA ana Tarawatu i girumi ma mai Pharisi wei Tarawatuna i votaḡotaḡo-kauēi. Ma tau kaua waduboi amamai ḡariei maiteni i vovoteletelei ma i riwa da aiavo Tarawatu eḡa ita vovoteletelei lamna tau rava apoapoei, ḡo’apoapoe tau kauēi. ‡ **2:22:** Wine e tuputupua ma pūropurona wine ana aniterenana ina viaisikasikai

<sup>23</sup> Mara tagogi au Sabat, Iesu ana tauvotaḡotaḡo maiteni, *witi* wapuna au orana i nena. Ma ana tauvotaḡotaḡo *witi rovei* i vaini ma i amam.

<sup>24</sup> Pharisi ḡelau i 'nanai wei kauana i kaukauei ma tau i Iesu i riwei, "Ma inanai, ata Tarawatu e mamae da Sabat, lamna lauvitau ana mara. Aiwai aubaina tau i e vovobagibagi?"

<sup>25</sup> Iesu i paribelei i pa, "Me peroveta i girugirimia nanare. David ana tauvotaḡotaḡo maiteni am-iraḡe ma aiwai i kau i? Taumi o iavi ma aiwai aubaina anona, eḡa ota vinua-notenotei?"

<sup>26</sup> \*Pirisi ḡeḡetelarana Abiathar ana au mara, David, God ana au numa i rui ma palawa vovivirana i vaia ma ḡelau ana tauvotaḡotaḡo maiteni i verei da i ani. Moses ana Tarawatu e mamae da pirisi ava palawana e aniani."

<sup>27</sup> Ma Iesu ana riwa au damona i riwa i pa, "God, Sabat i kau i da rava voaguna aubaina ma eḡa rava ita kau i Sabat voaguna aubaina.

<sup>28</sup> Ona vinuanotenotei, tau Rava Natuna, lamna aubaina tau anina Sabat badana."

### 3

*Iesu, Orotu urana irairaḡena i vilawani*  
(*Matthew 12:9-14; Luke 6:6-11*)

<sup>1</sup> Mara ḡelauna au Sabat, Iesu i naeme au pari numana ma oroto urana irairaḡena i 'nanai kampa i kiakiala.

<sup>2</sup> Ma Pharisi ḡelau i ḡoei da aiwaiei Iesu ita viwavui. Lamna aubaina i 'nana-taḡotaḡoi da oroto ita vilawani bo eḡa au Sabat.

<sup>3</sup> Ma Iesu, orotona i riwei, "Ma nei, au naoi ma mairi!"

<sup>4</sup> Ma Iesu, ravai i vitara-virevirei i pa, "Sabat au marana, metauna i aii: Aiaina tana kau i bo apoapoena? Tana vilawana bo tana viraḡena? Tarawatu aiwai i riwei?" Ma anatapui i genuana.

<sup>5</sup> Iesu ana amlogaiḡaina i 'nana viravira ma i 'nanai da tau i orai i bado ma nuanuana i bola-kau i. Ma orotona i riwei i pa, "Uram ma vilolo!" Ma i vilolo i ma i lawana.

<sup>6</sup> Ma Pharisi maratagogi i opu ma i nae Herod ana rava awarii\* ma ai oga i tarai da Iesu mena ita viraḡenanei.

*Iesu, Patara awari i babani*

<sup>7-8</sup> Iesu ana tauvotaḡotaḡo maiteni, tau i netawanei ma i nae au gera da ita vilauvitau; ma mai Galili patara ḡaeḡaena i votaḡotaḡo. Rava maḡamaḡau, Iesu aiwai i kaukaueia nolana i nonori ma mai Galili ma Judea, Jerusalem taon, Idumea ma

\* **2:26:** 1Sa 21:1-6      \* **3:6:** *Herod* ana rava anona lamna mai Jew ai boru, tau i aiavo i Rome gabemanina i vovoagui. Tau i ai bada wavalatona Herod Antipas. Mai Jew maḡamaḡau ma mai Pharisi maiteni, i notai da Herod ana rava tau i tauvibenabenam ai rava au oiena awarii.

taon ḡelau waira Jordan taon au babagelauna, Taia taon ma Sidon taon,† tau i anatapui i nei Iesu awarina.

9-10 ✨Iesu, rava maḡamaḡau i vilawani. Ma lamna aubaina doridoriai maḡamaḡau i viviamdudu ma i ḡoei da tauna ita vodadani. Lamna aubaina ana tauvotaḡotaḡo i riwei da waga i vokaukauei.

11 Maranai, arua-apoapoei rava au orai maemaei, Iesu i 'nanai ma au naona i peu ma i garara, "Tam God Natuna!"

12 Ma Iesu tau i viḡaei da avena ita vieḡa da tauna aiai.

*Iesu ana Apasol 12 i vinei*

*(Matthew 10:1-4; Luke 6:12-16)*

13 Anina ma Iesu i ḡae au ola ma ana ḡoanei nanare, rava i kwatuei da awarina i ḡei.

14 Tauna, nelara 12 i vinei da maiteni ita mae ma muriai ita paritawanei da ita raugugula. Ma i ḡorei *Apasol*.

15 Ma i vovai-virewapani da arua-apoapoei rava au orai ina viopuni.

16 Tau i vinevinei 12 ai wava wenanare,

Simon i ḡoreḡoreia Peter‡

17 ma Zebedi§ natuna James ma ana tevera John i ḡorei Boaneges, anona waiparara natunatuna,

18 Andrew,

Philip,

Batolomeo,\*

Matthew,

Thomas,

James, tauna Apius† natuna,

Thadeus,‡

Simon, tauna Ununurana,§

19 ma Judas Iskariotei; \* tauna, Iesu tauvibenabenameina.

*Rava i riwa da arua-apoapoei Iesu e vivibadei.*

*(Matthew 12:22-32; Luke 11:14-23; 12:10)*

20 Ma Iesu ana tauvotaḡotaḡo maiteni i rui au numa. Ma patara i rieiai da tau i eḡa tagotagogina da ita am.

21 Ma Iesu ana numa ravai nolana i nonori ma i riwa i pa, "Tauna i bua." Lamna aubaina i nei da ina taravaini.

22 Tarawatu babadai ḡelau Jerusalemei i nei ma i riwa i pa, "Arua-apoapoei, ai bada Bielsibul,† Iesu au orana i rui ma

† 3:7-8: Eng. Tyre & Sidon. Wei ravana eḡa mai Jew. ✨ 3:9-10: Mrk 4:1 ‡ 3:16:

Anona *Gaima*. § 3:17: Eng. Zebedi. \* 3:18: Eng. Batolomeo. † 3:18: Eng.

*Alphaeus*. ‡ 3:18: Wavana ḡelauna Judas - Luk 6:16 § 3:18: Anona lamna tau i

mai Jew ma tau i Rome e vivigaviei. \* 3:19: Iskariot, lamna Judas ana melagai

wavana da auna lamna Iskariotei. † 3:22: Eng. Beelzebub. Anona lamna,

*nabugara ai bada*.

lamnei arua-apoapoei e viviopuni.”

<sup>23</sup> Lamna aubaina Iesu, wei Babadai i ġorei ma awanainei i pa, “Satan amapo Satan eġa ina viopuni.

<sup>24</sup> Mepa da dobu ravai ina viġavia vivira, lamna dobuna ita mae ava.

<sup>25</sup> Ma nanare dam ina viġavia vivira, nai damna ita mae ava.

<sup>26</sup> Ma Satan ita vomairi ma ita viġaviana-melei, amapo ita mae ava.

<sup>27</sup> Taudanene amapo eġa rava virewapanana ana au numa ina danene, eġa da au naona ravana ġuravei ina raġini ma muriai ina danene.

<sup>28</sup> Riwa kaua a ririwemi da God ami ġo’apoapoei ma ami vijiboġa anatapui ina nota-tawanei.

<sup>29</sup> Wate aiai da Arua Vivivireina e vivijiboġi, God, nai ravana ana ġo’apoapoei eġa melanai ina nota-tawanei ma ana ġo’apoapoei ina mae-nonoa.”

<sup>30</sup> Iesu wenanare i babani, aubaina rava ġelau e ririwa, “Iesu au orana arua-apoapoei e mamae.”‡

*Iesu ana dam oina*

*(Matthew 12:46-50; Luke 8:19-21)*

<sup>31</sup> Iesu alona ma varevareina i nei ma au doa i maimairi ma riwa i paritawanei Iesu awarina da ita nei.

<sup>32</sup> Ma patara Iesu i kiala kwaviviroi, ma taupariverena i riwei i pa, “Alom ma novunovum ma varevareim au doa ma e ġoġoem.”

<sup>33</sup> Iesu i paribelei i pa, “Aiai alou ma aiavoi varevareiu?”

<sup>34</sup> Anina ma tau i kiakiala i ’nanai ma i riwa i pa, “Ona inana! Wei tau alou ma varevareiu.

<sup>35</sup> Aiai God ana ġoana e kaukauei, tauna alou ma novu ma vareiu.”

## 4

*Doa tapuna ma tapuna ai awanaina*

*(Matthew 13:1-9; Luke 8:4-8)*

<sup>1</sup> Iesu, giu i raukarena-melei Galili topana au adana. Ma patara i riei da ita rautaniġanei. Ma patara i rata, da tauna au waga i geru ma i kiala ma waga i dudui da i virauopu au topei ma patara au gera i mae.

<sup>2</sup> Ma kaua maġamaġau awanainei i giu ma i viararamana i pa,

<sup>3</sup> “Ona rautaniġana! Taupaewa, ana wapu i vokaukauei ma pei i ravi awawari.

<sup>4</sup> Pei ġelau i eta i peu. Ma kiu i ġeta ma i ani.

<sup>5</sup> Ma pei ġelau doa au ġaiġaimana i peu, doa au avavana. Ma lamna aubaina maratagogi i gogo.

‡ **3:30:** Tarawatu tau girumi i parivaijijigei aubaina tau i ririwa da Arua Vivivireina ana nola lamna baravu da parauma. BADA eġa melanai ai ġo’apoapoei ina nota-tawanei.

6 Wate maranai madeḡa i rarani, maratagogi i poi, anona warami eḡa ita ḡaira guratana doa au orana.

7 Pei ḡelau, modu donadonai au poui i peu. Ma modu donadonai i gogo ma pei i gogogo i lavani, ma eḡa ita ua.

8 Ma pei ḡelau doa au aiaina i peu ma i gogo kua ma i ua, ḡelau 30, ḡelau 60 ma ḡelau 100.”

9 Ma Iesu i riwa i pa, “Mepa da taniḡami e mamae, riwa ona nonori!”

*Aiwai aubaina Iesu awanainei i babani  
(Matthew 13:10-17; Luke 8:9-10)*

10 Maranai Iesu ainelana i mamae ma ana tauvotaḡotaḡo 12 ma taurautaniḡana ḡelau i ḡeta ma Iesu i vibaḡai da awanaina anona ita riwei.

11 Ma Iesu i paribelei i pa, “God ana vigulau ana kua mamae govaḡana; taumi i vieḡemi ma rava au tano maemaie, tau aiwai anatapui awanainei e paripari-verei.

12 Lamna ana kauei da wariḡa peroveta aiwai i girugirumia ina tupua:

‘Tau i ina inana ma eḡa ita inainanai.

Tau e rarautaniḡana ma eḡa ita araramanei;

ma lamna aubaina tau eḡa ita nenei God awarina

da ai ḡo’apoapoe ita notatawanei.” *(Isaiah 6:9-10)*

*Doa tapuna ma tapuna anoi.*

*(Matthew 13:18-23; Luke 8:11-15)*

13 Anina ma Iesu i riwei i pa, “Wei awanainei a babani ma anona eḡa ota aramanei bo? Ma awanaina ḡelau menanare ona aramananei?”

14 Taupaewa, God riwana, rava anatapui e paripari-verei.

15 Rava ḡelau orai i bagibagi me etanai. Riwa au tepana e rauraei, wate maratagogi Satan e nenei da riwa rava au orai e vaivai-tawanei.

16 Ma rava ḡelau orai me doa viḡaiḡaimana. Tau, riwa i nonori ma maratagogi ana nuaiiai riwa e vaivaia.

17 Wate warami eḡa da eḡa ita mamae guratana. Ma maranai nuabola bo rau-iviapoapoe e nenei tau awari, aubaina tau ai tumaḡana God awarina e tereterei. Tau maratagogi e peupeu.

18 Rava ḡelau orai me pei, modu donadonai au orai e gogogolana. Tau anina riwa e nononori.

19 Wate lawana ai nuabola ma mane ai nuavainana ma kua ḡelau ai au nuaiiai e ruirui ma God riwana e lavalavani da eḡa ita uaua.

20 Ma ḡelau, tau me pei doa au aiaina i peu. Tau, lamna anina riwa e nononori ma e vaivai-kauei ma e uaua: ḡelau 30 ma ḡelau 60 ma ḡelau 100.”

21 Iesu i riwei i pa, “Rava, eġa rampa ita neineiai da iriga au gabaurina ita tereterei bo vatara au gabaurina ta pa? Rampa ana au anikiala e tereterei ta pa?”

22 Kaua mamae govaġai, anapatapui a vieġai ma kaua govagovaġai nanarena ana vieġai.

23 Mepa da taniġami e mamae, riwa ona nonori!”

24 Iesu i riwa i pa, “Aiwai o nononoria ona rautaniġanana-kauei, ruva o ruveruveia, God nanare awarimi ina ruvai ma ġelauna ina tavipotoi.

25 Lamna aubaina, mepa da riwau ona aramanei, tau ġelauna ma ġelauna ana veremi. Ma tau i eġa ita aramanei, lamna aiwai aburuna i nononoria, ina vine-boai.”

*Pei gogogona ana awanaina.*

26 Iesu e ririwa i pa, “God ana vigulau me rava, witi peina au doa ita ravi-awawari.

27 Ma waguvara e matamatave ma maratomi e vovomairi ma pei e gogogo ma e rarata. Wate aiwaiei e gogogo, tauna e vivinuanaini.

28 Doa ana nuaina, pei me witi e vivigogoi ma e uaua. Au naona e raraupairei ma muriai e roverove ma muriai anona e magumagura au tapina.

29 Maranai i magura, rava petona e raraukarei. Tuaruta marana i ġetai.”

*Pei aburuoina ana awanaina*

*(Matthew 13:31-32, 34; Luke 13:18-19)*

30 Iesu i riwa i pa, “God ana vigulau aiwaiei ana parivai-patepatei bo aiwai awanaini ana pariveremi?”

31 Wenanare, wei aina peina, lamna me gaga peina, pei aburuoina au dobu ma au doa i paewi.

32 Ma peina i gogo ma i rata da ai muomuoi i ġetawanei ma raġaraġai ġaeġae i terei ma au ġoui, kiu ai noġi ita voai.”

33 Ma Iesu, awanaina maġamaġai, rava au matai i raugugulei da tau i rau-taniġana ana au ruva nanare.

34 Awanaini, rava awari i giugiu, wate ana tauvotaġotaġo ava awari kaua anapatui i vivieġai.

*Iesu, kojikojira i ravi-daumorai*

*(Matthew 8:23-27; Luke 8:22-25)*

35 Nai aubigaina Iesu, ana tauvotaġotaġo i riwei i pa, “Tana damana topa au baba ġelauna.”

36 Anina ma tau i patara i voterei. Ma anapatui Iesu, maiteni au waga i geru ma i damana, waga ġelau maiteni.

37-38 Iesu, waga au murina unutana i terei ma i raunuavuru. Ma kojikojira ġaeġaena i tupua ma rabama, waga au tepana i rauraei ma waira, waga i oaoai. Ma ana tauvotaġotaġo, tauna

i ravi-dagudagui ma i riwei i pa, “Taugiu, nuanuam e bolabolai bo eġa da tana iraġe?”

<sup>39</sup> Ma tauna i vomairi ma ive i viġaei ma i riwei i pa, “Ma genuana!” Ma rabama i riwei i pa, “Ma mae-genuataul!” Ma ive i wanatuini ma daumora ġaeġaena i matave.

<sup>40</sup> Iesu ana tauvotaġotaġo i riwei i pa, “Aiwai aubaina o rovorovo? Taumi amapo da eġa ota vitumaġana!”

<sup>41</sup> Ma tau i rovo kaua ma i riwa vivira i pa, “Wei ai ai ravana da ive ma rabama tauna e vovoteletelei?”

## 5

*Iesu, arua-apoapoena oroto awarina i viaġaġana-opunei.*

*(Matthew 8:28-34; Luke 8:26-39)*

<sup>1</sup> Iesu ana tauvotaġotaġo maiteni Galili topana au baba ġelauna i ġeta, mai Gerasa ai au dobu.

<sup>2</sup> Wei au dobuna, arua-apoapoena oroto au orana mae-maena.

<sup>3-5</sup> Eġa ai ai tagotagogina da ita vovaiubai. Mara maġamaġauna, aena ma urana seinei i pani. Wate wei i viaituini, ma eġa tagotagogina da seinei ita pani. Marai ma waguvarai i nene-labalababa ma i garagarara ma ġaime i tupuana i boribori-melei ma au kokoaga ma au ola i raunuma.

<sup>6</sup> Maranai Iesu wagei i opuopu, arua-apoapoei orotona i ruiuinia, aueia Iesu i 'nanai ma kokoagei i ruba ma Iesu au naona i mae-peu ma i raudune.

<sup>7-8</sup> Iesu, ravana i riwei i pa, “Arua-apoapoena, wei orotona ma opu-tawaneii!” Ma orotona, ponana au aidamo ma i garara, “Iesu, God Aidamo Telarana Natuna! Aiwai awariu e ġoeġoei? God wavanei a vivibaġaim da eġa ma kovoġiu!”

<sup>9</sup> Iesu, orotona i vitara-virevirei i pa, “Tam wavam ai ai?”

I paribelei i pa, “Tauai a maġa, aubaina tau wavau lamna Ġavia Patarana.”

<sup>10</sup> Ma arua-apoapoei, Iesu i vibaġa-guratei da avena nai dobunei ita viopuna-tawanei.

<sup>11</sup> Ma poro boruna ġaeġaena au ġereġere ola au adana i labalaba.

<sup>12</sup> Ma arua-apoapoei, Iesu i vibaġai, “Ma paritawanelai poro au orai ana rui.”

<sup>13</sup> Iesu i vianina. Ma arua-apoapoei, orotona i opu-tawanei ma poro au orai i rui. Poro boruna 2,000 nanare olei i ruba ġaira da au topa i monu.

<sup>14</sup> Ma poro taupainii i ruba nae au melagai ma au wapu; ma riwa i vibabarai. Ma rava i nei da ita inanai aiwai i tupua.

<sup>15</sup> Ma maranai i nae Iesu awarina, orotona au naona arua-apoapoei patarai au orana i mammae; tauna i kiakiala, gara i oteni ma ana nota jijimanina. Ma tau i rovo kaua.

16 Ma aiwai i tupua orotona ma poro awari, tau i 'nainanaia, rava i riwana-naiei.

17 Ma dobuna ravai, Iesu i vibaḡai da dobuna ita oputawaneii.

18 Iesu au waga i gerugeru ma orotona, Iesu i vibaḡai i pa, "Tau maiteni tana nae."

19 Iesu i viḡaei ma i riwei i pa, "Ma naeme am au dam. Ma BADA kua aiwai ḡaeḡaena i kaukaueia ma ana iviaiai tam awarim, tau ma parivereii."

20 Ma anina orotona, Iesu i netawanei ma i nae au Dekapolis (*melagai 10*) da Iesu aiwai awarina i kaukaueia, rava i riwana-naiei. Ma tau anatapui i nononoria i baiei.

*Iesu, Jairus natuna wavinena ma wavine doridoriana i vilawani.*

*(Matthew 9:18-26; Luke 8:40-56)*

21 Iesu wagei i damana me topa au baba ḡelauna. Maranai kampa i ḡeta ma topa au adana, ma patara i rieiai.

22 Pari numana badana wavana Jairus i nei weka ma maranai Iesu i 'nanai, tauna Iesu au aena i mae-peu

23 ma i vibaḡa-guratei i pa, "Natu guguinina e irairaḡe. Ma nei ma uram au inina ma terei ma ina lawana."

24 Anina ma Jairus, Iesu maiteni i nae ma patarana i mae gariḡuruvi ma i votaḡotaḡoi.

25 Wavine tagogi kampa patarana au orana awarina tara-doriana i mae da madeḡa 12 i kwa.

26 Ana mane anataputapuna, dokedoketa maḡamaḡau awarii i tawanei ma eḡa tagotagogina ita vilawani ma amapo da ana doria i rarata.

27-28 Tauna, Iesu nolana ma ana babani i nonori ma au orana i vinua-notanota i pa, "Mepa da ana gara ava ana vodadani ma ana lawana." Ma tauna, Iesu murinei i nei ma ana gara i vodadani.

29 Maratagogi, tara-doriana i wanatuini ma malana i vaia da i lawana.

30 Nai maranaina, Iesu malana i vaia da ana rewapana i oputawanei ma i mae-tavirei patara au poui ma i riwa i pa, "Aiai au gara i vodadani?"

31 Ana tauvotaḡotaḡo, tauna i riwei, "Ma inanai, patara i mae gariḡuruvim! Ma menanare da u riwa 'Aiai i vodadaniu?"

32 Wate Iesu i 'nana viravira da ita inanai aiai i vodadani.

33 Wavine i rovo kua ma i sisisi, wate i aramanei aiwai awarina i tupua ma i nei ma Iesu au naona i raupari ma aiwai anatapui i vieḡei.

34 Anina ma Iesu, wavine i riwei i pa, "Natu, am tumaḡana i vilawanim. Am doria i kwa, ana nuubam ma nae!"



<sup>35</sup> Maranai i bababani ma rava ġelau i Jairus ana numei i nei ma i riwei i pa, “Natum ana mara i kwa. Eġa Taugiu ma visina-viravirai.”

<sup>36</sup> Iesu ai babani i nonora-tawanei ma Jairus i riwei i pa, “Eġa ma rovo, ma vitumaġana!”

<sup>37</sup> Iesu, rava ġelau i viġaei ma Peter ma James ma ana tevera John maiteni i nae.

<sup>38</sup> Ma Jairus ana au numa i ġeta ma Iesu, patara i 'nanai; i toutou ma i taratarakwatu

<sup>39</sup> ma i rui ma tau i riwei i pa, “Aiwai aubaina o taratara-kwatu ma o toutou? Tevera eġa ita iraġe, tauna e matamatave ota.”

<sup>40</sup> Ma tau i, Iesu i kakei, ma lamna aubaina rava i viopuni au doa ma tevera alona ma amana ma tauna ana tauvotaġotaġo tonuġa maiteni i rui mepa tevera i matamatave lana.

<sup>41</sup> Iesu, tevera nimana i vaia ma i riwei i pa, “*Talitha kum!*” wei anona, “Kukuma, ma vomairi!”

<sup>42</sup> Maratagogi i vomairi ma babara i vikarei (Tauna ana madeġa 12). Ma tau i ba kaua.

<sup>43</sup> Iesu, tau i riwana-guratei da eġa aiai ita vieġei ma i riwa da ita viambagibagi.

## 6

### *Mai Nasaret, Iesu i parivirevirei*

<sup>1</sup> Iesu ana tauvotaġotaġo maiteni nai dobuna i netawanei ma i naeme ana au melagai.

<sup>2</sup> Ma Sabat marana i ġeta ma tauna giu i vikarei au pari numana. Ma rava maġamaġau i riei da i rautaniġanei. Tau i anatapui i baiei ma i vitara-viravira vivira i pa, “Wei tauna nu-aulaula ma aramanana mepa i vaia?” Ma, “Kaua aiwaiei e kaukauei?”

<sup>3</sup> Anina ma tau i ava i babani vivira i pa, “Tauna tauvoa. Mary ana natuevou ma varevarena James, Jose, Judas ma Simon ma novunovui weka e mamae tauna bo?” Ma lamna aubaina mai Nasaret, Iesu i parivirevirei.

<sup>4</sup> Iesu, tau i riwei i pa, “*Peroveta* dobu au ġelau i e vivivirei, wate ana au melagai, ana rava ma ana dam oina, eġa ita vivivirei.”

<sup>5-6</sup> Tauna i baiei da rava eġa tauna ita vitumaġanei. Ma eġa tagotagogina da kua vivirewapanai kampa ita kau i. Tauna urana, rava ruaġa ota doridoriai au tepai i terei ma i vilawani. Ma muriai, melagai nununai au ġereġerei i viararamana nae.

### *Iesu ana Apasol i paritawanei da ita viararamana*

<sup>7</sup> Ma Iesu, tau i 12 i ġoreiai ma ruaruagei ava i paritawanana-opunei ma rewapanana i verei da arua-apoapoei ina viaġaġana-opunei.

<sup>8</sup> Ma riwa bagibaginei i riwei i pa, “Ami au vaḡai, eḡa aiwai ona vaia anina jīḡona ava; eḡa lam, eḡa autu bo mane au urami.

<sup>9</sup> Ae uma ona oteni ma eḡa kwama ḡelauna ona vaia.”

<sup>10</sup> Ma i riwei i pa, “Metauna melagaina o ruiruiana ma i vianinemi. Numa tagoginina au orana ona mae da melagaina ona oputawanei.

<sup>11</sup> \*Mepa da au melagai o ḡeta ma rava eḡa ita vianinemi bo eḡa ita rautaniḡanemi. Nai melagaina ona oputawanei ma aemi pokauna ona rauabuabui da ina aramanei da tau i wavu!”\*

<sup>12</sup> Ma tau i opu ma rava awari i raugugula ma i riwei i pa, “Taumi ami ḡo’apoapoei ona voterei ma ona mae-taviremi God awarina!”

<sup>13</sup> Tau, arua-apoapoei i viaḡaḡana-opunei. Ma rava doridoriai maḡamaḡau, olive oirana au kolai i buloi ma i vilawani.

### *John Taubabataito ana iraḡe*

<sup>14-16</sup> \*Iesu nolana i nae da rava anatapui i aramanei ma tauna i babaniei. Ma rava ḡelau i ririwa i pa, “Tauna, kua vivirewapanai e kaukauei, aubaina tauna John Taubabataito iraḡelei i vomairi me.” Ḣelau i ririwa i pa, “Tauna Elijah i nememei.” Ma ḡelau i ririwa i pa, “Tauna peroveta wariḡai nanare.” Ma gulau Herod,† nolana i nonori ma i riwa i pa, “Tau, John Taubabataito uana a borituini; marina i vomairi me.”

<sup>17-20</sup> John ana virarautua, lamna wenanare. Muriai da Iesu ana viararamana nolana ita vikarei. Herod, tuana Philip awana i kwalei ma i ravaḡi. Wavinena wavana Herodias. Au murina John, Herod i riwana ḡiriḡiriei i pa, “Tarawatu e mamae da eḡa vareim awana ma kwalei.” Ma Herod, riwa i paritawanei da John i pani da panipani au numana i terei. Herod ana nuaiaina, John i rarautaniḡanei. Wate nuanuana i raḡaraḡa.

Ma Herodias, John awarina amlona i ḡaiḡai ma virāḡenana i ḡoei. Herod i aramanei da John, lamna rava jijimanina ma vivivireina ma i gagaloei. Herod, John i rovoei ma lamna aubaina wavinena eḡa tagotagogina da aiwai ita kauai.

<sup>21</sup> Ma wavine, gavogavo i ’nanai, maranai Herod ana tupua marana i ḡeta ma torela i vokaukauei. Ma gabemani babadai ḡaeḡaei ma sorodia ai babada ḡaeḡaei ma Galili babadai i raukwatuei.

\* **6:11:** Act 13:51 \* **6:11:** Wariḡa mai Jew, tauvaḡai e nenememei au Israel. Tau i aei pokau e rarauabuabui maranai Israel ana au parata e ḡeḡeta, lamna tau i orai e viaiaini. Ma Iesu ana tauvotaḡotaḡo wei i kauai da melagai ravai ina notai, “Tauvotaḡotaḡo e ririwa da tauta orata apoapoea me tauta eḡa mai Jew.” \* **6:14-16:** Mrk 8:28 † **6:14-16:** Herod Antipas, Galili ana Wavalatona.

22 Ma Herodias natuna wavinena i nei ma i ara. Herod ma tau i maiteni i amam i vinuaiaini. Ma gulau, guguini i riwei i pa, “Aiwai u gōeḡoēia ma vibaḡaiu ma ana verem!”

23 Ma i parivainuaḡani i pa, “God au matana a ririwem da aiwai u vivibaḡeiu ana verem da au vigulau navanavana au paratana.”

24 Ma tevera wavinena i opu ma alona i paridadanei i pa, “Aiwai ana vibaḡei?”

Ma i paribelei i pa, “John Taubabataito kolana.”

25 Ma maratagogi i vipaparana ma gulau awarina i rui ma i vibaḡai i pa, “A gōeḡoēi da marina John Taubabataito kolana ma vereu au aboma!”

26 Ma gulau nuanuana i bola-kauei. Wate parivainuaḡana boiboḡi i kauei tau i amam au matai. Ma lamna aubaina guguini, aiwai i vivibaḡei anina i vianinei.

27 Ma tauviraḡena i paritawanei ma i riwei da John kolana ita neiai. Ma i nae panipani au numana ma John uana i borituini.

28 Ma kolana au aboma i terei ma guguini i verei ma guguini, alona i verei.

29 Ma John ana tauvotaḡotaḡo, nolana i nonori ma i nei ma taubeuna i vaia ma au kokoaga i vimataveni.

*Iesu, nelara 5,000 i viambagibagi*

*(Matthew 14:13-21; Luke 9:10-17; John 6:1-14)*

30 Apasol i ḡeta memei ma aiwai anaputapuna i kaukauei ma i raraugugulei, Iesu i vieḡei.

31 Lamna maranai, rava maḡamaḡau i nenei ma i nenaē da Iesu ana tauvotaḡotaḡo maiteni eḡa gavogavo ita maemaē da ita am. Lamna aubaina Iesu, tau i riwei i pa, “Taumi ava ona nei ma tana nae au mutulua da laumi ina tau mara aburuna.”

32 Ma anapui wagei i nae au mutulua.

33 Wate rava maḡamaḡau i 'nanai i nenaē ma i aramanei tau i aiavoi. Ma melagai nununai anapui geraei i ruba gogona da au dobuna i aiḡeta.

34 Maranai Iesu wagei i tuopu au gera ma patara ḡaeḡaena i 'nanai ma nuanuana i bola-kauei. Tau i me sipu ma eḡa ai tauvipapai. Ma Riwana Aiaina viararamanai i raukarei.

35 Ma au biga e tuturiai ma ana tauvotaḡotaḡo i nei awarina ma i riwei i pa, “Wei mutulua ma madeḡa e arearere.

36 Rava ma paritawanei da ina nae au melagai ma au wapu au ḡereḡere da ai lam ina gimarai.”

37 Wate Iesu i paribelei i pa, “Taumi ona viambagibagi!” Ma tau i paribelei i pa, “Mepa 200 *denarii*‡ tana vaia da wei patarana tana viambagibagi?”

38 Ma Iesu i paridadanei i pa, “Palawa biağa awarimi? Ona nae ma ona baiei!”

Maranai i nelağai ma i riwa i pa, “Awariai, palawa five ma iana ruağa.”

39 Anina ma Iesu, patara i riwei i pa, “Boru nununai, gidagida au majimajığai ona kiala nae.”

40 Ma tau ai au boru 50 da 100 nanare i kiala nae.

41 Ma Iesu, palawa five ma iana ruağa i vaia ma i ġoutata au mara ma God i viegualaei. Ma palawa i vogimagimai ma iana i ġutai da ana tauvotağotağo i verei ma tau, rava i verei.

42 Ma patara i am ma i am-iaua.

43 Ma ana tauvotağotağo, lam am tereterenai i tuarui da poa muomuoi 12 i vioai.

44 Nelara 5,000 i viambagibagi.

*Iesu, waira au tepana i babara*

*(Matthew 14:22-33; John 6:15-21)*

45 Anina ma Iesu, ana tauvotağotağo i egari da ita aidamana au Bethsaida.§ Tau i waga i geru da i nena ma tauna, patara i paritawanei.

46 Patara i paritawanei ma tauna ava i ġae au ola da ita raupari.

47 Ma waguvara ana tauvotağotağo au waga au topa ma Iesu au alala.

48 Ma ana tauvotağotağo, lare i vovoguratei da ita ġota wate ive i viraumatamatani. Ma maratomtomo nanare, Iesu i nae awari. Tauna waira au tepana i bababara ma i ġoei da tau i ita tutelarei.

49-50 Ma maranai tau, Iesu i ’nanai topa au tepana i bababara ma i notai da tauna konağa ma i rovo kaukau ma i vigaragararei. Ma maratagogi Iesu i riwa i pa, “Tepami ina tora! Tau, eğa ona rovo!”

51 Ma au waga i geru ma ive i wanatuini ma tau i bana-kauei.

52 Avena da kua palawa awarina i kauei i ’nanai, wate ana rewapana eğa ita aramana-kauei. Tau orai i bado ma i vinuanaina.

*Iesu, rava doridai mağamağai au Genesaret i vilawani*

*(Matthew 14:34-36)*

53 Tau, topa i damani ma au Genesaret i ġota ma ai waga i rağini.

54 Tau, waga i oputawanei ma rava, Iesu i ’nanai ma maratagogi i aramanei da tauna.

‡ 6:37: 200 denarii. Denarius tagogi lamna taubagibagi ai maia au pom tagogo nolana aubaina.

§ 6:45: Eng. *Bethsaida*.

<sup>55</sup> Iesu nolana, Galili provins anatapui i naeni ma i nonori da tauna mepa i mamae. Ma kampa, doridoriai rasirasiei i vivaneiai.

<sup>56</sup> Iesu mepa i nenelana, melagai gāegāei ma muomuoi ma wapu mepa rava e mamae lana. Ma rava, ai rava doridoriai nai au melagaina i neiai au deba. Ma i vibağa, da doridoriai, Iesu ana gara adana ava ita vodadani. Ma aiavoi Iesu ana gara i vodadani i lawana.

## 7

### *Amamami ai giu* (*Matthew 15:1-9*)

<sup>1-4</sup> Pharisi ma Jew anatapui, magumagura ai giu mağamağau e notanota-jijini. Taui, ai aniuma ma ai aniam anatapui e oğaoğai lamnei taui e viaiaina-melei God au matana. Ma maranai au maket da e nenei, urai ina oğai ma ina am. Taui eğa ina am da au naona urai ina oğa kau ei me ai magumagura ai giu nanare.

Maratagogi Pharisi gēlauri ma Tarawatu Babadai, Jerusalem ei i nei Iesu awarina da ita rautaniğanei. Ma taui i 'nanai da Iesu ana tauvotağotağō gēlauri, urai eğa ita oğai ma i amam.

<sup>5</sup> Ma taui, Iesu i vitara-virevirei i pa, “Aiwai aubaina am Tauvotağotağō magumagura ai giu, eğa ita votağotağoi ma ana ura miramirai e amam?”

<sup>6</sup> Ma Iesu i paribelei i pa, “Taumi morumorumi ma o vikaua-aiaina-melemi. God ana peroveta Isaiah i riwa kaua maranai i riwa, i pa:

‘Wei ravai ipiriei e vovoeapaepaiu,  
wate nuanuai aueia.

<sup>7</sup> Taui rava ai giu e viviararamani.

Lamna aubaina ai voepaepa anona eğa.’ (*Isaiah 29:13*)

<sup>8</sup> Taumi, God ana Tarawatu o teretere-tawanei ma ami giu o votağotağoi.”

<sup>9</sup> Ma i riwana-melei i pa, “Taumi o aramana kaua da God ana Tarawatu o gedugeduaiei ma amamami ai giu o vovotağotağoi.

<sup>10</sup> \*God ana Tarawatu, Moses i girugirumia nanare: *Amam ma alom ma vivirei ma Aiai amana ma alona e enaena-boai, tauna ona virağeni.*

<sup>11</sup> Wate taumi o viararamana da aiai awarina mane bo pura-pura, amana bo alona ita voagui ma ita riwei, ‘Awariu e mamae da ata voaguim; wate lamna *Corban* - a tereriei pulo, God aubaina.’

<sup>12</sup> Wei viararamanana, taui e viviğaei da amana ma alona ina voagui.

13 Ma wei taunei viararamana, rava awari o vividamani; ma God riwana o vivikwakwavi. Ma kua maḡamaḡai ḡelau maiteni o kaukai.”

*Metauna kauai, rava orai e vivimirai.*  
(Matthew 15:10-20)

14 Iesu, patara i kwatuana-melei ma i riwei i pa, “Anatapumi ona rautaniḡaneu ma aiwai a ririwemi ona aramanei.

15-16 Aiwai au tanoei au orami e ruirui, lamna eḡa ita vivimiraimi ma aiwai da oramiei e opuopu, lamna e vivimiraimi God au matana.”\*

17 Anina Iesu, patara i voterei ma i rui au numa. Ma ana tauvotaḡotaḡo, i vitara-virevirei da wei awanainana anona aiwai.

18-19 Iesu i paribelei i pa, “Taumi maiteni eḡa ota aramanei bo? Kaua aiwai au tano, rava au orai e ruirui amapo eḡa ina vimirai. Anona lamna wei kauai, eḡa ita ruirui rava au nuapouna, wate au manawana da e opuopu.” (Wei riwanei Iesu, lam anatapui i viaiaini).

20 Anina ma i riwa i pa, “Aiwai, rava oranei e opuopu; lamna, rava e vivimirai God au matana.

21 Anina rava nuanuane i vinuanotanota apoapoei e opuopu me: viawawana labalababa, danene, viragena, awadanene,

22 ambo, rau-iviapoapoe, moru, erawa, unura, terevaideḡa, mae-ḡaeḡae ma opa.

23 Wei kauai apoapoei anatapui oranei e opuopu ma rava e vimiramirai.”

*Jentail wavine,† Iesu i vitumaḡanei*  
(Matthew 15:21-28)

24 Ma dobuna i voterei ma i nae Taia ana au parata. Ma i rui govaḡa au numa ma eḡa ita ḡoei da rava ita aramanei da tauna kampa, wate eḡa tagotagogina da ita raugovaḡa.

25-26 Wavine tagogi, Iesu nolana i nonori ma i nei awarina. Tauna eḡa Jew ma Jentail au Phonisia i tupua, Siria ana au parata. Arua-apoapoena, tauna natuna wavinena aburuna i ruini; ma alona i nae Iesu au naona i mae-peu ma ma i vibaḡai da arua-apoapoena ita viopuni.

27 Iesu i aramanei da tauna Jentail; lamna aubaina i riwei i pa, “Eḡa ita ai da roaroa ai lam ata vaia da auou ata verei da au naona roaroa ina am-iaua.”‡

28 Ma wavine i paribelei i pa, “Bada, aiwai u riwei; lamna riwa kaua. Wate auou, roaroa ai lam momoḡina, kepakepa au gabaurina e raurau e aniani.”

\* **7:15-16:** Giruma ḡelau Mark uranei i girugirumia wei riwai wenanare e mamae, “Mepa da tanigami e mamae, ona rautaniḡana.” † **7:23:** Rava eḡa mai Jew. ‡ **7:27:** Riwa roaroa wei au awanaina lamna mai Jew. Taui e notanotai da taui i ai guratana eḡa me rava ḡelau. Lamna aubaina taui dobu ḡelau ravai e ḡoreḡorei auou.

29 Ma Iesu wei i riwei i pa, “U paribelana kaua, aubaina ma nae au numa. Arua-apoapoena natum i opu-tawanei.”

30 Ma wavine i naeme au numa. Natuna wavinena i 'nanai i matamatave, arua-apoapoena boiboigi tevera i opu-tawanei.

*Iesu, oroto taniġa-potapotana ma mena birebirena i vilawani*

31 Iesu Taia ma Sidon ana parata i netawanei ma au babaġela Dekapolis i verautuini ma i nae au Galili topana.

32 Orotu taniġana potapotana ma menana birebirena i neiai Iesu awarina ma i vibaġai da urana au inina ita terei da ita vilawani.

33 Iesu, oroto i taravaina-opunei da tau i ava ma ura-gigina, oroto au taniġana i terei ma ura-gigina ġelauna i ovai ma menana i vodadani.

34 Nuanuana i bolai ma i ġoutata au mara; i lavutu tawanana ma oroto i riwei i pa, “*Ephatha!*” Wei anona, “Ma wanatawanei!”

35 Maratagogi taniġana i wanatawanei ma menana i vidagudagu ma i babani kaua.

36 Ma Iesu, tau i viġaei da aiwai i tuputupua, avena rava ita vieġei. Iesu, rava i viġaei; wate tau i eġa ita rautaniġana ma riwa i vituai.

37 Ma maranai ravai wei i nonori, tau i bana-kauei ma i riwa i pa, “Aiwai anapui i kauana-kauei. Tauna, rava taniġa potapotai e vivilawani da e rarautaniġana ma menabirebirei e bababani.”

## 8

*Iesu, rava 4,000 i viambagibagi*

*(Matthew 15:32-39)*

1 Nai maranai, patara ġaeġaena i riana-melei. Patara eġa ai lam. Ma Iesu, ana tauvotaġotaġo i kwatuei da i nei ma i riwei i pa,

2 “Au pom tonuġa patara maiteni a mae ma ai lam eġa ma a rau-nuapapoelei.

3 Tau i ġelau, uamei i nei. Mepa da ana am-iraġe ana paritawanei ai au numa, ma au etanai ina raumolaġau.”

4 Ma ana tauvotaġotaġo i paribelei i pa, “Wei mutulua ma mepa lam tana vaia da wei patarana tana viambagibagi?”

5 Ma Iesu, tau i paridadanei i pa, “Awarimi palawa biaġa?”

Tau i riwa i pa, “seven.”

6 Ma Iesu, patara i riwei da au doa i kiala. Ma palawa seven i vaia ma God i viegualaei ma i vogimagimai ma ana tauvotaġotaġo i verei da patara i verei.

7 Ma tau i awari, iana muomuoi ruaġa ota. Iesu i vaia; God i viegualaei ma ana tauvotaġotaġo i verei da patara i verei.

8 Tau i anapui i am da i am-iaua. Ma lam am tereterenai i tuarui da poa ġaeġaei seven i vioai.

<sup>9</sup> Rava 4,000 i viambagibagi. Ma muriai i paritawanei ai au numa.

*Pharisi, God ana mataira i vibaḡei*  
(*Matthew 15:39-16:4*)

<sup>10</sup> Maratagogi, Iesu ana tauvotaḡotaḡo maiteni au waga i geru ma i nae Damanuta ana au parata.

<sup>11</sup> Pharisi ḡelau i nei ma viparipariḡai i vikarei Iesu maiteni. Tau i ḡoei da Iesu ita raudadani da mataira Godei ita viatataiei.

<sup>12</sup> Iesu, Aruanei i lavutu tawanana ma i riwa i pa, “Wei kimta voui, aiwai aubaina mataira e ḡoeḡoei? A ririwana-kauemi, amapo mataira eḡa ona inanai.”

*Iesu, ana tauvotaḡotaḡo I parivainotai*

<sup>13</sup> Anina ma Iesu, patara i netawanei ma ana tauvotaḡotaḡo maiteni au waga i geru me ma i damana Topa Galili au baba ḡelauna.

<sup>14</sup> Ma ana tauvotaḡotaḡo, nuanuai i vuru da ai palawa ita vaia ma palawa tagogi ava au waga i mamae.

<sup>15</sup> Iesu, tau i parivainotai i pa, “Pharisi ma Herod ai giu ma ai viararamana morumoruna ona inana-kauai! Lamna me yist.\*”

<sup>16</sup> Ma tau i babani vivira i pa, “Tauta eḡa ata palawa aubaina da e ririweta.”

<sup>17</sup> Ma Iesu i aramanei ma tau i riwei, “Aiwai aubaina o bababani da taumi awarimi eḡa palawa? Taumi amapo da eḡa ota aramana ma o vivinuanaina? Orami i bado bo?”

<sup>18</sup> ✨Matami e mamae ma eḡa ota inainana. Ma taniḡami e mamae ma eḡa ota nonora. Ma o vinuanotanota bo eḡa?

<sup>19</sup> Maranai palawa five a vogimagimai rava 5,000 aubaii, lam am tereterenai o tami da poa biaga o vioai?”

Tau i paribelei, “Twelve.”

<sup>20</sup> “Ma maranai palawa seven a vogimagimai rava 4,000 aubaii, lam am tereterenai o tami da poa ḡaeḡaei biaga o vioai?”

Tau i paribelei, “Seven.”

<sup>21</sup> Ma tau i riwei i pa, “Ma amapo da o vivinuanaina!”

*Iesu, oroto mata apoapoena i vilawani au Bethsaida*

<sup>22</sup> Tau i nei au Bethsaida ma rava ḡelau, oroto matana apoapoena ineiai Iesu awarina ma i vibaḡa-guratei da ita vodadani.

<sup>23</sup> Ma Iesu, oroto matana apoapoena i raunimavoai ma mela-gaiei i taravaina-opunei. Ma kampa matana i ovai ma urana au matana i terei ma i paridadanei, “Aiwai e inainanai bo eḡa?”

<sup>24</sup> Ma i taepai ma i riwa, “Rava a inainanai ma tau i me ai ita bababara.”

\* **8:15:** Yist mai Jew awarii awanaini lamna aiwai da apoapoe, mira bova e vivitua bo e vivimaḡai. Weka Iesu mai Pharisee ma mai Herod ai lawana ma ai giu morumorui e babanai, da eḡa ina tua. ✨ **8:18:** Mrk 4:12



25 Iesu, urana i tere-melei oroto au matana. Ma matana i wanatawanei da aiwai anapapuna i 'nana-kauei.

26 Iesu, tauna i paritawanei ana au numa ma i riwei, "Eġa ma nae au melagai! Wate jijimanina ma nae au numa."

*Peter i riwa da Iesu, tauna Keriso  
(Matthew 16:13-16; Luke 9:18-20)*

27 Iesu, ana tauvotaġotaġo maiteni i nae melagaii Caesarea Philipai au ġereġerei. Maranai i nenae ma Iesu, tau i paridadanei, "Rava e ririwa; tau aiai?"

28 ✨Ma tau i paribelei, "Ġelau i ririwa da tam, John Taubataito. Ma ġelau Elijah. Ma ġelau e ririwa da peroveta wariġana tagogi."

29 Ma Iesu, tau i paridadanei, "Wate taumi, mena o notanotane? O ririwa da tau aiai?"

Peter i paribelei, "Tam God ana *Messiah* - anona Keriso."

30 Iesu, tau i viġaei da eġa aiai ina riwei da tauna aiai.

*Iesu ana iraġe ma ana vomairi me i babaniei  
(Matthew 16:21-23; Luke 9:21)*

31 Ma Iesu i raukarei da ana tauvotaġotaġo i giuni i pa, "Rava Natuna ina vinuapoapoe kua. Ma dogadogara, piri si babadai ma tarawatu babadai, tauna ina pari-geđuaei ma ina viraġeni. Ma au pom tonuġa au murina ina vomairi me."

32 Iesu jijimaninei wei kauai i bababaniei ma lamna aubaina Peter, tauna i taravaini au ririva ma enana i vikarei.

33 Wate Iesu i mae-tavirei ma ana tauvotaġotaġo i 'nanai. Ma Peter i eni, i pa, "Satan ma nae au muriu! Tam am nota eġa Godei ita nenei, eġa da ravei."

*Iesu votaġotaġona anona  
(Matthew 16:24-28; Luke 9:23-27)*

34 Ma Iesu, patara ma ana tauvotaġotaġo i raukwatuei ma i riwei, "Mepa da aiai ita votaġotaġoiu. Tauna ina boviaana-melei ma ana korosi ina avarai ma ina votaġotaġoiu.†

35 Aiai ana lawana e tatajjini, ina vine-boai. Ma aiai da ana lawana i verenei; Tau ma Riwana Aiaina aubaina. Tauna ana lawana ina vaimeli.

36 Ana aii bo anona aiwai, mepa da wei dobuna lawanana ma vigulauna ma vaipai ma am lawana maemae-nonoana ma vine-boai.

37 Wate aiwaiei am lawana ma gimara-melei.

38 Mepa da aiai: tau ma au viararamana ina vinimalei; ma i mae-puputeu; ma ana ġoanei kua apoapoe ina kaukauei. Rava

✨ 8:28: Mrk 6:14-15 † 8:34: Wei lamna awanaina. Anona lamna Iesu ana tauvotaġotaġo anina vinimala ma apoapoei ina nelaġai aubaina tau, tauna i votaġotaġoi. Tauna eġa ita ririwa da ana tauvotaġotaġo au korosi ina iraġe me tauna.

Natuna, tauna ina vinimalei maranaina ina nememei; Amana ana au boruma anela vivivirei maiteni.”

## 9

<sup>1</sup> Ma Iesu, wenanare i riwei, “Taumi a ririwana-kauemi; rava ġelaumi weka o maimairi amapo eġa ona irage da God ana vigulau ona inana ana rewapanana ina nei.”

*Iesu inanana i virai  
(Matthew 17:1-13; Luke 9:28-36)*

<sup>2</sup> Au pom six muriai, Iesu, Peter, James ma John i taravaini. Ma tau i ava i ġae ola ġaeġaena au tepana. Ma kampa tau i matai, Iesu inanana i virai.

<sup>3</sup> Ana gara i arapora ma gamrina i vimata-kamokamota; eġa me aiwai ġelauna au dobu nanare.

<sup>4</sup> Ma kampa au matai, Elijah ma Moses i eġa. Ma Iesu maiteni i bababani.

<sup>5</sup> Ma Peter Iesu i riwei, “Tauviararamana, i aii da tauta weka. Ma vianinelai da numakweta tonuġa ana voai: tagogi tam aubaim, ġelauna Moses ma ġelauna Elijah aubaina!”

<sup>6</sup> Ma tau i rovo kua ma Peter eġa ita aramanei da aiwai i latolatoni.

<sup>7</sup> \*Anina ma apau i eġa ma tau i purui. Ma pona apauei i opu ma i riwa i pa, “Wei Tau Natu au nuavainana, ona rautaniġane!”

<sup>8</sup> Maratagogi tau i 'nana viravira ma eġa aiai ġelauna ita inana ma Iesu, tauna ava.

<sup>9</sup> Ma maranai olei i ġaiġairai ma Iesu, tau i viġaei da aiwai i 'nananaia eġa ina vieġai da au naona Rava Natuna iragelei ina vomairi me.

<sup>10</sup> Ma tau i, wei riwana i voteletelei ma i babani vivira i pa, “Iragelei vomairi me anona aiwai?”

<sup>11</sup> Ma tau i, i vitara-virevirei i pa, “Aiwai aubaina, tarawatu babadai e ririwa da Elijah au naona ina nei?”\*

<sup>12</sup> Iesu i paribelei, “Riwa kua Elijah au naona ina nei da aiwai anatapuna ina vokaukauei. Aubaina wariaġa i girumi da Rava Natuna ina vinuapoapoe kua ma ina inana-ġeduaiei.

<sup>13</sup> Wate a ririwana-kauemi da Elijah anina i nei ma rava, ai ġoanei tauna i rau-iviapoapoelei me i girugirumia nanare.”†

*Iesu, arua-apoapoena tevera orotona awarina i viopuni  
(Matthew 17:14-21; Luke 9:37-43a)*

\* **9:7:** Mrk 1:11 \* **9:11:** Mai Jew i vitumaġana da Elijah au naona ina nememei ma Keriso muriai ita nei. (Mal 3:1, 4:5-6). Ma tau i eġa ita notai da Elijah rau-iviapoapoe ina nelaġai ana au nememei. † **9:13:** Iesu lamna John Taubabataito i bababaniei da tauna Elijah (Mat 11:13-14, 17:10-13)

14 Iesu ana tauvotaḡotaḡo tonuḡa maiteni olei i ḡaira memei ai rava awari ma patara ḡaeḡaena, tau i gariḡuruvi. Ma Jew ai tarawatu babadai, tau maiteni i vivitarapiri.

15 Maranai patara, Iesu i 'nanai. Tau orai i auepai ma awarina i ruba ma i viegualaei.

16 Iesu, tau i vitara-virevirei, "Aiwai o vitarapiriei?"

17 Orototagoga patara au poui i paribelana, "Tauviararamana, arua-apoapoena natu orotona au orana e mamae ma i kauē da eḡa ita bababani, lamna aubaina a neiai awarim.

18 Maranai ana doria e ururu-melei, lamna arua-apoapoena: tauna au doa e tawatawanei; gamona e vivipuropuro; ivona e utauta ḡirigiriei; ma inina e badobado. Am tauvotaḡotaḡo a vibaḡai da arua-apoapoena ita viopuni, wate eḡa tagotagogina da ita kauē."

19 Ma Iesu i paribelei, "Oo mara aiwai ona vitumaḡana! Ta mae ḡaḡa ma ami vita ana 'vara ḡaḡalei? Tevera awariu ona neiai!"

20 Ma tevera i neiai Iesu awarina. Ma maranai arua-apoapoena, Iesu i 'nanai, maratagoga tevera i viaikwajiana-guratei da au doa i tonei ma i vitatauvira ma i vivipuropuro.

21 Iesu, tevera amana i vitara-virevirei, "Wei teverana ana doria mara aiwai i vikarei?"

I paribelei i pa, "Maranai aburunai.

22 Arua-apoapoena mara au anapuna, tauna ai au araratana ma au waira e tawatawanei ma i ḡoei da ita viraḡeni. Mepa da tam tagotagogina; ma raunu'apoapoelēlai ma ma voaḡuai!"

23 Iesu, tauna i riwei, "Menanare da u riwa, 'Mepa da tam tagotagogina?' Aiai ravana e vivitumaḡana, God anapuna ina kauē tauna aubaina."

24 Maratagoga tevera amana i garara, "A vitumaḡana, wate au tumaga eḡa ita rata ma ma voaḡui da ina rata!"

25 Iesu i 'nana da patara i rierieiai awarii ma lamna aubaina arua-apoapoena i egari i pa, "Tam arua taniḡa-potapotana ma gumgum. Tau a egaegarim da tevera ma opu-tawanei. Ma eḡa melanai au orana ma rui me!"

26 Ma arua i garara ma tevera i viaikwajiana-guratei ma i opu-tawanei. Ma tevera inanana me taubeu. Ma rava maḡamaḡai kampa i riwa, "Tauna i'raḡe!"

27 Ma Iesu, tauna urana i vojijini ma i sinaepai da i mairi.

28 Muriai Iesu, ana tauvotaḡotaḡo maiteni i rui au numa. Ma maranai taui ava ma i paridadanei i pa, "Aiwai aubaina tauai eḡa tagotagogina da arua-apoapoena ata viopuni?"

29 Iesu, i riwa, "Arua-apoapoei me wenanare, pari ainelana ina viopuni."

*Iesu ana iraḡe i babaniana-melei  
(Matthew 17:22-23; Luke 9:43b-45)*

30 Iesu, ana tauvotaḡotaḡo maiteni dobuna i netawanei ma Galili i verautuini. Iesu eḡa ita ḡoei da rava ita aramanei da tau i mepa.

31 Aubaina tauna, ana tauvotaḡotaḡo i viararamani i pa, “Tau i Rava Natuna ina amverenei rava ḡelau i au urai. Ma tau i ina viraḡeni. Wate au pom tonuḡa au murina ina vomairi me.”

32 Wate tau i eḡa ita aramanei tauna aiwai i bababaniei. Ma pari-dadanana i rovoei.

*Tauvotaḡotaḡo i vitarapiri vivira da aiai i ḡetelara*  
(*Matthew 18:1-5; Luke 9:46-48*)

33 Iesu ana tauvotaḡotaḡo maiteni i ḡeta au Capeniam ma au numa i rui. Ma Iesu, tau i vitara-virevirei, “Au etanai aiwai o vitarapiriei?”

34 Wate tau i genuana, aubaina au etanai tau i vitarapiri vivira da aiai i ḡetelara.

35 ☆ Iesu i kiala ma Apasol 12 i raukwatuei awarina ma i riwei i pa, “Aiai e ḡoeḡoe da ina vibada. Tauna ina tereḡairana-melei ma ina vimuri dewadewa ma ina vitaunola rava aubai.”

36 Ma Iesu, tevera i vaia ma au poui i vimairini. Ma urana au jiḡona i tere-taḡonei. Ma tau i riwei i pa,

37 “Aiai ravana; tau wavau ei, tevera wenanare i rauḡorei. Lamna tau maiteni e rarauḡoreiu. Ma aiai da tau e rarauḡoreiu. Lamna tauparitawaneu maiteni e rarauḡorei.”

*Aiai eḡa ata ḡavia, lamna turata*  
(*Luke 9:49-50*)

38 Anina ma John, Iesu i riwei, “Tauviararamana! Tauai, oroto tagogi a inana; tam wavamei arua-apoapoeni i viviopuni ma tauna eḡa turata. Lamna aubaina a viḡaei da eḡa ina kauana-melei.”

39 Iesu i riwa, “Eḡa ona viḡaei! Eḡa aiai au wavau kaua babai ina kau ei ma muriai ina parivai-apoapoeni.

40 Aiai ravana eḡa ata ḡavia; lamna turata.

41 Tau a ririwana-kauemi. Mepa da aiai ravana, waira i veremi tau au wavau; aubaina taumi au Tauvotaḡotaḡo. Tau i ai maia eḡa ina vine-boai.”

*Rauelara babanina*  
(*Matthew 18:6-9; Luke 17:1-2*)

42 Aiai ravana i kau ei da wei teverana ana tumaḡana Tau awariu i viapoapoeni da ḡo’apoapoe i kau ei. Lamna i ai da ḡaima ḡaeḡaena ravana au uatabana ina duri ma au boga ina tawanei aubaina God, tauna ina kovoḡa-guratei. <sup>43-44</sup> Mepa da nimam i kau em da ḡo’apoapoe u kau ei. Ma bori-tawanei! I aii da nimam tagogiava ma lawana mamae-nonoana ma vaia. Ma eḡa

ma kauēi da nimam ruaḡa aiāi ma ma nae ai au menamenana; mēpa ai eḡa melanai ita bobo.‡

<sup>45-46</sup> Mēpa da aem i kauem da ḡo'apoapoena u kauēi. Ma bori-tawane! I aii da sigesigem au lawana mamae-nonoana ma rui. Eḡa me aem ruaḡa aiāi ma ai au menamenana ina tawanem.‡

<sup>47</sup> Ma mēpa da matam ina kauem da ḡo'apoapoena u kauēi. Ma vaitawane! I aii da matam tagogi ma God ana vigulau ma rui. Eḡa me matam ruaḡa ma ai au menamenana ina tawanem;

<sup>48</sup> dobuna motamotana eḡa ita irairaḡe ma ai eḡa ita bobo.

<sup>49</sup> Au Tauvotaḡotaḡo anataputapui, ai araratane i bogai.

<sup>50</sup> "Nia i ai lam viaiainana aubaina. Ma mēpa da i tomatoma, mena ma vidagiane. Nia au orami ina mae ma ona viturana vivira!"

## 10

*Iesu, tavine vilamonana i babaniei*

<sup>1</sup> Ma Iesu, dobuna i netawane ma i nae Judea ana paratana. Ma Waira Jordan i damani da au baba ḡelauna. Patara ḡaeḡaena i riana-melei. Ma Iesu i viararamana, me mara patapatana i kaukauei nanare.

<sup>2</sup> Ma Pharisi ḡelau i ḡoei da tauna ita waroi. Ma lamna aubaina i vitara-virevirei, "Tarawatu e mamae bo eḡa da rava, awana maiteni ita vilamonei?"

<sup>3</sup> Ma Iesu i paribelei, "Moses ana Tarawatu aiwai e ririwei?"

<sup>4</sup> Ma tau i riwa, "Moses ana Tarawatu e ririwa da oroto vilamona pepana ina girumi ma awana ina verei. Ma tau i na vilamonei."

<sup>5</sup> Iesu i paribelei, "Taumi orami i bada. Au baina Moses wei Tarawatuna i terei.

<sup>6</sup> †Wate ona notai da au karena, maranai God rava i kauēi ma tauna oroto ma wavine i kauēi.

<sup>7</sup> †Ma lamna aubaina oroto amana ma alona ina netawane

<sup>8</sup> ma awana maiteni ina vitagogi da tau eḡa ruaḡa me au naona ma tupua tagogi.

<sup>9</sup> God aiwai i vitagogiei, eḡa aiāi ina vilamonei."

<sup>10</sup> Maranai tau i naeme au numa, ma tauvotaḡotaḡo, Iesu i vitara-virevirei wei kauai aubaii.

<sup>11</sup> Iesu i paribelei, "Mēpa da oroto, awana i voterei. Ma wavine ḡelauna i ravaḡi. Lamna tauna, awana awarina i rauviapoapoe.

<sup>12</sup> Ma nanarena mēpa da wavine, awana i voterei ma oroto ḡelauna i ravaḡi. Lamna awana, awarina i rauviapoapoe."

‡ 9:43-44: Wariḡa nimaiei i giruma damane i tau riwana tagogina me vs 48.

‡ 9:45-46: Wariḡa nimaiei i giruma damane i tau riwana tagogina me vs 48.

☆ 10:6: Gen 1:27 ☆ 10:7: Gen 2:24

*Iesu, roaroa i viaiaini*

13 Rava gēlaui, roaroa i neiāi Iesu awarina da urana au tepai ita terei. Ma ana tauvotaḡotaḡo, ravai i viḡaei.

14 Maranai Iesu wei kauai i 'nanai. Ma ana tauvotaḡotaḡo i eni ma i riwa, "Roaroa ona voterei da awariu ina nei. Ma eḡa ona viḡaei. Au baina God ana vigulau, lamna rava wenanare aubai me wei roaroai.

15 A ririwana-kauemi. Aiai, God ana vigulau eḡa ina vaia me tevera aburuna nanare. Tauna, eḡa God ana au vigulau ina rui."

16 Ma roaroa i taravaini ma i rapai, urana au tepai i terei, i raupari ma i viaiaini.

*Purapura ravana*

(*Matthew 19:16-30; Luke 18:18-30*)

17 Ma maranai Iesu i vomairi da i nenaē. Orotō i ruba ḡeta ma au naona i raudune ma i riwa i pa, "Taugiu vinualaulaunam. Aiwai ana kauei da lawana maemaē-nonoana ana vibuderiei?"

18 Ma Iesu i paribelei i pa, "Aiwai aubaina, tau u vikaua vinualaulauneu? God, tauna ava vinualaulaunana.

19 \*Tam, God ana Tarawatu u aramanei, *Eḡa ma viragēnal Eḡa ma awadanene! Eḡa ma danene! Eḡa ma viwavu-morul Eḡa ma amkwalakwala! Amam ma Alom ma vivirei!*"

20 Ma tauna i riwei, "Taugiu! Maranai tau aburueu da amadodo, wei tarawatui anatapoi a voteletelei."

21 Iesu, tauna i 'nanai ma i vinuavaini ma i riwei, "Kaua tagogi e mamae eḡa uta kaukauei. Ma nae ma am purapura anatapona ma gimarei. Ma manena, rava molamolakai ma verei. Ma au mara God, tam ina vimaiem. Ma ma nei ma ma votaḡotaḡoiu!"

22 Ma maranai oroto wei riwana i nonori. Naona i peu ma ana nuabolana i nae; aubaina tauna, purapura ravana.

23 Iesu i 'nana viravira ma ana tauvotaḡotaḡo awari i riwa, "I piripiri kaua da purapura ravana, God ana au vigulau ina rui."

24 Tauvotaḡotaḡo riwana i baiei maranai Iesu wenanare i babani. Ma Iesu i riwa me, "Natunatu! I piripiri kaua da purapura ravana,\* God ana au vigulau ina rui.

25 I telatela kaua da ḡamoḡamo ḡaeḡaena wavana kamel, iḡoma au gavogavona ina rui. Ma i piripiri guratana da purapura ravana, ana lawana God ina verei. Ma God, tauna ina vibadei."

\* 10:19: Exo 20:13; Exo 20:14; Exo 20:15; Exo 20:16; Exo 20:12  
riwana buka gēlaui awarii e mamae ma gēlaui eḡa *purapura ravana*.

\* 10:24: Wei

26 Tau i vinuanaina ma ai nota i kwa. Ma tau i ava i babani vivira i pa, “Mepa da nanare; amapo aiai lawana mamae-nonoana ina vaia?”†

27 Iesu awarii i ’nana ma i riwei, “Rava awarii wei kauai i piripiri. Wate ega God awarina. God awarina aiwai anata-puna i telatela kaua.”

28 Ma Peter i riwei, “Ma tauai menanare? Tauai ai purapura a voterei ma tam a votaḡoim.”‡

29 Iesu i paribelana, “A ririwana-kauemi. Aiai da ana numa bo varevareina bo novunovuna bo alona bo amana bo natunatuna bo ana wapu ina voterei ma tau ina votaḡotaḡoiu; tau ma Riwana Aiaina aubaina.

30 Tauna ana maia ina rata kaua wei au dobuna. Tauna ana maia ina viaitepatepani da ana numa, varevareina, novunovuna, alona, natunatuna ma ana wapu, anata-pui ina maḡa. Rava ina rau-iviapoapolem; aubaina tam, tau au Tauvotaḡotaḡo da mara au murina tauna lawana mamae-nonoana ina vaia.

31 Wate maḡamaḡai marina e vivinao; tau i ina vimuri. Ma maḡamaḡai da e vivimuri; ina vinao.”

*Iesu ana iraḡe babanina i vitonui*

*(Matthew 20:17-19; Luke 18:31-33)*

32 Iesu, ana tauvotaḡotaḡo maiteni i ḡeḡae au Jerusalem. Iesu, tau i au naoi i nena. Tauvotaḡotaḡo i baiei. Ma rava ḡelau i au muri i nenei i rovo kaua. § Ma tau i 12 i rauḡorei au ririva ma i raukarei da kaua amapo da awarina ina tupua; tau i vieḡei

33 I pa, “Ona inana, tauta ta ḡeḡae au Jerusalem. Ma Rava Natuna ina verenei pirisi babadai; ma tarawatu babadai awarii. Ma tau i ana iraḡe ina vianinei. Ma Mai Jentail ina verei.

34 Ma tauna ina vijiboḡi ma ina ovai ma ina kwapui ma ina viraḡeni. Au pom vitonuina ina vomairi me.”

*James ma John ai vibaḡa*

*(Matthew 20:20-28)*

35 - Zebedi natunatuna James ma John i nei Iesu awarina ma i vibaḡai i pa, “Tauviararamana! Tauai ai ḡoana a vivibaḡei uta kauai.”

36 Iesu i riwa i pa, “Aiwai o ḡoeḡoei ana kauai aubaimi?”

37 Tau i paribelana, “Ma verelai da ana kiala, tagogi au oiem ma ḡelauna au kelakelaum am au vigulau.”

† 10:26: Mai Jew i notai da rava vipurapurai lamna BADA ana verena ana nu-avaina matairana, tau i e notai da BADA, rava vipurapurai ega ina gagaloei, tauna ravai ḡelau maiteni ega ina gagaloei. ‡ 10:28: Peter i ḡoei da ita aramanei da

tauvotaḡotaḡo ai au iraḡe maiana aiwai, ina vaia. § 10:32: Iesu i ḡeḡae au Jerusalem ma rava maḡamaḡai i viḡaviei ma lamna aubaina ana tauvotaḡotaḡo i baiei da tauna tepana i tora da weka i nena. Rava ḡelau i votaḡotaḡo, tau i rovo kaua da aiwai awarina ina tupua maranai i ḡeta au Jerusalem.

38 Iesu i paribelei, “Taumi eḡa ota aramanei aiwai o vivibaḡei! Iniviara kelakana ana umai. Taumi tagotagogina da ona umai bo? Tagotagogina ona babataito me tau ina babataitoui?\*

39 I paribelei, “Tauai tagotagogina!”

Iesu i riwei, “Iniviara kelakana anina ona umai ma ona iraḡe me tau ana iraḡe.

40 Wate tau au rewapana eḡa ita mamae da ana veremi da mepa ona kiala au oieu bo au kelakelau. God, rava i vinevinei; tau ai gabu i vokaukauei.”

41 Maranai Tauvotaḡotaḡo 10 ḡelau, wei riwana i nonori. Tau James ma John awarii i ḡaiawa.

42 Ma Iesu, tau anatapui i ḡorei da awarina ma i riwei, “O aramanei da jentail ai babada, dobu ḡela ravai jentail awarii e mamae-ḡaeḡae ma e rarau-iviapoapelei. Wate tau ai babada ḡaeḡaei, ai rewapana i ḡetelera da ai rava e vibadebadei da ai ḡoana e kaukauei.

43 ✨Wate au tauvotaḡotaḡo eḡa nanare. Eḡa da aiai i ḡoei da ina ḡetelera taumi au poumi; tauna anina da ina vitaunola.

44 Aiai i ḡoei da ita vinao. Tauna ina vitaunola rava anatapui aubai.

45 Ma nanare Rava Natuna eḡa ita nei da tauna, tana nolei. Wate ita vitaunola rava aubaii. Ma ana lawana ita verenei da rava maḡamaḡau ai lawana ita gimara-melei.”†

*Iesu, rava mata-potapotana Batimeus i vilawani  
(Luke 18:35-43)*

46 Ma tau i ḡeta au Jeriko. Iesu, ana tauvotaḡotaḡo, patara ḡaeḡaena maiteni dobuna i opuopu-tawanei. Ma oroto mata-potapotana, wavana Batimeias, Timaeus natuna au etanai i kiakiala ma i viamgigimana.

47 Maranai i nonori da tauna, Iesu Nasaretei; garara i raukarei i pa, “Iesu, tam David natuna! Ma raunu’apoapeleu!”‡

48 Rava maḡamaḡau, tauna i rai ma i riwei da ita genuana. Wate tauna, garara i voguratei, “David Natuna! Ma raunu’apoapeleu!”

49 Iesu i tumairi ma i pa, “Ona ḡoreiai!”

\* **10:38:** ...babataito me tau ina babataitoui tau i iniviara ma iraḡe e bababaniei, maranai Iesu au Gethsemani i raraupari muriai da ana iraḡe tauna ana nuabolana kelaka i babaniei (Mrk 14:36). Iesu, James ma John i riwei da nuabola ina nelaḡai.

✨ **10:43:** Mrk 9:35 † **10:45:** Iesu i vinuapoapoe ma iraḡe aubaita me Isaiah i girugirumia nanare au Isa 52:13-53:12. ‡ **10:47:** Maranai oroto mata-potapotana Iesu i kwatuei David natuna ma mai Jew i aramanei Keriso - BADA ana vinevine i babaniei. Mai Jew i aramanei da Keriso ai wavalatona me David wariaga nanare. Ma i nei da rava doridoriai ita vilawani me. (Sal 89:3-37 Isa 29:18-19 & 35:5-6 Jer 23:5-6 Ezk 34:23-24)



Anina tau, mata-potapotana i ḡoreiai i pa, “Tepam ina tora ma ma vomairi! E ḡoreḡorem!”

<sup>50</sup> Tauna, ana puru i tawanei ma i vomairi laḡilaḡina ma i nei Iesu awarina.

<sup>51</sup> Iesu i paridadana i pa, “Aiwai u ḡoei ana kauai aubaim?”

Mata-potapotana i paribelei, “Tauviararamana! A ḡoei da ana inana me.”

<sup>52</sup> Iesu i riwa, “Ma nae! Am tumaḡana i vilawanim.” Maratagoga tauna i nana me ma Iesu au eta i votaḡotaḡoi.

## 11

*Iesu i rui au Jerusalem*

*(Matthew 21:1-11; Luke 19:28-40; John 12:12-19)*

<sup>1</sup> Ma maranai Jerusalem i tuḡereḡerei ma i rui au Betphagi ma Bethani\* au ola *Olives*. Ma ana tauvotaḡotaḡo ruaḡa i paritawanei,

<sup>2</sup> ma i riwei i pa, “Ona nae au melagai au naomi. Maranai o ruirui, kampa *donki* natuna ḡaubo, raḡiraḡitana ona nelaḡai. Tauna eḡa aiai ita geru-dadanei. Ona rupeni ma ona neiai.†

<sup>3</sup> Mepa da aiai ina paridadana, ‘Aiwai aubaina wei o kaukauei?’ Ona riwei, ‘BADA e ḡoeḡoei ma maratagoga ina paritawana-melei.”

<sup>4</sup> Ma i nae ma *donki* ḡaubona au doa au metaeta raḡiraḡitana i rupeni.

<sup>5</sup> Rava ḡelau i kampa i maimairi i paridadana i pa, “Aiwai o kaukauei *donki* ḡaubona o ruperupeni?”

<sup>6</sup> Ma i paribelei me Iesu i ririweia nanare ma tau i voterei da i nae.

<sup>7</sup> Tau *donki* i neiai Iesu awarina ma ai puru au uporana i tawana-epai ma au tepana Iesu i kiala.

<sup>8</sup> Ma rava maḡamaḡau, ai puru au eta i ebani ma ḡelau, ai rugurugu i taratarai i ebani.

<sup>9</sup> Tau i vivinao ma tau i muri i nenei i garara:

“Hosanna!”‡

“Viviaiainana tauna BADA au wavana e nenei!”

<sup>10</sup> “Viviaiainana amata David ana viḡulau e nenei!”

“*Hosanna* au aidamo telarana!”

<sup>11</sup> Iesu i ḡeta au Jerusalem ma i rui au Tempol ma anapuna i tuvireirei ma au i biga aubaina, i opu me au Bethani, tau 12 maiteni.

\* **11:1:** Eng. *Bethphage & Bethani*. † **11:2:** Mai Jew awari, *donki lamna nola aubaina ma eḡa gulau ana anigeru*. *Donki i gerui lamna e ririweta da tauna gulau ana nuaubana ma vilamolamonana i nei*. ‡ **11:9:** Lamna pona Aram anona ma vilawaniai ma muriai lamna vieḡulau ma vimae-ḡaeḡaena aubaina.

*Iesu, damala aina i parivai-irairaḡeni  
(Matthew 21:18-19)*

<sup>12</sup> Ma marana i tom, tau Bethani i opu-tawanei ma Iesu am-iraḡe.

<sup>13</sup> Au weia ma damala aina i 'nanai ana ruguruguna. Ma i nae da ita inanai da i ua bo eḡa. Maranai kampa i ḡeta, eḡa aiwai ita nelaḡai. Anina ai ruguruguna ava, aubaina eḡa damala ana mara.

<sup>14</sup> Iesu, damala aina i riwei i pa, "Eḡa aiai amadodo ma amapo anom ina am-melei!" Ma ana tauvotaḡotaḡo i nonori aiwai i latoni.

*Iesu, taugimara tempolei i viaḡaḡana-opunei  
(Matthew 21:12-17; Luke 19:45-48; John 2:13-22)*

<sup>15</sup> Maranai tau i ḡeta au Jerusalem, Iesu i rui Tempol garina au orana ma taugimara i viaḡaḡana-opunei, mane tauviraina§ ai kepakepa ma gabubu taugimareina ai anikiala i vitauvirai.

<sup>16</sup> Ma i viḡaei da eḡa aiai ana gimara Tempol au orana ita avarai-naiei.

<sup>17</sup> \*Ma rava i viararamani i pa, "I girugirumia nanare, 'Au numa ina ḡorei pari numana dam anatapui au dobu aubaii.'

Wate taumi o vovirai da kwalakwalai ai guba."\*

<sup>18</sup> Pirisi Babadai ma tarawatu Babadai i nonori ma i ogei da ita viraḡeni. Tau, Iesu i roveoi aubaina patara ana viararamana i baiei.

<sup>19</sup> Ma au bigai Iesu ana rava, Jerusalem i opu-tawanei.

*Damala aina i poi  
(Matthew 21:20-22)*

<sup>20</sup> Ma ubaubanai tau i nena ma damala aina i 'nanai anatapuna i poi.

<sup>21</sup> Peter i notai ma i riwa "Tauviararamana ma inana! Damala aina u parivai-irairaḡenia i poi."

<sup>22</sup> Iesu i paribelei, "God ona vitumaḡanei!

<sup>23</sup> A ririwana-kauemi. Rava wei olana ita riwei, 'Ma vomairi ma au boga ma tawanem!' Ma nuanuana eḡa ina raḡaraḡa ma ina vitumaḡana da aiwai e ririweia, ina tupua.

<sup>24</sup> Lamna aubaina a ririwemi. Aiwai ami au pari o vibaḡei, ona vitumaḡana da taumi boiboḡi o vaia ma ina viḡarimiei.

---

§ 11:15: Mai Jew ai au nota da mai Rome ma mai Greek aruai mane au tepana i terei, wei mai Jew awari lamna god morumoruna. Mane tauviraina au Tempol mane dobu ḡelau i virai da Tempol mane wei lamna Jew tarawatu i vianinei gimara au Tempol aubaina (Exo 30.13). ☆ 11:17: Isa 56:7 \* 11:17: Iesu dobuḡela manena tauviraina ma gimara ravai i viwavui da tau pari numana i vovirai da amkwalakwalai ai guba, tau rava ai arua nolana e viviaopoepoeni Jer 7:11-15.

25 Ma maranai e raraupari, au naona rava anapui ai ġo'apoapoe awarim ma nota-tawanei. Ma nanare amam au mara am ġo'apoapoe ina nota-tawanei.”†

*Jew babadai, Iesu ana vibadana i vitarapiriei  
(Matthew 21:23-27; Luke 20:1-8)*

27 Tau i nememei au Jerusalem ma Tempol au orana i bababara. Ma Pirisi Babadai, Tarawatu Babadai ma dogadogara i nei Iesu awarina.

28 Ma i paridadanei i pa, “Aiwai vibadanei wei kauai e kaukauei? Aiai vibadana i verem da wei kauai uta kauai?”

29 Iesu i paribelei i pa, “Au vitaraviravira tagogi ana terei ma ona paribeleu. Ma ana riwemi; aiwai vibadanei wei kauai a kaukauei.

30 Aiai, John taubabataito vibadana i verei da rava ita babataitoi, God bo rava? Ona riweu!”

31 Tau i vitarapiri vivira, “Mepa da tana riwa, ‘Godei.’ Tauna ina riwa, ‘Ma aiwai aubaina eġa ota vitumaġanei?’

32 Wate eġa tana riwa da, ‘Ravei.’ Tau rava i rovoei, aubaina rava anapui, ai nota da John anina peroveta.

33 Ma i paribelei, “Tauai eġa ata aramanei.” Iesu i riwa, “Tau nanare eġa ana riwemi aiwai vibadanei wei kauai a kaukauei.”

## 12

*Tauipi ai awanaina*

*(Matthew 21:33-46; Luke 20:9-19)*

1 \*Iesu i vikarei ma awanainei awari i babani i pa, “Mara tagogi oroto, ana wapu i kauai ma grape i paewi\* ma i gari ma grape anigudana ma violaġa numana i voai. Ma tauipi ġelau i verei da ita nolei tau anapui aubai. Ma i vaġai au dobu ġela.

2 Tuaruta ana mara i ġetai ma taniwaga, ana taunola i paritawanei tauipi awarii da ana ġuta ita vaia.

3 Wate tauipi, tauna i vojijini ma i kwapui ma kwakwavina i paritawanei.

4 Ma taniwaga, taunola ġelauna i paritawanei. Ma tau, kolana i viaibauni ma i vitepaubaubai.

5 Ma taunola ġelauna i paritawanei ma tauna i viraġeni ma i maġa ġelau i paritawanei, ġelau i kwapui ma ġelau i viraġeni.

6 Ma tagogi ava e mamae da ina paritawanei. Lamna natuna orotona tagotago ana nuavainana. Ma tauna au murioina i paritawanei ma i pa, ‘Tau, natu ina vivirei.’

† 11:25: Riwa wadubo nonoana uraiei i girugirumia vs 26 weka eġa ita mamae, Mepa da rava ai apoapoei eġa ma nota-tawanei, amam au mara nanare am apoapoei eġa ina nota-tawanei. ☆ 12:1: Isa 5:1-2 \* 12:1: Parivainota wadubona, God au anapuna Israel e bababaniei me tauna ana grape wapuna, me Isa 5:1-2.

7 Wate tauī, tauna i 'nanai ma i riwa vivira i pa, 'Wei taniwaga natuna. Ona nei, tana viraḡeni ma ana buderi ina viḡaritaiei!

8 Ma i vunui ma i viraḡeni ma tupuana wapuei i tawanana-opunei.

9 —Wapu taniwagana marina aiwai ina kauēi tauī awarii? Tauna ina nei ma tauipi ina viraḡeni ma grape wapuna ina veredamanei tauipi ḡelauī awari.

10 Wei girumana o iavi bo eḡa?

'Wei ḡaimana, tauvoa i geduaiei,  
wate muriai i nelaḡai da tauna ḡaima kaua.

11 Wei lamna, BADA ana kaua  
ma inanana i vinualaulauna." (Psalm 118:22-23)

12 Jew babadai i aramanei da awanaina lamna tauī i bababaniei ma i ḡoei da ita pani. Wate tauī patara i rovoei, lamna aubaina Iesu i voterei ma i nae.

Caesar awarina tax tana terei bo eḡa?

(Matthew 22:15-22; Luke 20:20-26)

13 Ma Pharisi ḡelauī ma Herod ana rava ḡelauī i nae Iesu awarina da riwei ita waroi.

14 Tauī i nei ma i riwa, "Tauviararamana, tauai aramanei da tam rava jijimanim. Ma rava wavai naenaei ma rava labalababa eḡa uta vibainaenaei ma anatapui e vaivaia da tagogi. Wate tam God ana babani riwa kauēi e viararamani. Ma riwelai tax tana terei Rome gulauna wavana Caesar† awarina, i aii bo eḡa?"

15 Wate Iesu, ai moru i 'nana-bauni ma i riwei, "Aiwai aubaina o raudadaniu? Mani tagogi ona neiai da ana inanai!"

16 Denarius tagogi i neiai Iesu awarina ma tauī i vitara-virevirei, "Wei aiāi aruana ma wavana?"

I paribelei, "Caesar."

17 Iesu i riwa, "Aiwai Caesar ḡarinei, Caesar ona verei. Ma aiwai God ḡarinei, God ona verei!" Ma tauī i baiēi.

Sadusi ḡelauī, Iesu i vitara-virevirei irairaḡelei vomairina aubaina

(Matthew 22:23-33; Luke 20:27-40)

18 ✱Mai Sadusi ai vitumaḡana da rava eḡa ita vovomairi-me maranai e irairaḡe.‡ Anina ma ḡelauī i nei Iesu awarina ma i paridadanei,

19 "Tauviararamana! God ana tarawatu, Moses wenanare i girumi: Mepa da oroto i'raḡe ma kaiababana i netawanei

† 12:14: Sisa. ✱ 12:18: Act 23:8 ‡ 12:18: Sadusi tauī gulagulau ma rava ḡaeḡaei mai Jew ai giu babadai tauī maiteni eḡa ita vitumaḡana da anela bo arua ḡelauī e mamae ma buka 5 i vinoa, Moses i girugirumia, tauī lamna ava e vitumaḡaneī (Karena, Exodus, Leviticus, Numbers, Deuteronomy). Ma eḡa buka ḡelauī. Wate Moses ma BADA riwaiēi tauī i viatataiei da lawana e mamae iraḡe au murina.

ma eġa natunatui. Oroto vareina kaiababana ina ravaġi ma roaroa ina ġuni vareina aubaina.

<sup>20</sup> Mara tagogi varevarei seven i mae. Ma natuevou i tavine ma eġa natunatuna ma oroto i 'raġe.

<sup>21</sup> Vareina viruaina kaiababa i ravaġi ma tauna maiteni eġa natuna ma i 'raġe. Ma nanare vareina vitonuina.

<sup>22</sup> Ma nanare anatapui seven, wavinena i ravaġi ma eġa natunatui. Au muriai wavine i'raġe.

<sup>23</sup> Anatapui seven, wavinena i ravaġi. Vomairi me au marana, lamna aiai awana?"

<sup>24</sup> Iesu, tau i riwei, "Aiwai Moses i girumi ma God ana rewapana eġa ota aramanei.

<sup>25</sup> Maranai tau i raġelei ina vomairi, tau i eġa ina tavine bo ina vitavinei. Wate ina mae me anela au mara.

<sup>26</sup> ✧Ma rava iragelei ai vomairi babanina, Moses ana tarawatu eġa ota iavi bo? Mepa ai i ararata lana, kampa God Moses i riwei: *Tau Abraham ana God ma Isaac ana God ma Jacob ana God.*

<sup>27</sup> Tauna eġa rava irairagei ai God, wate rava lawalawai ai God. Taumi o moru kauga!§"

### *Tarawatu ġeġetelarana*

*(Matthew 22:34-40; Luke 10:25-28)*

<sup>28</sup> Ma tarawatu badana tagogi i nae ma ai vitarapiri i nonori. Ma i nonori da Iesu i babani kauga, lamna aubaina tauna i vitaraviravira, "God ana tarawatu metauna i ġetelara?"

<sup>29</sup> ✧Iesu i paribelei, "Ġeġetelarana tagogi lamna wei: *Ona rautaniġana Israel!* BADA *ata God, tauna ava BADA.*

<sup>30</sup> BADA *ami God nuanuami ina vaia orami anatapunei ma aruami anatapunei ma ami nota anatapunei ma ami rewapana anatapunei!*

<sup>31</sup> ✧Ma viruaina lamna wei: *Rava ġelau i nuanuam ina vaia me tam nuanuam e vaivai-melei!* Wei tarawatui ruaġa i ġetelara, eġa me ġelau i nanare."

<sup>32</sup> Tarawatu badana i riwa, "Tauviararamana u babani kauga! Riwa kauga u babaniei, BADA *Tauna ava God ma eġa mepa ġelauna.*

<sup>33</sup> Ma *nuanuami ina vaia orami anatapunei ma ami nota anatapunei ma ami rewapana anatapunei.* Ma, *Rava turam nuanuam ina vaia me tam nuanuam e vaivai-melei.* Wei tarawatui ruaġa lamna i ġetelara, eġa me pulo apuapunana bo pulo ġelau."

---

✧ 12:26: Exo 3:6 § 12:27: ...wate rava lawalawai ai God. Mepa da BADA i riwa da tauna Abraham ma Isaac ma Jacob ai God, tau i lawalawai maranai BADA, Moses awarina i babani. ✧ 12:29: Deu 6:4-5 ✧ 12:31: Lev 19:18

<sup>34</sup> Iesu i 'nanai da tauna i paribelana kaua ma i riwei, “Tam, God ana vigulau au gēregerena e gēgeta.” Ma ega aiai tepana ita tora da Iesu ita vitara-viravirana-melei.

*Keriso tauna aiai?*

*(Matthew 22:41-46; Luke 20:41-44)*

<sup>35</sup> Maranai Iesu au Tempol i viararamana ma i vitara-viravira i pa, “Aiwai aubaina Tarawatu Babadai e ririwa da Keriso tauna David natuna?”

<sup>36</sup> ☆ Arua Vivivireina, David nota i verei ma tauna i riwa:

‘MAMAE-NONOANA au gulau i riwei,

*Au oieu ma kiala*

*da am gavia*

*au ae karem da ma tuvaidoedoei.’*

*(Psalm 110:1)*

<sup>37</sup> —David, tauoina wei gulauna i gōrei bada. Ma menanare da badana lamna, David natuna?” Patara gāeāena riwana i nonori ma i vinuaiai.

*Iesu, Tarawatu Babadai ai kaua i babaniei*

*(Matthew 23:1-36; Luke 20:45-47)*

<sup>38</sup> Ma Iesu, tau i viararamani i pa, “Tarawatu babadai ona rovoei. Ai gara manamanai ma e bababara nae au deba da rava tau i vivivirei.

<sup>39</sup> Tau i anikiala vinevinei pari au numana ma au torela, gabu aiaii e vaivaia.

<sup>40</sup> Tau i, kaikaiababa e morumorui ma ai numa e kwalekwalei, e morumoru ma e raraupari-vai-manamanawa. Tau i ai kovoāa ina apoapoe guratana.”

*Kaiababa ana pulo*

*(Luke 21:1-4)*

<sup>41</sup> Ma Iesu, pulo aniterenana au baba gelauna i kiala ma rava i 'nanaanai mane i tereterei. Rava ma gāma gāui vivimanei, mane ma gāma gāui i terei.

<sup>42</sup> Wate kaiababa molamolakana i nei ma mane muomuoi ruaāa i terei, ruvana i aburu kaua.

<sup>43</sup> Ana tauvota gōta gō i gōrei ma i riwei, “Anina a ririwemi, wei kaiababa molamolakana i tere-guratei, ega me tau i gēlaui.

<sup>44</sup> Tau i gēlaui ai maurei i verena, wate wei kaiababa molaka ma gārinei anatapuna i terei, ana anilawana anatapuna.”

## 13

*Iesu i riwa da rava God ana Tempol ina rikai*

*(Matthew 24:1-2; Luke 21:5-6)*

<sup>1</sup> Iesu, Tempol i nene-tawanei ma ana tauvota gōta gō tagogi i riwa, “Tauviararamana! Numa i vigulau gāga ma numa gāimai i rata gāga.”

<sup>2</sup> Iesu i paribelei, “Wei numai gāeḡaei u inanai, eḡa ḡaimai tagogi, turana au tepana ina mae. Ḡaima anatapui ina rikai.”

*Rava ina vinuapoapoe kaua. Iesu ana tauvotaḡotaḡo ina vipatutu*

*(Matthew 24:3-14; Luke 21:7-19)*

<sup>3</sup> Iesu i kiakiala au ola *Olives*, Tempol au navanavaḡela ma Peter, James, John ma Andrew i nei ma i vitaraviravirana govaḡei

<sup>4</sup> i pa, “Ma riwelai mara aiwai wei kauai ina tupua? Ma aiwai ina vimataira da wei kauai anatapui ina tupua?”

<sup>5</sup> Iesu, tau i riwei, “Ona inana kaua da eḡa aiwai ina terevaideḡaimi!

<sup>6</sup> Rava maḡamaḡai, wavauei ina nei ma ina riwa, “Tau Keriso tauvilawana!” Ma rava maḡamaḡai ina terevaideḡai.

<sup>7</sup> Ma maranai viḡavia ona nonori ma viḡavia aueia riwana ona nonori; eḡa ona rovo! Wei kauai anina da ina tupua, wate wei eḡa damona.

<sup>8</sup> Dam, damai ina viḡavia vivira ma dobu, dobuai ina viḡavia vivira. Ma lolo ma gomara dobu au anatapuna. Wei kauai, lamna me wavine ana iniviarā e vivikarei maranai e vivinatuna.

<sup>9</sup>—Ona inana kaua! Taumi ina panimi ma ina etaremi ma pari numana au orana ina kwapuimi. Ma gavena ma gugulau au naoi ona mairi, aubaina taumi o votaḡotaḡoiu. Ma tau awarii, Riwa Aiaina ona raugugulei.

<sup>10</sup> Riwana Aiaina ona raugugulei rava anatapui awari ma muriai damona ina nei.

<sup>11</sup> Ma maranai i panimi ma i etaremi. Eḡa ona vinuabola da aiwai ona latoni. Aiwai riwana God i veremi, lamna ona latoni. Aiwai o latoni lamna eḡa taumi ota babani, wate Arua Vivivireina.

<sup>12</sup> Rava, vareina ina verenei da ina viraḡeni. Ma ama, natunatuna ina verenei da ina viraḡeni. Ma roaroa, amamai ma aloloi ina viḡaviei da ina iraḡe.

<sup>13</sup> Rava anatapui ina geduaiemi tau aubaiu. Wate aiwai da e maimairi-jijina da au damona, tauna ina lawana.”

*Iniviarā gaeḡaena ana mara*

*(Matthew 24:15-28; Luke 21:20-24)*

<sup>14</sup> “Maranai ‘Kaua apoapoe kaukauana’\* e maimairi mepa avena ita mairi. (Buka tauivana wei ina aramanei anona aiwai). Tau aiavo i Judea ina ruba laḡilaḡina au ola.

<sup>15</sup> Aiwai numa au tepana eḡa ina ḡaira bo ina rui au numa da aiwai ina vaia.

<sup>16</sup> Aiwai au wapu eḡa ina naeme au numa da ana gara ina vaia.

\* **13:14:** Eng. *Abomination of Desolation* Dan 9:27 11:31 & 12:11

17 Ma iniviara ġaeġaena, waivine duaduamai ma tau i da e viviġuġu awari nai au marana!

18 God awarina ona raupari da wei kauai eġa au bodu ina tupua.

19 ✨Ma nai au marana amapo iniviara ġaeġaena. Ma maranai God dobu i kau i, iniviara ġaeġaena eġa nanare ita tupua ma amapo eġa nanare ina tupua me.

20 Wate BADA nai marana ina vitupoi. Mepa da eġa ina vitupoi, rava anatapui ina iraġe. Wate rava, tauna ana vinevine ina vilawani lamna aubaina mara ina vitupoi.

21-22 —Muriai keriso tauvilawana morumorui ma peroveta morumorui ina nei ma mataira ma kua babai ina kau i ma ina kauana dadanei da God ana vinevine maiteni ita terevaideġai. Lamna aubaina mepa da ai ai ina riwemi, ‘Ma inana i, Tauvilawana noi!’ bo ‘Tauna noi!’ Nai babanina eġa ona vitumaġane i!

23 Ona inana kua; anatapuna a riwana-nonoemi!”

*Rava Natuna ana nei*

(Matthew 24:29-31; Luke 21:25-28)

24 Iesu wenanare i riwa, “Ma iniviara ġaeġaena au murina.

*Madeġa eġa ina rarana*

*ma nawaravi eġa ina lalai.*

(Isaiah 13:10)

25 *Ma ubona mare i ina peu*

*ma rewapana ġelau i au aidamo ina gui.*

(Isaiah 34:4)

26 ✨—Nai maranana, *Rava Natuna ana rewapanana ma ana borumana apaue i ina nei.*

27 Ma Tauna, ana anela ina paritawane i dobu au anatapuna da rava tauna ana vinevine ina tuarui dobu au damona da dobu ġela au damona.”

*Damala ana awanaina*

(Matthew 24:32-35; Luke 21:29-33)

28 “Damala aina ana awanaina ona aramane i. Maranai ai e numonumoi, lamna ona aramane i da maura e tuturiami.

29 Ma nanare, maranai wei kauai anatapui ina tuputupua, ona aramane i da Rava Natuna i turiai; au metaeta i ġetai.

30 Anina a ririwemi da wei kauai au naona ina tupua ma muriai da rava marina lawalawai i ina iraġe.

31 Mara ma dobu ina amoa. Wate riwau eġa ina amoa.”

*Bada ainelana ana nei i aramane i*

(Matthew 24:36-44)

32 “Ma eġa ai ai ita aramane i nai marana bo madeġa aiwai ina nei. Anela au mara eġa ita aramane i ma Natuna eġa ita aramane i. Amana, tauna ava i aramane i.



33 Ona vineneḡana ma matami ina kala!† Eḡa ota aramanei mara aiwai, wei kauai ina tupua.

34 Wei me rava ana numa i netawanei ma i vaḡai. Ma ana taunola nununai i terei da ita vipaipai ma tagotagogi ava ai nola i verei da ita kauai. Ma tauvineneḡana i riwei da ita vineneḡana.

35 Ona vineneḡana! Eḡa ota aramanei mara aiwai, numa taniwagana e nenei; mepa da au bigai bo au nubautuva bo maratomtomi bo ubaubanai.

36 Ma eḡa matamatavemi ina nelaḡaimi.

37 Aiwai riwana a ririwemi, riwana tagogina rava anatapui a riwei, ona vineneḡana!”

## 14

*Jew ai babada, Iesu i ogei da ita viraḡeni*  
(Matthew 26:1-5; Luke 22:1-2; John 11:45-53)

1 ✨Au pom ruaḡa muriai da Raḡona ma Palawa Bagibagina torelai,\* Pirisi babadai ma Tarawatu Babadai eta i baibaiei da menanare govagovaḡanei Iesu ita vunui.

2 Ma i riwa, “Au torela wei kauai eḡa tana kauai, mepa da viḡaiḡaiawa ḡaeḡaena ina tupua.”

*Wavine, daji ḡabuḡabuna Iesu au kolana i waḡi*  
(Matthew 26:6-13; John 12:1-8)

3 Maranai Iesu au Bethani, Simon i ḡoreḡorei lepeleperana ana au numa i kiala ma i amam. Wavine, wagi wavana alabaster i voai ma i ḡeta ma wagi uana i vogai ma daji ḡabuḡabuna, maiana ḡaeḡaena e ḡoreḡorei *nard*, Iesu au kolana i waḡi.

4 Rava ḡelauai kampa i mamae i ḡaiawa ma i riwa, “Aiwai aubaina daji u vikalokaloei?”

5 Wei dajina ita gimarei 300 *denarii* † ruvana ma manena molamolakai ita verei.” Ma tau, wavine i vienenei.

6 Wate Iesu i riwa, “Ona voterei! Aiwai aubaina o vinuabolai? Tauna, kua aiaina awariu i kauai.

7 Molamolakai awarimi e mamae-nonoa ma ona ḡoei ma tau on voagui. Wate tau awarimi eḡa ata mamae-nonoa.

8 Wavine ana nola i kauai. Tauna, dajiei tupuau i vokaukauana-nonoei vikokoaga aubaina.‡

† **13:33:** Wedau *Evanelia* i girumi, *ma i raupari*, wate buka wadubo nonoana wei eḡa ita mamae, Luk 21:16 kampa ona inanai da e mamae. ✨ **14:1:** Exo 12:1-27 \* **14:1:** *Raḡona (passover)* Exo 12:1 *Palawa eḡa yist maiteni (Unleavened-Bread)* Exo 12:17 & 23:15 † **14:5:** Wei lamna me taubagibagi ana maia madeḡa tagogi aubaina. ‡ **14:8:** Mai Jew ai kua da taubeu dajiei e bulubuloi muriai au kokoaga e tereterei.

<sup>9</sup> A ririwana-kauemi, mepa Riwana Aiaina i raugugulei dobu au anatapui, wei wavinena aiwai i kaukauei ina babaniei, ma eġa nuanuai ina vuru.”

<sup>10</sup> Judas Iskariotei tauna Apasol tagogi, Pirisi Babadai awari i ġeta da Iesu ita vibenabenamei.

<sup>11</sup> Tau i vinuaii kua maranai wei i nonori ma Judas i parivainuaġani da mane ita verei. Ma Judas i 'nana da mepa gavogavo ita inanai da Iesu ita amverenei.

*Iesu ma Apasol, Raġona torelana i ani.*

*(Matthew 26:17-25; Luke 22:7-14, 21-23; John 13:21-30)*

<sup>12</sup> Ma Palawa Bagibagina torela ina vikarei. Maranai sipu orotoi ġauboi e vunuvunui Raġona torelana aubaina. Tauvotaġotaġo, Iesu i paridadanei, “Mepa u ġoeġoei Raġona torelana ana vokaukauei aubaim?”

<sup>13</sup> Iesu, taui ruaġa i riwei ma i paritawanei, “Ona nae au Jerusalem ma oroto, waira wagina e avavarai ona inanai ma ona votaġotaġoi.

<sup>14</sup> Au numana e ruiruiana, numa taniwagana ona riwei, ‘Ai tauviararamana i riwa, “Numa vokaukauana mepa ma au Tauvotaġotaġo maiteni Raġona torelana ana ani?”

<sup>15</sup> “Ma tauna, numa vatavatara ina viatataiemi i vokaukauana-nonoei ma kampa aubaita ona vokaukaua.”

<sup>16</sup> Tauvotaġotaġo i nae au Jerusalem ma i ririweia nanare i nelaġai ma Raġona torelana i vokaukauei.

<sup>17</sup> Au i biga ma Iesu i nei Apasol maiteni.

<sup>18</sup> Tau i kepacepa i amam ma Iesu i riwa, “Anina a ririwemi. Taumi tagogi ina vibenabenameu; tagogi weka maiteni amam.”

<sup>19</sup> Tauvotaġotaġo i vinuabola ma tagotagogi ava i pa, “Eġa tau tapa?”

<sup>20</sup> Iesu i paribelei, “Taumi tagogi weka palawa e vivigaloi au aboma tau maiteni.

<sup>21</sup> Wariaġa i girugirumia nanare, Rava Natuna ina iraġe. Wate aiai da Rava Natuna i vibenabenamei; tauna, kovoġa ġaeġaena ina vaia! I aii da alona avena ita vinatunei.”

<sup>22</sup> Maranai i amam ma Iesu palawa i vaia ma i viegualau, i vogimagimai ma Tauvotaġotaġo i verei ma i riwa, “Ona vaia; wei tupuau.”

<sup>23</sup> Anina ma wine kelakana i vaia ma i viegualau ma i verei da anatapui i umei,

<sup>24</sup> ✧ “Wei tau tarau i toi rava maġamaġai aubai ma au parivainuaġana bagibagina ina vovai-virewapani.

<sup>25</sup> Anina a ririwemi, wine eġa ana uma-melei da maranai God ana rava aubai ana vigulau.”

26 Ma tau i voepaepa welana i ravi ma i ḡae au Ola *Olives*.

*Peter; Iesu ina boviei*

(*Matthew 26:31-35; Luke 22:31-34; John 13:36-38*)

27 Iesu, tau i riwei “I girumi nanare,

God i riwa, ‘*Tauviḡamoḡamo ana viragēni ma sipu ina vilamonei.*  
(*Zekariah 13:7*)

Ma nanare anapapuni ona ruba-tawaneu.

28 Wate au vomairi au murina ana aivinao au Galili.”

29 Peter i riwa, “Mepa da anapapuni ina rubatawanem, wate eḡa tau!”

30 Iesu, Peter i riwei, “A ririwana-kauem da amadodo waguvarai muriai da kokorereko ina tou mara ruaḡa; tam mara tonuḡa ma bovieu.”

31 Wate Peter, ponana i bagibagi ma i riwa, “Avena mepa da tau, tam maiteni ana iraḡe. Eḡa melanai ana bovie!” Ma tau i ḡelau riwana tagogina i latoni.

*Iesu au Gethsemani i raraupari*

(*Matthew 26:36-46; Luke 22:39-46*)

32 Ma au Gethsemani i ḡeta ma Iesu, ana tauvotaḡotaḡo i riwei, “Weka ona kiala ma ana raupari.”

33 Ma Peter, James ma John i taravaini ma nuanuana i raḡe ma nuanuana i bola-kauai.

34 Ma tau i riwei, “Au nuabola i rata kaua au orau da e vunuvunui. Weka ona mae ma ona vineneḡana.”

35 Ma aburuna i verau-nae ma au doa i peu ma i raupari da mepa da tagotagogina, lamna wei marana apoapoen tauna ita netawanei.

36 I riwa i pa, “*Abba* Amau! Aiwai anapapuna tagotagogina tam awarim. Wei kovoḡa kelakana ma vaitawanei. Wate eḡa tau au ḡoana, wate tam am ḡoana.”

37 Ma Iesu i nememei ma tau i tonuḡa rarau-nuavurui i nelaḡai. Ma Peter i riwei, “Simon!Š tam aiwai matavena? Mara aburuna uta vineneḡana bo eḡa?”

38 Ma Iesu, tau i riwei, “Ona vineneḡana ma ona raupari da eḡa au raelara ona peu! Arua e ḡoeḡoei, wate tupua i ḡokokokara.”

39 Ma i naeme ma parina tagogina i raupariei.

40 Maranai i nememei ma i nelaḡai, i matamatave; tau, matai i vitai. Ma tau i eḡa ita aramanei aiwai ita riwei.

41 Mara vitonuina i nene-memei ma tau i riwei, “Taumi amapo ona matamatave ma laumi ina tautau? Anina! Mara i ḡetai, ona inanai. Rava Natuna ina vibenabenamei ḡo’apoapoe ravai au urai.

42 Ona vomairi; tana nae; ona inana! Tauvibenabenameu e nenei!”

*Iesu i pani**(Matthew 26:47-56; Luke 22:47-53; John 18:3-12)*

43 Iesu i bababani ma Judas, tauna ana Tauvotaḡotaḡo tagogi i ḡetai. Tauna, patara ana apiai maiteni i nei. Pirisi Babadai ma Tarawatu Babadai ma dogadogara, wei ravai i paritawaneiai.

44 Muriai da Iesu awarina ita ḡeta; Judas, patara ai mataira i verei, “Orotona ana vigia laḡolaḡonei; nai tauna. Ona pani ma ona naiei ma ona inana-kauei!”

45 Maranai Judas i ḡeta ma i nae Iesu awarina ma i riwei, “Tauviararamana!” Ma i vigia-laḡolaḡonei.

46 Ma tau, Iesu i vojijini ma i pani.

47 Ma tagogi kampa i maimairi, ana sword i taina-lavui ma Pirisi ḡeḡetelarana ana taunola tanigana i borituini.

48 Ma Iesu, tau i riwei, “Taumi ana apiami o nei da ota panu bo, apamina tau amkwalakwalau?”

49 Marana patapatai taumi maiteni ta mamae au Tempol ma a viararamana ma eḡa ota panu. Ma i girugirumia nanare, ina tupua.”

50 Ma Tauvotaḡotaḡo anapui, Iesu i voterei ma i ruba-tawane. i.

51 Ma laraga tagogi, i vikareko ma Iesu i votaḡotaḡoi. Tau i ḡoei da ita vojijini,

52 wate ana kareko i vojijini ma tauna ana kovakovana i ruba.

*Tau, Iesu i etarei.**(Matthew 26:57-68; Luke 22:54-55, 63-71; John 18:13-14, 19-24)*

53 Ma tau, Iesu i naiei Pirisi Ḣeḡetelarana. Pirisi Babadai, dogadogara ma Tarawatu Babadai mepa i vitagogieiana.

54 Ma Peter i votaḡotaḡo da Pirisi Ḣeḡetelarana ana numa. Ma ana au debadeba, purusimani maiteni i kiala ma i viviairara.

55 Pirisi Babadai ma mai Jew ai boru ḡeḡetelarana,\* Iesu ana apoapoe i baiei da ita viraḡeni; ma i baiana-avei.

56 Matamata maḡamaḡau, Iesu i viwavu-morumoruei, wate ai viwavu taputapunei ava.

57 Ma ḡelau i vomairi ma wei wavuna morumoruna i kauei Iesu awarina,

58 “Tauai a nonori tauna i riwa, ‘Wei tempolna i voavoai. Tau ana rikai ma au pom tonuḡa au murina, Tempol ḡelauna ana voai ma lamna eḡa rava ita voai.”

59 Wate nanare ai viwavu taputapunei ava.

\* 14:55: Mai Jew e ḡoreḡorei *Sanhedrin*.

60 Pirisi ġeġetelarana i mairi tau i au naoi ma Iesu i vitara-virevirei, “Wei ravai e viviwavuim ma eġa aiwai ma paribelei bo?”

61 Ma Iesu i genuana ma eġa ita paribelei.† Ma Pirisi ġeġetelarana i vitaraviravirana-melei, “Tam Keriso tauvilawana bo? Viviaiainana Natuna bo?”

62 ✠Iesu i paribelana, “Tau tauna! Ma *Rava Natuna ona inana, Vivirewapanana au oiena ina kiala ma mara ladanei ina nei.*

63 Pirisi ġeġetelarana, amlona i ġaiġai ma ana gara i sikai ma i riwa, “Aiwai aubaina matamata ġelau tana ġoei?”

64 Taumi, vijiboġa o nonori ma ami nota aiwai?”

Tau i anapui i riwa, “Tauna ana ġo’apoapoe aubaina anina da ina iraġe!”

65 Ma ġelau i raukarei ma Iesu i ovai ma naona i purui; i raunavanavai ma i riwei, “Ma pariverelai, aiai i ravim!” Ma tau-vipaipai, Iesu i vaia ma i vunui.

*Peter; Iesu i boviei*

*(Matthew 26:69-75; Luke 22:56-62; John 18:15-18, 25-27)*

66 Ma Peter au gabaura i mamae ma Pirisi ġeġetelarana ana taunola guguini i ġetai.

67 Maranai tauna, Peter i ’nanai i viviairara; ma i ’nana-tunutunui ma i riwa, “Tam maiteni Iesu Nasaretei, ana tau-votaġotaġo!”

68 Wate tauna i bovi ma i riwa, “Eġa ata aramanei aiwai e bababaniei, a vinuanainei!” Ma i tuopu au metaeta ma [koko-rereko i tou‡].

69 Taunola guguini, Peter i ’nanai ma i raukarena-melei ma rava au ġereġere i maimairi i riwei, “Wei ravana, tau tagogi!”

70 Wate Peter i bovi me.

Mara aburuna muriai, tau i ġereġere i maimairi, Peter i riwana-melei, “Tam anina, tau tagogi; aubaina tam, Galiliei!”

71 Ma Peter i riwa, “God au matana, tau a ririwa kaua, ravana o ririweia a vivinuanainei!”

72 Maratagogi kokorereko i tou mara viruaina ma Peter, Iesu riwana i notai - *Muriai da kokorereko ina tou mara ruaġa, tam mara tonuġa ma bovieu.* Ma Peter i vinuabola kaua ma i tou.

## 15

*Iesu i taravaina-naiei Pilate au naona*

*(Matthew 27:1-2, 11-19; Luke 23:1-5; John 18:28-38)*

1 Ubaubanai boiboġi, pirisi babadai ma dogadogara ma tarawatu babadai anapui i viboru\* ma i vianina da Iesu i pani ma i veredamanei Pilate au urana.

† 14:61: Isaiah i parivereta da Keriso ana au iraġe eġa ina gagaloana-melei. (Isa 53:7).

✠ 14:62: Da 7:13 ‡ 14:68: Wei riwana buka au wadubo nonoana eġa ita mamae.

\* 15:1: Mrk 14:55 *Sanhedrin*

<sup>2</sup> Pilate, Iesu i vitara-virevirei i pa, “Tam mai Jew ai gulau bo?” Iesu i paribelei i pa, “Anina e ririwa nanare.”

<sup>3</sup> Pirisi Babadai e viviwavuim kaua maḡamaḡau aubai.

<sup>4</sup> Ma nanare Pilate, Iesu i vitaraviravirana-melei i pa, “Tam ma paribelana bo eḡa? Ma nonori e viviwavuim kaua maḡamaḡau aubai!”

<sup>5</sup> Wate Iesu i genuana ma eḡa ita paribelei. Ma Pilate i ba kaua.†

*Iesu ana iraḡe i vianinei*

*(Matthew 27:15-38; Luke 23:13-25; John 18:39-19:16)*

<sup>6</sup> Tau i kaua maemaena da Raḡona Torelana au marana, Pilate, panipani tagogi, rava ai ḡoanei e ruperupeni ma e vovoterei da e nena.

<sup>7</sup> Orotu tagogi wavana Barabas; tauna Rome gabemani i viḡaviei ma i pani da panipani au numana i mamae. Ana rava maiteni tauviraḡena.

<sup>8</sup> Ma patara i ḡeta da Pilate ita vibaḡai da panipani tagogi ita rupeni Raḡona Torelana au marana.

<sup>9-10</sup> Pilate i paribelei, “Taumi o ḡoeḡoei da mai Jew ai gulau ana rupeni aubaimi bo?” Pilate i aramanei da Pirisi Babadai, Iesu i unurei ma lamna aubaina Iesu i veredamanei tauna awarina.

<sup>11</sup> Wate Pirisi Babadai, patara i egari da Pilate, Barabas ita rupeni ma eḡa Iesu.

<sup>12</sup> Pilate, patara i paridadana-melei i pa, “Tauna o ḡoreḡoreia mai Jew ai gulau mena ana kauanei?”

<sup>13</sup> Tau i garara, “Ma tuparatui!”

<sup>14</sup> Pilate i riwa, “Aiwai apoapoena i kauai?” Ma tau i garara guratana, “Ma tuparatui!”

<sup>15</sup> Pilate i ḡoei da patara ita vinuaubai ma Barabas i rupeni ma *sorodia* i egari da Iesu i kwapui da i vitaratarai ma i naei da ita tuparatui.

*Sorodia, Iesu i vinamei*

*(Matthew 27:27-31; John 19:2-3)*

<sup>16</sup> *Sorodia*, Iesu i taravaina-ruiei Pilate ana au numa ma ai rava ḡelau i ḡoreiai.

<sup>17</sup> Ma gara lebalebarina‡ [*me gulau ana gara*] Iesu i vioteni ma kunuteia ai donadonanei i viri da au kolana i terei.

<sup>18</sup> Ma vinamana i raukarei ma i garara, “Egualau mai Jew ai gulau!”

<sup>19</sup> Ma kolana gonuei i raviravi ma i ovaovai. Ma ae-tutuie i mae-ḡaira au doa ma i raudunelei ma i vivinamei.

† 15:5: Mai Rome ai tarawatu e mamae da maranai i viwavuim ma tauetara eḡa uta paribelei lamna tam anina wavu ma varai. ‡ 15:17: Eng. *purple*.

20 Ma i vijiboğa vorovei ma gara lebalebarina i voğigi-tawanei ma ana gara i vioteni. Ma i taravaina-opunei da ita tuparatui.

*Iesu i tuparatui*

(*Matthew 27:32-44; Luke 23:26-43; John 19:17-37*)

21 Tau i nene ma Simon i nelağai, rava SairinieŠ (tauna Rufus ma Alexander amai). Simon wapuei i nenei. Ma *sorodia*, tauna i egari da Iesu ana *korosi* i avarai.

22 Tau, Iesu i naiei da gabu i ġoreğorei Golgotha, lamna anona unu gabuna.

23 *Sorodia*, *wine* bunama *myrrh* maiteni i virai ma Iesu i veredadani, wate tauna i geduaiei.

24 Ma Iesu i tuparatui ma ana gara, tau avai au orai i ġutai.\*

25 Ubaubanai 9 kilok nanare, Iesu i tuparatui.

26 Aniviwavuna i girumi ma i tutui, “Mai Jew ai gulau.”

27-28 ✨ Danedanenei ruağa, Iesu au ririvana i tuparatui; tagogi au oiena ma ġelauna au kelakelauna.†

29 ✨ Taubabara, kolai i kwajikwajiei ma Iesu i vivinamei, “Na! Tam Tempol taurikaina ma au pom tonuğa ma voa-melei.

30 Ma vilawana-melem ma *korosiei* ma ġairail!”

31 Ma nanare Pirisi Babadai ma Tarawatu Babadai maiteni, Iesu i vivinamei, “Rava ġelau i vilawani, wate ainelana ita vilawana-melana-avei.

32 Keriso Tauvilawana, Israel ana gulau; marina *korosiei* ma ġairai ma tana inana da tana vitumağane!” Danedanenei i tupatuparatui maitenai, Iesu i vinamei.

*Iesu ana irağe*

(*Matthew 27:45-56; Luke 23:44-49; John 19:28-30*)

33 Ma au benai dobu anatapuna i waguwarei da 3 kilok au bigai.

34 Lamna maranaina Iesu ponana i rata ma i kwatu, “*Eloi, Eloi, lama sabachthani?*” Lamna anona, “*Au God, au God aiwai aubaina u netawaneu?*”

35 Ma rava ġelau au ġereğere i maimairi i nonori ma i riwa, “Ona rautaniğanei, Elijah e kwatukwatuei!”

36 Ma rava tagogi i ruba da gara ai au damona i pani ma au *wine* tomatomana i vicaloi ma i voepai Iesu au ipirina ma i riwa,‡ “Ona vipaipai ma tana inana mepa da Elijah ina nei da ina tereğairei.”

37 Ma Iesu ponana i rata ma i kwatu ma i lavutu tawanana.

§ 15:21: Eng. *Cyrenian*. \* 15:24: Tau ġaima i tawanei me *dice* da aiai aiwai garana ita vaia. ✨ 15:27-28: Isa 53:12 † 15:27-28: Giruma ġelau waduboi vs 28 e mamae *Ma aiwai i kaukaueia lamna peroveta i ririweia i tupua, Tau i 'nanai me tau ġo'apoapoe taukauei*. Isa 53:12 ✨ 15:29: Mrk 14:58 ‡ 15:36: Psa 69:21 peroveta i girumi da *Keriso* ita verei.

38 Ma Tempol au orana aniteregāgāra au pouna i wanasikai au tepana da i gāira au doa.

39 Ma *sorodia* ai bada, Iesu au naona i maimairi; i 'nanai da i lavutu tawanana ma i riwa, "Wei anina God Natuna."

40 Waivine gēlalui aueia imae ma iraraubiga: Mary Magdalene ma Mary (James keikeina ma Joses§ aloi) ma Salome.

41 Tauti, Iesu i votaḡotaḡoi ma i vovoagui maranai au Galili i mamae ma waivine gēlalui maḡamaḡai, tauna maiteni i gēgē au Jerusalem, anatapui kampa.

*Iesu i vikokoagei*

(*Matthew 27:57-61; Luke 23:50-56; John 19:38-42*)

42-43 Ma au biga i tuturiai Joseph Arimatheaei\* tauna rava gāeḡaena tagogi boru ḡetelarana au orana. Tauna God ana vigulau ana nei i vipaipaei. Ma vokaukua marana (Lamna Sabat au naona)† ma Joseph ana tepatorana, Pilate awarina i rui ma Iesu taubeuna i vibagei.

44 Pilate i baiei da Iesu boiboḡi i'raḡe. Tauna, *sorodia* ai bada i kwatuei ma i vitara-virevirei da Iesu i'raḡe bo eḡa?

45 Maranai *sorodia* ai bada i parivere i da anina riwa kaua. Ma Pilate, Joseph i riwei da Iesu tupuana i vaia.

46 Joseph, gara maiana gāeḡaena i gimarai ma Iesu tupuana i tere-gāirei. Gare i umai ma au guba tupuana i vimataveni ma gāima gāeḡaena i kaipeuri da kokoaga metaetana i viaitomeni.

47 Mary Magdalene ma Mary - Joses alona i 'nanai mepa Iesu taubeuna i vimataveni.

## 16

*Iesu i vomairi*

1 Ma Sabat au murina, Mary Magdalene ma Mary - James keikeina alona ma Salome, bunama ḡabuḡabui i gimarai da i naiei da Iesu tupuana ita buloi.\*

2 Ma Sunday ubaubanai boiboḡi maranai madeḡa i gogogo, tauti i nae au kokoaga.

3 Ma i nene ma i bababani, "Aiai aubaita gāima kokoaga au metaetana ina kaipeura-tawanei?"

§ 15:40: Au Mat 27:56, Matthew i girumi *Joseph* ma eḡa *Joses*. \* 15:42-43: Eng. *Arimathea*. † 15:42-43: Mai Jew ai *Sabate*, madeḡa e neneulai au Friday e vivikarei da madeḡa e neneulai au Saturday e kwakwa. Mai Jew ai Tarawatu e ririwa da rava i'raḡe lamna marana tagogina ina doboi. *Sabate* amadodo madeḡa e neneulai ina vikarei lamna aubaina Joseph i volaḡilaḡina da Iesu taubeuna ita doboi. \* 16:1: Mai Jew ai kaua maemaena da taubeu monamonei ina buloi ma muriai ina doboi ma waivine i ḡoei da wei kauai ita votaḡotaḡoi.



4 Maranai tau i taepai, i 'nanai da boiboği ġaima i kaipeura-tawanei - ġaima ġaeġae kaukauana.

5 Maranai i rui au guba ma oroto laragana ana gara ararapoirina i 'nanai au oiena.† Ma tau orai i auepai.

6 Orotu laragana i riwa, “Eġa orami ina auepai, taumi, Iesu Nasaretei o baibaiei bo? I tupatuparatuia; tauna i vomairi! Ona inana, tauna eġa weka! Tau weka taubeuna i vimataveni.

7 ✠ Marina ona nae ma ana tauvotaġotaġo ona riwei, ma Peter eġa nuanuami ina vuru da Iesu e vivinao au Galili. Kampa ona inana i ririwemi nanare.”

8 Tau i opu ma kokoagei i viruberubei ana ini sisisi ma ana rovoi. Tau i rovo kua, lamna aubaina eġa rava ita riwei.

### *Mark 16:9-20*

*Mark Riwana Aiaina damona lamna wariġa i vine-boai. Ma rava ġelauna aiwai i notanotai nanare au vs 9 da 20 i girumi. Wei damonana weka i vikarei.*

### *Iesu, Mary Magdalene awarina i eġa*

9 Iesu iraġelei i vomairi me au Sunday ubaubanai boiboği ma i ainae da Mary Magdalene awarina i eġa. Maraotai Iesu, Mary awarina arua-apoapoei seven i viopuni.

10 Iesu, ana tauvotaġotaġo i vivinuabola ma i toutou ma Mary i ġeta da i pariverei.

11 Ma Mary i pariverei da Iesu i lawana me ma tauna matanei Iesu i 'nanai. Wate tau i eġa ita vitumaġanei.

### *Iesu, tauvotaġotaġo ruaġa awari i eġa*

12 Wei au murina Iesu inanana tapuna ma ana tauvotaġotaġo ruaġa awari i eġa; maranai tau i nena au melagai.

13 Tau i naeme ma tauvotaġotaġo ġelau i vieġei. Wate tau nanare eġa ita vitumaġanei.

### *Iesu, Tau 11 awari i eġa*

14 Muriai tau 11 i amam ma Iesu awarii i eġa. Ma i eni aubaina tau orai i bado ma eġa ita vitumaġana maranai rava, i riwei da Tauna i vomairi me.

15 ✠ Iesu ana Apasol i riwei, “Ona nae dobu au anatapuna. Ma God Riwana Aiaina ona jimei rava anatapui awarii.

16 Aiai da i vitumaġana ma i babataito; tauna ina lawana. Ma aiai da eġa ita vitumaġana ina kovoġi.

17 Ma tau aiavoi da i vitumaġana, rewapana ina verei da kua babai ina kauai. Ma arua-apoapoei ina viopuni ma pona tapunei ina babani.

† 16:5: Tupua i vimataveni au oiena i kiakiala, ana gara ararapoirina. ✠ 16:7: Mrk 14:28 ✠ 16:15: Act 1:8

18 Tauī, mota uraiei ina vaia ma waiawa ina umai ma eḡa ina rauputei. Ma urai doridoriai au kolai ina terei ma ina lawana.”

*God, Iesu i ḡaiei au Mara*

19 ☆BADA Iesu, awari i babani vorovei. Ma tauna i ḡaiei au mara ma God au oiena i kiala.

20 Tavotaḡotaḡo i opu ma dobu au anapuna i raraugugula. Ma BADA, tauī i voagui ma kua babai i kaukauei da tavotaḡotaḡo aiwai i bababaniei i vovai-virewapani.

## Apasol ai kaua Pariverena

Luke ana buka i giruma vorovei ma muriai Apasol ai kaua bukana i girumi. Tauna ana ano ġaeġaena lamna i ġoei da rava ita vieġei da menanare Arua Vivivireina Iesu ana tauvotaġotaġo i rau-etaraveni da Riwana Aiaina ita vituai,

Au Jerusalem ma au Judea au anatapuna ma au Samaria ma dobu au gia dewadewana.

(1:8)

Kerisiana ai babara ma ai nola i babaniei. Mai Jew awarii i vikarei ma i nae da dobu anatapui i vitumaġana. Tauamgiruma ana nota ġaeġaena da wei bukana tauivana ita pariveri da kerisiana avena Rome gabemanina ita viviġaviei. Kerisiana vitumaġanana lamna mai Jew ai vitumaġana e kaukauana-paiei. Wei bukana i ġutai da raġaraġana tonuġa, ma e viviatataieta da dobu au anatapuna Iesu Riwana Aiaina i jimei ma ekalesia i vitupui:

Iesu ana ġae au murina Ekalesia au Jerusalem ai nola i vikarei;

Palestine taun ġelau awari i tua-nae;

Ma i tua-nae au Mediteranean da i nae au Rome paratana.

Wei bukana ana kaua ġaeġaena lana Arua Vivivireina i nolanola, ma rewapana tauvitumaġana au Jerusalem i verei au Pentecost. Ma wei au bukana i vieġeta da Arua vivivireina mara nonoa agu ma rewapana ekalesia ma ai babada i verei ai au aninola au anatapuna. Wariaġa kerisiana ai pariverena i tere-tagogiei raugugula au maġamaġai, ma kaua ma ai nola i kaukauei anatapui. Wei au bukana i girumi da wei parivai-nuaġanana ana rewapana tauvitumaġana ai au lawana ma kerisiana ai au voepaepa i viatataieta.

### **Buka rereġana 1.**

Vokaukaua tauvimatamata aubai (1:1-26)

Iesu ana tarawatu ma ana parivainuaġana damona (1:1-11)

Judas Epaiana (1:12-26)

Tauvimatamata au Jerusalem (2:1–8:3)

Tauvimatamata au Judea ma Samaria (8:4–12:25)

Paul ana nola (13:1–28:31)

Paul ana vaġai tagogi (13:1–14:28)

Boru au Jerusalem (15:1-35)

Paul ana vaġai viruaina (15:36–18:23)

Paul ana vaġai vitonuina (18:24–21:16)

Paul i vipanipani au Jerusalem, Caesarea, ma Rome  
(21:17–28:31)

*Iesu ana Apasol i parivainuaḡani*

<sup>1</sup> Eḡalau Theophilus, buka au naona a girugirumia\* lamna Iesu ana tupua ma ana nola i vikarei da i kaukauei ma i viviararamana a pariverem

<sup>2</sup> i nae da ana ḡae au marana. Muriai da Iesu i ḡaie i au mara, Tauna Arua Vivivireinei ana apasol vinevinei riwa bagibaginei i pariveri.

<sup>3</sup> Iesu ana iraḡe au murina i vieḡana-melei ana apasol awarii. Ma kaua maḡamaḡau i kauai da apasol i vitumaḡana kaua da Tauna anina i lawana me. Taui awarii i eḡa au pom 40 au orana ma God ana vigulau i babaniei.

<sup>4</sup> Maranai ana apasol maiteni i vitagogiei ma i riwanaguratei i pa, “Eḡa Jerusalem ona oputawanei, wate pulona amau i paripari-vainuaḡanimi ona paini, maraotai a ririwemi nanare.

<sup>5</sup> \*John wairei i babataito, wate mara aburuna ava Amau, Arua Vivivireinei taumi ina babataitomi.”

*God Iesu i ḡaie i au Mara*

<sup>6</sup> Muriai maranai Iesu ma Apasol i vitagogiei ma taui Iesu i vitara-virevirei i pa, “Bada! Marina, Israel ana† vigulau ma vere-melei bo?”

<sup>7</sup> Ma Iesu i paribelei, “Amau ainelana ana rewapanei mara ma iri e vivibadei, aubaina da taumi eḡa ona aramanei.

<sup>8</sup> \*Wate maranaina Arua Vivivireina au orami ina rui, maranaina taumi rewapana ona vaia. Ma aubaiu ona vitaunola au Jerusalem, Judea, au Samaria ma dobu au anatapuna.”

<sup>9</sup> \*I babani vorovei ma au matai God Iesu i ḡaie i au mara. Ma apau i nei da i purui ma taui eḡa ita inana-melei.

<sup>10</sup> Ma taui i ḡoḡouta au mara ma nelara ruaḡa ai gara arara-poiri au ririvai i raumairiei.

<sup>11</sup> Ma i riwa, “Mai Galili, aiwai weka o maimairiei ma o ḡoḡoutatei? Wei ravana menanarena o inanai i ḡaenei, amapo nanare ina nememei.”

*Judas epaiana i vinei*

<sup>12</sup> Anina ma Apasol Ola Olive, i voterei ma i ḡaira me au Jerusalem lamna eḡa uama ma au ḡereḡere.

<sup>13</sup> \*Ma au Jerusalem i ḡeta ma i ḡae numana i mamae lana au tepana au vatavatara. Taui ai wava, Peter, John, James ma

\* **1:1:** Bukana au naona i girugirumi lamna Luke ana Gospel    \* **1:5:** Mrk 1:8  
† **1:6:** Rome gabemanina Juda i vibadei wei au marana, Mai Jew wei eḡa ita ḡoei, ma i ḡoei da ita virai.    \* **1:8:** Mrk 16:15    \* **1:9:** Mrk 16:19    \* **1:13:** Mrk 3:16-19

Andrew, Philip ma Thomas, Batolomeo ma Matthew, James - Apius natuna, ma Simon tauna au naona Zealot‡ ma Judas - James natuna.

14 Ma wei ravai mara patapatana i vivitagogiei ma i raraupari gogona, waivine ġelau ma Iesu ana roaroa ma aloi Mary maiteni kampa.

15 Wei au marana, tauvitumaġana 120 i vitagogiei ma Peter i vomairi ma wenanare awari i babani,

16-17 “Varevareiu, Judas Iskariot lamna turata tagogi ma maiteni ta nola gogona, wate muriai i voagu da Iesu i pani. Arua Vivivireina wei riwana wariġa gulau David i riwei da ina tupua; ma aiwai i ririwei anina nanare i tupua.”

18 Judas Iesu i amverenei mane vainana aubaina, ma wei manenei doa i gimarai. Ma nai au doana tauna kolanei i peu ma manawana i wanawamai da amoamona i opu.

19 Ma rava anatapui au Jerusalem wei iragena riwana i nonori, lamna aubaina tau i nai dobuna ai ponei i viwavai Hakeldama, wei anona *Tara Doana*.

20 “Wariġa Gulau David i girugirumia, nanare i tupua,

*Ana animae ina kwakwava,  
ma eġa ai ai au orana ina mae.*

(*Psalm 69:25*)

Ma

*rava ġelauna ana nola ina vaia.*

(*Psalm 109:8*)

21 †Lamna aubaina marina awarita, rava ġelauna tana vinei da ina raviepai. Tauna ravanana Iesu maiteni ta bababara-nae madeġa tonuġa au orana,

22 John rava i babataitoi au marana ma i nae da Iesu i ġaiei au mara. Ma maiteni tana nola ma rava tana riwei menanarena God Iesu iragēlei i vovaimairini.”

23 Ma tau i rava ruaġa i vinei, Joseph-Barsabas (ana wava ġelauna Justus) ma Matthias.

24-25 Anina ma tau i raupari, “BADA tam rava anatapui orai u aramanei. Ma vieġelai da wei ravai ruaġa, ma metauna u vinei da Judas ana gabu ina vaia da ina viApasol, aubaina Judas i voterelai da i nae ana au gabu.”

26 Anina ma tau i vine, ma vinevine Matthias awarina i peu, ma tauna i vi-Apasol, ma Apasol 11 au orai i rui. §

‡ 1:13: Rava ununurana. Wei ravai mai Rome ai gabemani e viviġaviei. ☆ 1:21:

Mrk 1:9; Mrk 16:19 § 1:26: Wei kalona wenanare: mai Jew wava ġaima muomuoi awari i girugirumi ma e tawatawanei, ma ai ai ana namba i eġa lamna tauna ina vaia. Tau i vitumaġana da wei kauana awarinei God tau i ina viatataiei da ai ai ita vinei. (Pro 16:33)

## 2

*Arua Vivivireina i ġairai*

1 Pentecost torelana i ġetai ma tauvitumaġana anatapui numa tagogi au orana i vitagogiei. \*

2 Maratagogi gugura ġaeġaena, nonorana me ive vivire-wapanana marei i ġairai ma tauvitumaġana i mamae numana i vjoai.

3 Taii purapura inanana me ai menamenana i 'nanai, i ġairai ma rava tagotagogi ava au kolai i kiala.

4 Ma Arua Vivivireina anatapui i vjoai ma pona taputapunei ava i bababani Arua ana aguei.

5 Nai maranaina mai Jew patupatutui dobu au anatapuna i vitaomana au Jerusalem da Pentecost torelana ita apui.

6 Ma patarai kampa i viruberubei, ma i nonori da gugurana lamna tauvitumaġana tau tagotagigiava ai ponei i bababani ma tau ai nota i kwa.

7 Taii anatapui i baei ma taui ava i babani vivira i pa, "Wei mai Galili bo?"

8 Ma menanarena da anataputa awarita ata ponei e bababani!

9-10 Tauta ġelauta mai Parthia, Mede ma Elam, ma mai Mesopotamia, Judea, Capadosia, Pontus ma Eisia, Pirijia, Pamphilia, Egypt ma Libya navanavana, au Sairini au ġereġerena, ma ġelauta mai Rome,

11 ġelau mai Jew ma ġelau Jentail wate inibori i vaia da i vimai Jew. Ma ġelauta mai Crete ma mai Arabia. Wate God kua ġaeġaena i kaukaueia, ata ponei i bababaniei ma ta nononori!"

12 Taii anatapui i vinuanaina, nuanuai i raġaraġa ma i bababani vivira, "Wei aiwai kauana e tuputupua?"

13 Wate ġelau tau i vinamei i pa, "Wei ravai i uma bua!"

*Peter rava awarii i raugugula*

14 Anina ma Peter i vomairi Apasol 11 maiteni, ma ponana ġaeġaenei patara awarii i babani,

Au rava mai Jew ma anatapumi au Jerusalem maemaemi, babani ana tere-kauei da ona aramanei. Ona rautaniġana kua.

15 Wei marinaota, 9 kilok ubaubanai! † Wei ravai eġa ita uma bua me taumi o notanotai nanare,

16 Wei lamna wariġa peroveta Joel i ririweia e tuputupua:

\* 2:1: Mai Jew ai Raġona torelana au murina au pom 50 ma Pentecost torelana e vivikarei. Wei riwana anona amapo wei bukana au damona ona iavi ma ona aramanei. † 2:15: Mai Jew tau i bigai sia e aniani ma wain e umaumi.

17 *Mara au damona,  
Aruau rava anatapui awari ana iwaḡi.  
Ma natunatumi nelarai ma waivinei riwau ina jimei,  
ma nelara voui mataiei kua ina inanai,  
ma babada magumaguri raubonie kua ina inanai.*

18 *Wate nanare, Aruau ana iwaḡi au taunola nelarai ma  
waivinei awarii,  
ma ina vitaubabani.*

19 *Ma kua babai au mara ana kauē,  
ma au dobu mataira ana vieḡai  
ai araratana, tara ma bau potopotona.*

20 *Ma madeḡa ina waguvari  
ma nawaravi ina ravitaratarai,  
muriai da BADA ana mara ḡaeḡaena ma boruboru-  
mana ina nei.*

21 *Nai au marana aiavoi da BADA awarina e viviḡore agu  
aubaina BADA tau i ina vilawani. (Joel 2:28-32)*

22 *Ma Peter i babani me:*

*Mai Israel ona rautaniḡana: God Iesu Nasaretei i vovai-  
virewapani da kua babai, ma mataira ḡaeḡaei i kauē da  
ita viatataiemi da tauna anina Godei i nei.*

23 *Wate God wariḡa i viogei ma ana ḡoana nanare da Iesu  
au urami i terei, ma taumi ḡo'apoapoe ravai ai aguei, Tauna au  
korosi o tuparatui da o viraḡeni.*

24 *Wate God, Iesu iraḡelei i vovaimairini, ma iraḡe  
iniviarana i vaitawanei ma iraḡe eḡa tagotagogina da tauna  
ita vojijini.*

25 *Wariḡa David Iesu i bababaniei maranai i riwa:  
Tau a inanai BADA God au naou mara au anatapuna.  
Tauna au oieu lamna aubaina eḡa ana rovo.*

26 *Lamna aubaina nuai ai orau i oai ma menau i morelana,  
ana iraḡe ma a aramanei da tupuau ma paina-kauē.*

27 *Ma aruau eḡa rava irairaḡei ai au dobu ma voterei,  
ma tam eḡa am taunola vivivireina tupuana ma voterei da  
ina buda.*

28 *Tam lawana etanaina u viatataieu,  
ma Tam maiteni a mamae ma a vinuai ai kua. (Psalm  
16:8-11)*

29 *Au rava, A riwana-kauemi da amata gulau David i'raḡe  
da i doboi, ma ana kokoaga weka e mamae.*

30 *Wate David lamna peroveta, ma i aramanei da God  
i parivainuaḡani da ana damei gulau ina opu, me tauna nanare.*

31 *Ma David i 'nanai God muriai aiwai ina kauē ma i riwa,  
Keriso ina vomairi me,*

*ma tupuana eġa rava irairaġei ai au dobu ina voterei da  
ina buda. (Psalm 16:10)*

32 Ma God Iesu-na tagogina iriġelei i vovaimairini, ma tauai anatapuiai a vimatamata.

33 Ma God i ġaiei ma au oiena i vikialai. Ma Arua vivivireina i verei me i parivainuāġana nanare, ma nai Aruana tagogina Iesu awariai i waġi, lamna marina o nononori ma o inainanai.

34 ✧ David eġa ita ġae au mara, ma wate i riwa, BADA au Bada i riwei, “Au oieu ma kiala

35 *ma am ġavia au ae karem ana terei. (Psalm 110:1)*

36 Lamna aubaina mai Israel anatapumi ona aramana-kauei da wei ravana Iesu o tupatuparatuia, God i terei da BADA ma Tauvilawana.

37 Ma maranai rava wei riwana i nononori, taui orai i rautonai da Peter ma Apasol ġelau i riwei, “Varevareiai, tauai aiwai ana kauei da ana lawana?”

38 Ma Peter i paribelei, “Taumi tagotagogi ava Iesu Keriso wavanei ona rupena ma ona babataito ma ami ġo’apoapoei ina nota-tawanei, ma God ana pulo Arua Vivivireina ona vaia.

39 Wei parivai-nuāġanana lamna taumi natunatumi maiteni aubaimi. Ma wate nanare mai jentail - aiavoi da e kwatukwatuei ina nei Tauna awarina.”

40 Ma Peter riwa ġelau maiteni rava i vinua-terenei, ma i egari, “God ona vianinei da ina vilawanimi, ma eġa kovoġa ona vaia.”

41 Ma rava maġamaġau Peter ana babani i vitumaġanei ma i babataito ma nai au marana rava 3,000 ai au boru i rui.

### *Tauvitumaġana i mae gogona*

42 Ma tauvitumaġana Apasol ai viararamana i nononori, ma i viboruboru, i amam ma i raraupari gogona.

43 Apasol kauga babai ma mataira ġaeġae maġamaġau i kaukauei ma anatapui i rovo ma God i vivirana-kauei.

44 ✧ Ma tauvitumaġana anatapui gabu tagogi i vivitagogiei ma aiwai ġariei ai rava maiteni i ġutaġutai.

45 Tui ai doa, ai numa, ai wapu ma ai purapura i gimagimarei ma manena ai rava ġelau maiteni i ġutaġutai.

46 Tui mara patapatai au tempol i vivitagogiei, ma ai au numa ana nuaiiai ma ana morelanai i amam gogona.

47 Ma tui God i vovoepapai ma rava anatapui i vivinuaiaini. Ma marana patapatai rava voui i neneiai Iesu awarina ma tauvitumaġana ai boru i viviratai.

## 3

*Peter, oroto aena gwaġagwaġana i vilawani*



<sup>1</sup> Mara tagogi au bigai 3 oklok, Peter ma John pari aubaina i gēgāe au Tempol.

<sup>2</sup> Ma oroto tagogi aena gwaḡagwaḡana i tupuei, ma mara au anapuna ana rava i avavara neiāi da Tempol metaetana, e ḡoreḡorei, metaeta aiaina, kampa i vivikialai ma rava i ruirui tempol au orana i vivigigimanei mane aubaina.

<sup>3</sup> Maranai i 'nanai da Peter ma John aburuna ava da au metaeta ita rui, ma i vibaḡai mane aubaina.

<sup>4</sup> Peter ma John orotona i 'nana-tunutunui ma Peter i riwa, "Ma inanaiai!"

<sup>5</sup> Ma orotona tau i 'nanai ma i notanotai da aiwai awarii ita vaiā.

<sup>6</sup> Ma Peter, orotona i riwei, "Awariu silva ma gold eḡa wate aiwai awariu lamna ana verem. Iesu Keriso Nasaretei, wavanei ma vomairi, ma babara!"

<sup>7</sup> Ma Peter oroto nimana au oieina i vojijini ma i voagui da i vomairi. Ma maratagogi oroto aena ma ae kwarukwaruna i ai ma i virewapana,

<sup>8</sup> ma aenei i viauepa ma babara i vikarei. Anina ma tau maiteni i rui au tempol ma tauna tempol oraninei i bababara, i viviauepa ma God i vovoepapai.

<sup>9</sup> Ma rava anapui orotona i 'nanai i bababara ma God i vovoepapai,

<sup>10</sup> ma i aramanei da tauna ravana tagogina tempol metaetana e ḡoreḡorei *inanana aiaina* au naona, i kiakiala ma i vivigigimana. Ma rava anapui i 'nanai aiwai i tupua wei orotona awarina ma i ba-guratana.

*Peter patara awarii i babani*

<sup>11</sup> Ma orotona Peter ma John i vovojijini ma rava anapui i bana-kauei, ma i viruberubei tau aiwai au lovelove e ḡoreḡorei, Solomon ana lovelove. \*

<sup>12</sup> Ma maranai Peter patarai i 'nanai ma i riwei:

Au rava mai Israel, aiwai aubaina o vivinuanaina? Ma aiwai aubaina o inainana-tunutunuiāi, apamina tauai ai re-wapanei bo ai vipatutuei, wei ravana a kauei da i babara?

<sup>13</sup> ✧Wei lamna amamata Abraham, Isaac ma Jacob ai God, ana taunola Iesu i viborumei, ma taumi Tauna o verenei da ita viraḡeni, ma Pilate au matana o geduaiei. Pilate i ḡoei da ita rupeni wate taumi eḡa ota vianinei.

<sup>14</sup> ✧Iesu lamna rava vivivireina ma jijimanina, wate o geduaiei. Ma Pilate i ḡoei da Iesu ita rupeni, wate taumi o ḡoei da tauviraḡena i rupeni aubaimi.

\* **3:11:** *Solomon ana lovelove tagogi tempol au orana e mamac. Wei lamna gari au rivivana ma ana tuatua maḡamaḡauna.* ✧ **3:13:** Exo 3:15 ✧ **3:14:** Mrk 15:6-14

15 Ma taumi lawana maemae-nonoana tauvereina o viragēni, wate God i vilawana-melei, tauai wei a vimatematei.

16 Wei ravana aena gwaḡagwaḡana Iesu au wavana i vitumaḡana ma lamna aubaina i lawana. Taumi o aramanei ana doria menanare, Wate ana tumagaḡana Iesu awarina i vilawani.

17 Ma au rava marina a aramanei da taumi ami babada maiteni Iesu o viragēni, aubaina taumi eḡa ota aramanei da tauna tauvilawana.

18 Wate wei lamna wariaga God ana peroveta anapui i ririweia i tupua, God i riwa da ana tauvilawana ina vinuapoapoe.

19 Ami ḡoa apoapoe Ona voterei ma ona mae-taviremi God awarina da tauna ami ḡo'apoapoe ina nota-tawanei.

20 Ma lamna maranaina God aruami nualawalawana ina verei, God Iesu i vinei da ami Tauvilawana ma ina paritawaneiai.

21 Iesu au Mara ina mae da God kaua anapui ina ravivouni, me God ana peroveta vivivirei wariaga i ririweia nanare.

22 ✨Moses i riwa, "BADA ami God peroveta, me tau nanare, ina terei ma tauna ami dam oinei ina nei. Ma aiwai anapuna e ririwemi ona rautaniḡanana-kauei. †

23 ✨Ma aiwai da wei perovetana eḡa ina rautaniḡanei lamna God ana rava awariei ina vilamonei."

24 Peroveta Samuel ma muriai Peroveta maḡamaḡai, kaua i ririweia marina e tuputupua.

25 ✨Taumi nai perovetai natunatui ma taumi maiteni parivainuagaḡana bagibagina au orana. Au baina God Abraham i riwei, "Am epaepaia awariei dam anapui au dobu ana viaiaini."

26 Ma maranai God ana taunola i vinei, ma au naona i paritawaneiai awarimi da ita viaiainimi, ma lamnei taumi tago-tagogi ava ami ḡo'apoapoe ota opu-tawanei ma ota nei Tauna awarina.

## 4

### *Jew babadai Peter ma John i etarei*

1 Peter ma John rava awari i bababani ma pirisi pulo tauapuina ma tempol taupainii\* ai bada ma Sadusi ḡelau † i ḡetai.

2 Taii amloi i ḡaiḡai kaua Peter ma John awari aubaina tau i viviararamana da God, Iesu iraḡelei i vovaimairini ma wei i viatataiana da God rava anapui iraḡelei ina vovaimairini.

✨ 3:22: Deu 18:15, 18 † 3:22: Mai Jew e ririwa da Moses lamna ai peroveta ḡaegaena. ✨ 3:23: Deu 18:19 ✨ 3:25: Gen 22:18 \* 4:1: Tempol tau-painina lamna anapuna au tempol e inainana-vaitetei (purusimani). Taii pirisi ḡeḡetelarana ana taunola.

† 4:1: Sadusi taui iraḡelei vomairime eḡa ita vitumaḡanei

3 Taui Peter ma John i pani ma au i pom aubaina panipani au numana i terei da i mae mara.

4 Wate rava maḡamaḡau riwa i nonori ma i vitumaḡana, ma ai maḡa nelara 5,000 waivine eḡa ita iavi.

5 Ma mara i tom ma Jew babadai, dogadogara ma tarawatu babadai au Jerusalem i vitagogiei.

6 Ma pirisi ḡeḡetelarana Annas kampa ma Caiaphas, John, Alexander ma pirisi ḡeḡetelarana ana rava maiteni. ‡

7 Ma taui Peter ma John i neiei da au naoi i vimairini ma i riwei, “Aiwai rewapananei, ma aiai wavanei wei o kauiei?”

8 Arua Vivivireina Peter orana i vioai ma tau i riwei, “Rava ai babada ma dogadogara;

9 tauai kua aiaina a kauiei gwaḡagwaḡana awarina ma amadodo taumi o vitara-virevirelai, da menanare tauna i lawananei.

10 Ma wei ona aramana-kauiei, da taumi ma mai Israel anatapui, da Iesu Keriso Nasaretei o tuparatui, Wate God tauna iraḡelei i vovaimairini ma tauna wavanei wei orotona au naomi lawalawaina e maimairi.

11 Taumi tauvoa nai ḡaimana o geduaiei, wate wei gaimana lamna numa ogona, numa ana tapuna e vovojijini. §

12—Lamna aubaina Iesu ainelana ina vilawanita. Ma God eḡa aiai ḡelauna au dobu rewapana ita verei da ina vilawana.”

13 Ma taui Peter ma John ai tepatora inanai ma maranai i aramanei da tau i eḡa girugirumai, ma i baei. Ma i aramanei da tau i Iesu ana tauvotaḡotaḡo.

14 Ma wate i ’nanai oroto i vivilawania Peter ma John maiteni i maimairi, lamna maranai tau i gamoi i pota.

15 Anina ma Peter ma John i riwei da boru gabuna i oputawanei, ma tau i ava i vitarairavira vivira.

16 Tau i vitaraviravira-viravira i pa, “Aiwai tana kauiei wei nelarai awari? Rava anatapui au Jerusalem i aramanei da tau i kua babai i kaukauiei, lamna eḡa tana boviei.

17 Wate tana viḡaei da wei kauai eḡa ina tua rava ḡelau awari, ma riwa bagibaginei tana viḡaei da eḡa aiai awarina Iesu wavanei ina raugugula.”

18 Anina ma tau i ḡorei da i rui me, ma riwa bagibaginei i viḡaei da eḡa aiai awarina Iesu wavanei ina raugugula bo ina viararamana.

‡ 4:6: Mai Rome Caiaphas i vinei da Pirisi ḡeḡetelarana, poiana Annas epaiana. Wate mai Jew ai au giu da aiai pirisi ḡeḡetelarana vaivaina i vaia, tauna anina ina mae da au iraḡe. Luke e ririwa da Annas tauna pirisi ḡeḡetelarana. § 4:11:

Mai Jew ai numa ḡaimiei i voavoai. Iesu tauna anina God ana Tempol vouna ogona. (Eph 2:19-21, Isa 28:16).

19 Wate Peter ma John tau i paribelei, “Taumi ami nota aiwai. Tauai God ana voteletelei bo taumi?

20 Tauai aiwai a inainanaia ma a nononoria babanina eḡa ana voterei.”

21-22 Wei Orotona i vivilawani lamna gwaḡagwaḡana ma ana madeḡa 40. Lamna aubaina rava anatapui God i vovoepapai, ma babada eḡa ita aramanei menanare Peter ma John ina kovoḡanei. Ma i parivairovorovo-melei ma i paritawanei da i nae.

*Tauvitumaḡana God i vibaḡai agu aubaina.*

23 Peter ma John i nae me ai rava awari ma pirisi ḡaeḡaei ma dogadogara aiwai i ririweia tau i vieḡei.

24 ✨Maranai tauvitumaḡana wei riwana i nonori, taui anatapui i raupari gogona God awarina:

BADA tam ai gulau, Tam mara, dobu, boga ma anatapuna au orana maemaiei taukaueina.

25 Tam Arua Vivivireinei am taunola, amaiai David gamonei u babani ma u riwa,

*Aiwai aubaina rava awariai e mejimeji,*

*ma aiwai aubaina ai oga e taratara labalabai?*

26 *Ma dobu ai gulagulau i vokaukaua ma babada ḡaeḡaei ḡelau maiteni i vitagogiei da*

BADA ma ana tauvilawana\* maiteni i viḡaviei. (Psalm 2:1)

27 ✨Anina riwa kaua. Wei kauai weka au Jerusalem i tupua, Herod ma Pontius Pilate, Jentail ma mai Israel maiteni i vitagogiei, da am taunola vivivireina Iesu u bulubuloia i viḡaviei.

28 Ma tam am rewapanei ma am ḡoanei am oga menanare u tarataranei marina nanare i tupua.

29 BADA, nai ravai ai parivai-rovorovo au uram ma am taunola ma vovai-virewapani da ana tepatorai riwam ina raugugulei.

30 Uram ma viloloi da ma vilawana ma kaua babai ma mataira ḡaeḡaei ma kauei, am taunola Vivivireina Iesu wavanei.

31 Ma pari au murina, taui mepa i vivitagogiei gabuna i vigu. Ma Arua Vivivireina anatapui orai i vioai. Ma ana tepatorai God riwana i raugugulei.

*Tauvitumaḡana ḡariei i ḡutaḡutai*

32 ✨Tauvitumaḡana anatapui ai nota ma orai tagogi. Ma ai purapura tagogi ma eḡa aiwai ita nuanei.

✨ 4:24: Exo 20:11  
2:44-45

\* 4:26: Wei lamna Keriso.

✨ 4:27: Mrk 15:1

✨ 4:32: Act

33 Ma Apasol ana tepatorai ma rewapanai BADA Iesu ana iraḡe, ma ana vomairi me i raugugulei. Ma God ana viaiaina ḡaeḡaena tau i anatapui awari i peu.

34-35 Ma tau i au orai eḡa aiai aiwai ita voladaḡei aubaina, ai rava ḡelau i ai doa bo ai numa i gimagamarei ma manena i neneiai Apasol awari i tereterei, ma aiai da aiwai i vovoladaḡei nanare i vovoagui.

36 Me Joseph, tauna Levi ana damei, au Saipras i tupua, ma Apasol tauna i ḡoreḡorei Barnabas, wei wavana anona lamna tauduḡu.

37 Tauna ana doa i gimarei, ma manena i neiai da Apasol awari i terei.

## 5

### *Ananias ma Saphaira*

1 Anina ma Ananias awana Saphaira maiteni ai doa nanavanavana i gimarei.

2 Ma airuaḡa i vianina tagogi da mane nanavanavana i nuanei, ma Ananias mane nanavanavana i naiei da Apasol awari i terei.

3 Anina ma Peter tauna i vitaravirevirei, “Ananias aiwai aubaina Satan u vianinei da au oram i rui ma Arua Vivivireina u morui, ma doa u gimagamarei manena nanavanavana u nuanei?”

4 Doa lamna tam ḡarime i da uta gimarei bo eḡa. Ma maranai u gimarei lamna manena tam ḡarime i da uta verenei, aiwai aubaina nota apoapoena au oram i rui? Tam eḡa rava awarina uta moru, wate God awarina u moru.”

5-6 Maranaina Ananias wei riwana i nononori, tauna i peu da i'raḡe. Anina ma nelara i rui da tupuana i umai ma i naiei da i doboi. Ma aiavo i da wei riwana i nonori i rovo kaua.

7 Tau i eḡa ita mae guratana, ora tonuḡa nanare ma awana i nei, aiwai i tupua eḡa ita aramanei.

8 Ma Peter wavine i paridadanei, “Abe uta riweu, tam awam Ananias maiteni doa o gimagamarei maiana anina wei bo?” Ma tauna i paribelei, “Ee, doa maiana anina nai.”

9 Ma Peter i riwa, “Aiwai aubaina taumi o vianina da BADA Aruana ota raudadani? Nelarai awam i dobodobo i ma inanai au metaeta da tam maiteni ina avara-opunem.”

10 Maratagogi wavine Peter au ae karena i peu da i'raḡe. Maranai nelara i rui au numa ma i 'nanai da wavine i'raḡe, anina ma i avara-opune i da awana au ririvana i doboi.

11 Lamna maranaina ekalesia anatapui, ma rava aiavo i da wei riwana i nonori i rovo kaua.

*Apasol rava maḡamaḡau i vilawani*

12 Ma Apasol mataira ma aniba kauai maḡamaḡai i kaukauei rava awari. Ma tauvitumaḡana Solomon ana au lovelove i vivitagogiei.

13 Wate rava ḡelai ai au boru ruina i rovoei, wate rava tau i vivirana-kauei.

14 Wate nelara ma waivine maḡamaḡai Iesu awarina i vitumaḡana ma tauvitumaḡana ai au boru i ruirui.

15 Ma lamna aubaina rava ai rava doridoriai i avavara-opunei au eta ma ai au animatave i vimataveni, da Peter inii ita vodadani bo eḡa da ḡouna tau i ita ḡouni da ita lawana.

16 Ma melagai ḡelai Jerusalem au ririvana ravai maḡamaḡai ai rava doridoriai, ḡelai arua-apoapoei i ruiruinia i neiai ma anatapui i vilawani.

17 Anina ma pirisi ḡeḡetelarana ma ana rava mai Sadusi anatapui orai unura i oai.

18 Ma Apasol i pani, ma panipani au numana i terei.

19 Wate waguvarai BADA ana anela i nei da panipani numana metaetana i votawanei, ma tau i taravaina-opunei ma i riwei,

20 “Ona rui tempol au orana, ona mairi ma lawana vouna riwana anatapuna rava ona parivere.”

21 Anela i ririwei nanare, tau i tempol i rui ma rava viararamanai i vikarei. Nai maranai pirisi ḡeḡetelarana ana rava maiteni i ḡetai ma boru ḡaeḡaena e ḡoreḡorei Sanhedrin i terei. Ma rava i paritawanei au panipani numana da Apasol ita neiai awari.

22 Tau i panipani au numana i ḡeta ma i baina-avei, ma i naeme da i vieḡa.

23 I pa, “Panipani numana anina i gudu-kauei, ma tauvipaipai au metaeta i maimairi; wate maranai tau i metaeta a votawanei lamna eḡa aiai kampa.”

24 Maranai tempol taupainina ai bada ma pirisi babadai wei riwana i nonori, tau i vinuanaina da aiwai i tupua.

25 Ma rava tagogi i nei ma i riwa, “Ona rautaniḡana! Nelara panipani au numana o teretereia, tau i tempol e maimairi ma rava e viviararamani.”

26 Anina ma tempol taupainina ai bada, ma babada ḡelai maiteni i nae ma Apasol i neiai. Tau i rovo ma eḡa ita egari mepa da rava ḡaime i ita ravi.

27 Ma Apasol i neiai boru ḡeḡetelarana au naoi, ma pirisi ḡeḡetelarana tau i vitara-virevirei.

28 I pa, “A riwana-guratemi da wei ravana au wavana avena ota viararamana, wate ami viararamana i tua da Jerusalem i oai. Ma wei ravana tarana wavuna tau i o vereverelai.”

29 Ma Peter Apasol ḡelai aubai i vitauvibabani i pa, “Tau i God ana voteletelei ma eḡa rava.”

30 Taumi Iesu au *korosi* o tuparatui ma o viraḡeni, wate amamata ai God Tauna i vovaimairini.

31 Ma marina Tauna God au oiena e kiakiala, Tauna BADA ma Tauvilawana, Da mai Israel ai ḡo'apoapoe ina rupeni, ma ai ḡo'apoapoe ina nota-tawanei.

32 Ma tauai Arua Vivivireina maiteni wei kauai anata-pui mataielai a inanai. Ma nanare God Arua Vivivireina i paritawanei rava votelatelai awari."

33 Tau i wei babanina i nonori ma amloi i ḡaiḡai kaua, ma i ḡoei da Apasol ita viraḡeni.

34 Wate Pharisi ma tarawatu badana wavana Gamaliel, rava anata-pui wei ravana e vivivirei. Tauna Sanhedrin boruna au orana i mairi, ma rava i riwei da Apasol i opunei au doa mara aburuna ava.

35 Anina ma ana rava i riwei, "Mai Israel, ona inana kaua ma muriai da aiwai wei ravai awari ona kauai.

36 Mara tagogi oroto wavana Theudas viḡavia i vikarei ma i kauana-melei da tauna rava ḡaeḡaena, ma rava ai maḡa 400 nanare tauna i votaḡotaḡoi. Ma maranaina tauna i viraḡeni ana tauvotaḡotaḡo i vilamonei ma aiwai anata-puna kampa i kwa.

37 Wate tauna au murina oroto Galiliei wavana Judas i ḡeta, census au marana ma rava maḡamaḡau tauna i votaḡotaḡoi, ma tauna maiteni i viraḡeni, ma ana tauvotaḡotaḡo i vilamonei.

38 Lamna aubaina a ririwemi da wei ravai ona voteretawanei! Mepa da tau i nola ravei, amapo ina peu.

39 Wate mepa da Godei, taumi eḡa tagotagogina da wei ravai ona viḡaei, taumi mepa da God o viviḡaviei."

40 Tau i Gamaliel ana babani i voteletelei. Ma Apasol i riwei da i rui, ma i wipiei i kwapui ma i viḡaei da Iesu wavanei ina jima, ma i paritawanei da i nae.

41 Aubaina i aramanei da God tau i vinei da Iesu wavana aubaina ina vinuapoapoe. Anina ma Apasol ana nuaiaii Sanhedrin i opu-tawanei,

42 Tau i mara patapatana tempol au orana ma au numa God riwana aiaina i raraugugulei ma i viviararamana da Iesu tauna Keriso.

## 6

### *Stephen i vinei tauvoaḡu*

1 Tauvitumaḡana ai boru i rarata, ma au orai mai Jew Greek taubabanieina, mai Jew kampa maemaei i viamparipariei. Tau i beubeura da ai kaikaiababa ai ḡuta eḡa ita tereterei.

2 Anina ma Apasol 12 tauvitumaḡana ai boru i raukwatuei. Ma i riwei, "Tau i Apasol ma ai nola lamna God riwana ata jimejime i ma avena mane nolana maiteni ata kaukauei.

<sup>3</sup> Lamna aubaina au rava, awarimi rava 7 ona vinei, tau i orai Arua Vivivireina i oai ma nuaulaulai da wei nolana ina kauai,

<sup>4</sup> Ma tauai ai nola da pari ma God riwana ava ana jimei.”

<sup>5</sup> Rava anatapui wei ogatarana i vianinei, ma Stephen i vinei, Arua Vivivireina orana i oai, ma ana tumaḡana God awarina i rata kaua. Ma nanare Philip, Prokoras, Nikano, Timon, Pamenas ma Nicolas tauna Jentail, Antiokei ma ini bori i vaia ma i vikeresiana.

<sup>6</sup> Ma wei ravai i nei ai ma Apasol nimai tau i au tepai i terei ma i raupariei.

<sup>7</sup> Anina ma God riwana i vituai ma au Jerusalem rava maḡamaḡau i Iesu i vitumaḡanei, ma nanare pirisi maḡamaḡau i vitumaḡana.

*Stephen i pani*

<sup>8</sup> Anina ma God Stephen i viaiaini ma i vovai-virewapani da mataira ma kaua babai i kaukauei rava awari.

<sup>9</sup> Wate mai Jew ḡelau i provins nununai i nei mai au Sairini, mai Alexandria, ma Silisia ma Eisia ai parinumana e ḡoreḡorei panipani \*waduboi, Stephen ana ḡavia i vomairi.

<sup>10</sup> Wate Arua Vivivireina, Stephen nuaulaula ma riwa i verei ma i bababani da tau i i vigamopotai.

<sup>11</sup> Lamna aubaina tau i rava ḡelau i gwalai da moruei Stephen ita vibenabenamei, ma ita riwa, “Tauai a nonori Stephen, Moses ma God i vivijiboḡi.”

<sup>12</sup> Ma lamnei patara i viamlo-ḡaiḡaini, dogadogara ma tarawatu babadai maiteni. Anina ma tau i Stephen i vojijini ma i naiei mai Jew ai Boru Ḡeḡetelarana† awarina.

<sup>13</sup> Ma tau i rava ḡelau i nei ai da moruei Stephen i vibenabenamei, ma i riwa, “Wei ravana mara patapatana Tempol vivivireina ma Moses ana tarawatu i vivijiboḡi.

<sup>14</sup> Tauai a nonori i riwa da Iesu Nasaretei tempol ina rikai ma tarawatu Moses i verevereta anatapui maiteni ina virai.”

<sup>15</sup> Ma rava anatapui nai au boruna i kiakiala, Stephen i 'nana-tunutunui, ma i 'nanai da tauna naona i lalalai me anela.

**7**

*Stephen ana babani.*

<sup>1</sup> Anina ma Pirisi ḡeḡetelarana Stephen i paridadanei, “Wei viwavuna, riwa kaua bo?”

\* **6:9:** Wei ravai lamna *slave waduboi, marina i voterei da ana ḡoanei e mamea.*

† **6:12:** Sanhedrin.



2 ☆Stephen i paribelei:

Varevareiu ma amamau, au babani ona rautaniġanei. God boruborumana noita Abraham awarina i eġa au Mesopotamia, muriai da ita nae au Haran.

3 Ma God tauna i riwei, *Am dobu ma am dam ma netawanei da ma nae dobu ana viatataiem lana.*

4 ☆Anina ma Abraham Mesopotamia i netawanei ma i nae da au Haran i mae. Amana i raġe ma au murina God Abraham i paritawanei da marina dobuna o mamae lana kampa ita mae,

5 ☆Nai maranaina God eġa Abraham doa ita verei, eġa aburu dadadana! Wate i parivainuaġani, da ina verei tauna ma ana epaepaia aubaii. Nai au marana Abraham eġa natunata,

6 ☆ma God wenanare Abraham i riwei, *Am epaepaia au dobu ġela ina mae ma ina vitaunola, nai dobuna ravai tau i nau-iviapoapoele da madeġa 400 ina kwa.*

7 ☆ *Wate ravai, awarii e vivitaunola ana kovoġi, ma muriai mai Israel ina opui ma wei au dobuna ina voepaepaiu.*

8 ☆Anina ma God inibori parivai-nuaġanana bagibagina Abraham maiteni i kauei, ma maranai Isaac i tupua ma au pom vi-8-na Abraham natuna inina i bori. Muriai Isaac natuna Jacob inina i bori, ma nanare Jacob natunata 12 anatapu i inii i bori. Wei babadai lamna tauta noinoita.

9 ☆Jacob natunata vare i Joseph i unurei ma i gimarei da ita vitaunola au Egypt, wate God tauna awarina i mae.

10 ☆Ma ana au nuabola i gagaloei. Ma God nuaulaula i verei ma i kauei da Egypt ai gulau nuanuana i vaia, anina ma i terei da Egypt i vibadei ma ana numa orana i vibadei.

11 ☆Ma gomara ġaeġaena i ġeta au Egypt ma au Canaan, ma vinuapoapoe ġaeġaena i tupua. Ma noinoita eġa ai lam.

12 Ma maranai Jacob i nonori da au Egypt lam, ma noinoita i paritawanei au Egypt, wei ai babara naona.

13 Ma muriai i nae me ma wei maranai Joseph i vieġana-melei varevareina awarii, ma kampa mai Egypt ai gulau Pharaoh, Joseph ana numa ravai i aramanei.

14 ☆Anina ma Joseph riwa i paritawanei amana Jacob awarina ma i riwei da ana numa ravai anatapu, ai maġa 75, ita nei au Egypt.

---

☆ 7:2: Gen 12:1 ☆ 7:4: Gen 12:4 ☆ 7:5: Gen 12:7; 13:15; 17:8 ☆ 7:6: Gen 15:13-14 ☆ 7:7: Exo 3:12 ☆ 7:8: Gen 17:10-14; Gen 21:2-4; Gen 25:26; Gen 29:31-35:18 ☆ 7:9: Gen 37:28; Gen 39:2-21 ☆ 7:10: Gen 41:39-41 ☆ 7:11: Gen 42:1-2 ☆ 7:14: Gen 45:9-10, 17-18

15 ✨Anina ma Jacob i nae au Egypt. Tauna kampa i'raḡe ma nanare natunatuna anatapoi.

16 Taubeui i naiana-melei au Shekem ma Abraham Hamor natunatuna awarii kokoaga i gimagimaraia, kampa i vimataveni.

17 ✨Maranai mara i tuḡereḡerei da God Abraham i paripari-vainuaḡania ita kauēi, ata patara i maḡa guratana au Egypt.

18 Ma Pharaoh vouna au Egypt i vibada ma tauna noita Joseph eḡa ita aramanei.

19 ✨Tauna amamata i morui ma i rau-iviapoapoelei, i egari da natunatui melamelai numei i viopuni da ita iraḡe.

20 ✨Wei au marana Moses i tupua, tevera inanana aiaina. Amana ma alona natui i ḡamoi da nawaravi tonuḡa i kwa.

21 ✨Ma maranai tevera numei i tere-opunei, gulau natuna guguinina tevera i vaia ma i ḡamoi da natuna.

22 Ma mai Egypt ai nuaulaula Moses i viararamani ma i virewapana, babani ma nola awarina.

23 ✨Moses ana madeḡa 40 ma i nota da ita nae ana dam ravai ita raugenari.

24 Ma i 'nanai da Egyptei, Moses ana rava oina i raviravi, ma tauna turana bainei Egyptei i vunui da i viraḡeni.

25 Moses i notai da ana rava ita aramanei da God tauna i paritawanei da ita agui da Egypt ita oputawanei. Wate tau i wei eḡa ita aramanei.

26 Ma maratamna Moses i nae me ma ana rava ruaḡa i viḡaiḡaiawa i 'nanai, ma i riwei, "Taumi ava ma aiwai aubaina o viḡaiḡaiawa?"

27 Wate ḡaiawa tauvikareina Moses i vokaririei ma i riwei, "Tam aiai i terem da ma vibadelai bo tauai ai taurauetara?"

28 Tam ma viraḡeniu me pom Egyptei u viraḡeni nanare bo?"

29 Maranai Moses wei i nonori tauna Egypt i ruba-tawanei ma i nae au Midian, wei eḡa ana dobu wate kampa i mae. Muriai do buna wavinena i ravaḡi ma natunatuna nelarai ruaḡa i tupua.

30 ✨Ma kampa i mae madeḡa 40 i kwa ma BADA ana anela au mutulua ola Sinai au ḡereḡerena tauna awarina i eḡa, inanana me ai menamenana ai aburuna rugurugui au orana i ḡeḡae.

31 Wei i 'nanai ma i baei ma i nae au ḡereḡere da ai arata ita tuvirevirei ma i nonori BADA i riwa i pa,

✨ 7:15: Gen 46:1-7; Gen 49:33 ✨ 7:17: Exo 1:7-8 ✨ 7:19: Exo 1:10-11; Exo 1:22

✨ 7:20: Exo 2:2 ✨ 7:21: Exo 2:3-10 ✨ 7:23: Exo 2:11-15 ✨ 7:30: Exo 3:1-10

32 “Tau amamam ai God, Abraham ma Isaac ma Jacob ai God.” Maranai Moses wei i nononori i rovo kaukaua ma naona i tere-govaḡi.

33 Ma BADA i riwa, “Am ae uma ma votawane! Wei gabuna au tepana e maimairi, lamna doa vivivireina ma Viaiainana.

34 A inanai menanare mai Egypt, natunatu e rarau-iviapoapoelei. Ai ora-tou a nonori ma a ḡairai da tau i ata vai-tawane. Ma marina ma nei, Tau ana paritawanem au Egypt.”

35 ☆Stephen i riwa:

Wei Moses na tagogina, mai Israel i parivirevirei i pa, “Aiai i terem da tauai ma vibadelai ma ma rauetarelai?” Moses i paritawaneiai da ita vibademi ma ita tereopunemi, anela i eḡaeḡa ai menamenana au poui, ana aguei.

36 ☆Ma Moses tau i Egypte i ravena-opunenei ma mataira babai ma vivirewapanai i kaukauei au Egypt, Boga lebalebairina ma ai au vaḡai madeḡa 40 au mutulua.

37 ☆Wei Moses-na tagogina, mai Israel i riwei, “God muriai peroveta ami damei ina paritawaneiai me tau.”

38 ☆Moses Israel patarana maiteni Egypt i opu-tawane i vitagogiei au ola Sinai ma anela Moses awarina i bababani, tauna kampa noinoita maiteni. Ma riwa mamae-nonoana i nonori ma wei lamna i veredamanei tauta awarita.

39 Wate noinoita Moses i parivirevirei ma au orai i ḡoei da ita nae me au Egypt.

40 ☆Ma tau i Aaron i riwei, “Nai ravana Moses, Egypte i taravai-opunelai, tauai eḡa ata aramanei aiwai awarina i tupua. Ma tauai ai god kokoitau ma kauei da ina rauetaraveniai.”

41 ☆Anina ma bulumakau ḡaubona kokoitauna i kauei, ma pulo i apui awarina ma i amei ma i umei, da aiwai uraiei i kaukauei i vimae-ḡaeḡaeni.

42 Wate God tau i mae-puputei ma i voterei da ubona ma nawaravi ma madeḡa au mara i vimae-ḡaeḡaeni. Wei lamna peroveta nununai i ririweia i tupua:

*Rava mai Israel! Maranai madeḡa 40 au mutulua.*

*Taumi eḡa Tau awariu ḡamoḡamo ota vunui ma ota apui tapa?*

43 *Taumi ami god Molek ana numa gara ma ami ubona god kokoitauna Rephan o avarai.*

*Kokoitau o kauei da ota vimae-ḡaeḡaeni.*

*Lamna aubaina rava borui ami au dobu ina vainimi ma ina naiemi aueia,*

*Babilon ina netawane i dobu au ḡelauna. (Amos 5:25-27)*

☆ 7:35: Exo 2:14 ☆ 7:36: Exo 14:21; Num 14:33 ☆ 7:37: Deu 18:15, 18 ☆ 7:38: Exo 19:1-20:17 ☆ 7:40: Exo 32:1 ☆ 7:41: Exo 32:2-6

44 ☆ Noinoita, God ana numagara, i avarai maranai au mutulua i mamae. Moses wei i voai, me God i viatataiei nanare.

45 Muriai Joshua noinoita i rau-etaraveni ma God ana numagara i avarai ma ana aguei i rui ma nai dobuna ravai i viopuni ma ai dobu ta vaia. Ma numagara kampa i mae da gulau David ana au mara.

46 ☆ God, David nuanuana i vai-kauei ma David i vibağa da tauna God ana numa ita voai.

47 ☆ Wate David eğa numa ita voai ma natuna Solomon numa i voai.

48 Wate God ġeġetelerana eğa rava uranei numa ita voavoai au orana ita mamae, me peroveta wariğa i riwa i pa:

49-50 *Aubaina Tau aiwai anatapuna au mara ma au dobu a kauei. Tapa?*

BADA i riwa, “Mara\* au anikiala ma dobu aeu kareu aniterenana.

Wate numa aiwaina ona voai tau aubaiu? Eġatenil!

Tau au animae-kaua mepa? Eğa mepa! (Isaiah 66:1-2)

51 Ma Stephen i riwa:

Taumi orami badobadoi. Ma eğa ota ġoeġoei da God ona voteletelei ma taniġami o vopotai da ana riwa eğa ota nononori. Taumi Arua Vivivireina o viviġaviei me noinoimi i kaukauei nanare.

52 Noinoimi metau perovetai eğa ita rau-iviapoapelei. Wariğa perovetai, God ana tauvilawana, ana nei i vinolenolei; Wate noinoimi wei perovetai maiteni i viraġeni. Ma marina Tauna i nei ma o vibenabenamei ma o viraġeni.

53 God ana anela i paritawaneiai da ana tarawatu noinoita i verei, wate taumi tarawatuna eğa ota voteletelei.

*Stephen ġaimei i viraġeni*

54 Maranai babada wei riwana i nonori ma i meji guratana ma ivoi i uta-ġiriġiriei Stephen awarina.

55 Wate Arua Vivivireina Stephen orana i oai, i taepai au mara ma God ana boruma i ’nanai, ma Iesu God au oiena i maimairi.

56 Ma i riwa, “Ona inana! Mara metaetana i wanatawanei ma Raya Natuna a inainanai God au oiena e maimairi.”

57 Marina tau anatapui taniġai i vopotai, i vigaragarei ma Stephen aubaina i ruba,

58 ma i taina-opunei au doa, taon i opu-tawanei da au ririva ma ġaimei ravina i vikarei. Ma tauviwavu ai kwama i votawanei ma tevera laragana wavana Saul au aena i vidamni.

☆ 7:44: Exo 25:9, 40 ☆ 7:46: 2Sa 7:1-16 ☆ 7:47: 1Ki 6:1-38 \* 7:49-50: Wei anona lamna Bada wenanare natuna i riwei, “Tam au oieu ma kiala ma am ġaviau au ae kareu ana tuvaideoedoei”

<sup>59</sup> Taui i virauraei ma tauna i raupari i pa, “BADA Iesu, aruau ma vaia!

<sup>60</sup> Ma ae-tutunei i peu ma i garara, “BADA ai gō’apoapoe ma nota-tawanei.” Wenanare i riwa ma i’raḡe.

## 8

<sup>1-2</sup> Ma Saul kampa da Stephen ana iraḡe i ’nanai ma i vianinei. Rava patupatutui ḡelau ana toutoui ma ana tarak-watui i nei ma Stephen taubeuna i naiei ma au kokoaga i terei.

### *Saul Ekalesia i rau-iviapoapoelei*

Nai maranaina rau-iviapoapoe ḡaeḡaena i vikarei ekalesia awarii au Jerusalem, Ma anapui i viruba-tomana au Judea provins ma Samaria provins. Apasol ava au Jerusalem i mae.

<sup>3</sup> \*Wate Saul i vikarei da ekalesia ai boru ita viamoai. Numa anapui i ruini ma nelara ma waivine i taina-opunei ma i paritawanei au panipani-numana.

### *Philip au Samaria*

<sup>4</sup> Wate tauvitumaḡana Jerusalem i rubaruba-tawanei taon ma dobu anapuna i naeni ma Riwana Aiaina i raugugulei.

<sup>5</sup> Ma Philip i nae au taon tagogi au Samaria ma kampa BADA ana Vinevine Keriso i raugugulei.

<sup>6</sup> Maranai patarana, Philip i raraugugula i nonori, ma i ’nanai kua babai ma mataira ḡaeḡae i kaukauei tau anapui orai taputapunei i rautaniḡana.

<sup>7</sup> Tauna arua-apoapoei rava maḡamaḡau i orai i egari da ana garagararai i viopuopuana, ma nanare rava maḡamaḡau gwaḡagwaḡai ma sigesigei i vilawani.

<sup>8</sup> Ma nuai i ḡaeḡaena i mae nai au taona.

### *Simon tauna barabaravuna*

<sup>9</sup> Wenanare, nai au taona oroto tagogi i mae wavana Simon, ma tauna wariḡa ava ana baravu i kaukauei ma mai Samaria i baibaiei. Ma i voepaepana-melei da tauna rava ḡaeḡaena.

<sup>10</sup> Rava labalababa, ma wavai naenaei anapui ana babani i rarautaniḡana-kauei ma i ririwa, “Tauna, God ana rewapana e ḡoreḡorei, Rewapana ḡaeḡaena.”

<sup>11</sup> Taui i vineneḡanana-kauei aubaina mara nonoa tau Simon ana baravu i baebaei.

<sup>12</sup> Wate tau Philip i vitumaḡanei maranai, God ana vigulau Riwana Aiaina ma Iesu Keriso rava awari i raugugulei. Ma lamna aubaina nelara da waivine i nei da i babataito.

13 Simon maiteni i vitumaḡana ma i babataito. Ma Philip mepa i nenaē tauna kampa aubaina kaua babai ma mataira vivirewapanai i kaukauei. Tauna wei pulona i bana-kauei.

14 Maranai Apasol au Jerusalem i nonori da mai Samaria, God Riwana i vitumaḡanei, tauī Peter ma John i paritawanei awari.

15-16 Ma au Samaria i ḡeta ma tauī i raupariei da Arua Vivivireina ita rui au orai. Aubaina tauī Iesu wavanei ava i babataito. Ma arua vivivireina eḡa ita rui.

17 Peter ma John urai tauī au tepai i terei ma i raupari da Arua Vivivireina au orai i rui.

18 Maranai Simon i 'nanai da mai Samaria Arua Vivivireina i vaia, maranai Apasol urai au kolai i terei, ma Simon mane i vilololoi,

19 ma i vibaḡa i pa, “Tau maiteni nai rewapanana ma vereu da rava au kolai urau ana terei ma tauī Arua Vivivireina ina vaia.”

20 Wate Peter i paribelei i pa, “Anina da God tam am mane maiteni ina tawanem ai au menamenana, aubaina tam e notanotai da God ana pulo manelei ma gimarai!

21 Tam wei nolana au orana am gabu eḡa ita mamae, aubaina oram eḡa ita ai God au matana.

22 Am nota apoapoe ma votere-tawanei. Ma mae-tavirem BADA awarina ma ma vibaḡai da am nota apoapoe ina nota-tawanei.

23 Aubaina a inanim da unura oram i oai tauai awariai ma wei notai apoapoei e panipanim.”

24 Simon marina Peter ma John i riwei, “Aubaiu BADA awarina ona raupari da aiwai o ririwei eḡa ina tupua awariu!”

25 Ma Peter ma John ai lawana ma BADA Riwana Aiaina ekalesia voui awari i raugugulei. Ma i raugugula nae Mai Samaria ai au taon nununai da i ḡeta au Jerusalem.

### *Philip ma Ethiopiei*

26 Mara tagogi BADA ana anela, Philip i riwei, “Ma vokaukaua ma ma nae au rauanaḡei, etanai au Jerusalem da e ḡaiḡaira au Gaza.” (Wei etanaina lamna au mutulua).

27 Anina ma Philip i vokaukaua ma i nae. Ma wei au etanaina oroto Ethiopiei i 'nanai. Tauna mai Ethiopia ai kwin Kandake, ana mane taupainina. Wei orotona i nae au Jerusalem God viborumana aubaina,

28 ma i nenaē-me ana au dobu. Ma ana au chariot i kiala ma wariḡa peroveta Isaiah buka i girugirumia i 'aiavi.

29 Ma Arua Vivivireina Philip i riwei, “Ma nae ma chariot au ririvana ma babara-nae.”

30 Anina ma Philip i ruba chariot au ririvana ma i nonori badana peroveta Isaiah ana buka i 'aiavi. Ma Philip i paridadana, "Aiwai e iaiavia e araramanei bo eġa?"

31 Orotona i paribelei, "Menanare ana 'ramananei mepa da rava eġa ita parivai-araramaniul!" Ma Philip i vibaġai da i ġeta da au ririvana i kiala.

32 Buka au orana, wei riwana i 'aiavi,  
*Tauna i taravaina-naiei me sipu viragēnana aubaina  
me sipu natuna e genuenuana maranai aparana e boribori,  
tauna eġa aiwai ita latoni.*

33 *Tauna i vijibogī ma i viminalamalai ma eġa ita kauana-kauei  
awarina.*

*Aiai ana epaepaia ina babaniei.*

*Aubaina ana mara au dobu i vaitawanei." (Isaiah 53:7-8)*

34 Ma orotona, Philip i paridadanei, "Isaiah e babaniana-melei bo rava ġelauna e babaniei?"

35 Ma Philip, wei riwana awarina i vikarei ma riwa ġelau i maiteni ma Iesu Riwana Aiaina i viararamani.

36 Ma i nenaē da waira i 'nanai ma Ethiopiei i riwa, "Ma inana waira noi, aiwai aubaina da eġa ana babataito?"

37 \*

38 Badana, chariot taurubeina i riwei, "Chariot ma vojijini" Ma tauna ma Philip i ġaira waira au orana ma Philip, badana i babataitoi.

39 Maranai wairei i ġeta, BADA Aruana maratagogi Philip i vaitawanei ma turana eġa ita inana-melei, ma ana morelanana i nae ana au dobu.

40 Wate Philip au Asotus i raueġa ma dobuna i naeni ma Riwana Aiaina i raugugulei da au Caesarea taon i ġeta.

## 9

*Saul i vitumaġana*

1 Wate Saul amapo da i mejimeji ma i ġoeġoei da BADA ana tauvitumaġana ita viragēni. Ma i nae Pirisi Ġetelarana awarina,

2 ma i vibaġai da pepa ita girumi boru-numai babadai awarii au Damaskas da rewapana ita verei da Iesu ana etanai tauvitumaġanai, nelara ma waivine ita pani ma ita neiai au Jerusalem.

3 Ma Saul, Damaskas i tuġereġerei, nanare ma lalalaina marei i ġairai da tauna i ravilalai.

4 Tauna i peu au doa ma pona i nonori awarina i babani i pa, "Saul, Saul! Aiwai aubaina e rarau-iviapoapoeleu?"

5 Saul i paridadana, "Tam aiai bada?"

\* 8:37: Buka wadubo nonoana vs 37 eġa ita mamae.

Ma pona i paribelei, “Tau Iesu, tauna e rarau-iviapoapoelei!

<sup>6</sup> Marina ma vomairi ma ma rui au Damaskas, ma kampa aiwai ina riwem ma kauēi.”

<sup>7</sup> Nelara Saul maiteni i nēnāe i mairi kwakwa, ana gamopotai, tauī pona i nonori wate eḡa aiāi ita inānai.

<sup>8</sup> Ma Saul au doa i matamatave i vomairi ma matana i kala, wate eḡa aiwai ita inānai. Ma ana rava i raunimavoai ma i taravaina-naiei au Damaskas.

<sup>9</sup> Ma au pom tonuḡa eḡa ita inana, eḡa ita am bo ita uma.

<sup>10</sup> Au Damaskas tauvitumaḡana i mae wavana Ananias. BADA ana au inana i viatataiei i pa, “Ananias!”

Ma i paribelei, “Bada, tau weka!”

<sup>11</sup> BADA tauna i riwei, “Etanai wavana Etanai Jijimanina ma vaia da Judas ana au numa, kampa oroto Tarsusei wavana Saul ma baiei. Tauna marina e raraupari awariu.

<sup>12</sup> Ma ana au inana i ’nanai oroto wavana Ananias i nei awarina ma urana au inina i terei da ita inana-me.”

<sup>13</sup> Wate Ananias i paribelei, “Bada, rava maḡamaḡau i riweu da wei ravana ana kaua i apoapoe kaua tauvitumaḡana awarii au Jerusalem!”

<sup>14</sup> Ma weka i nei pirisi ḡaeḡaei ai rewapanēi da aiāi wavam e viviborumei ina pani.”

<sup>15</sup> Wate BADA, Ananias i riwei, “Ma nae! Tau a vinei da aubaiu ina vitaunola ma wavau ina jimei, Jentail ma ai gulagulau awarii ma nanare mai Israel awarii.

<sup>16</sup> Tau ana viatataiei da aubaiu ina jima ma rau-iviapoapoe ḡaeḡaena ina nei awarina.”

<sup>17</sup> Anina ma Ananias i ḡeta au numa ma i rui. Ma urana Saul au tepana i terei ma i riwei, “Vareiu Saul, BADA Iesu, Tauna au etanai awarim i eḡa maranai weka u nenei, i paritawaneu awarim da ma inana me ma Arua Vivivireina oram ina vioai.”

<sup>18</sup> Maratagogi purapura inānana me iana wenavina au matana i peu, ma tauna, inana me. Ma i vomairi ma i babataito.

<sup>19</sup> Ma i am ma ana rewapana i vai-melei.

*Saul au Damaskas i raugugula*

<sup>20</sup> Ma tauna maratagogi i nae ma pari au numai i raraugugula da Iesu anina God natuna.

<sup>21</sup> Tauī aiavoī da Saul i nonori i ba kaua ma tauī ava i babani vivira i pa, “Wei ravana tagogina, rau-iviapoapoe ḡaeḡaena Iesu ana tauvitumaḡanaī awarii i kaukauei au Jerusalem bo? Tauna i nei weka nolana tagogina aubaina da tauvitumaḡana ita pani ma ita naiei Pirisi babadai awarii bo.”

<sup>22</sup> Wate Saul ana raugugula i virewapana kaua ma lamnei mai Jew au Damaskas i aramaneī da Iesu anina Keriso, Vinevirena, ma lamna aubaina ana babani eḡa ita parivirevirei.



23 Ma au pom biağa au murina Jew babadai i viogatara da Saul ita virageņi.

24 Mai Jew marai ma waguvarai taon garina au metaetana i vipaipai da Saul ita virageņi. Wate Saul ai ogatara riwana i nonori.

25 Ma waguvarai tauvitumağanai ģelau ai bada Saul i taravaini ma iriga ģaeģaena au orana i poai ma gavogavo aburuna taon au garina, kampa ģuravei i tere-ģairei au doa ma i ruba.

26 Saul i ģeta au Jerusalem ma maranai i ģoei da tauvitumağanai ai au boru ita rui. Wate tau i roveoi ma eģa ita vitumaģane i da tauna Iesu ana tauvotaģotaģo.

27 Wate Barnabas tauna i taravaini ma i naiei Apasol awarii, ma i riwei menanare au etanai Saul, BADA i 'nanai ma aiwai awarina i babaniei. Ma menanare au Damaskas ana tepatorana i raugugula Iesu wavanei.

28 Anina ma tau i Saul i taravaini ma maiteni i mae ma Jerusalem i naeni ma ana tepatorai i raugugula BADA wavanei.

29 Ma nanare Saul mai Jew pona Greek taubabanieina maiteni i babani ma i viparipariģai, ma tau i viogatara da tauna ita virageņi.

30 Maranai tauvitumaģana ģelau wei i nonori, ma Saul i taravaina-naiei au Caesarea da i paritawanei au Tarsus.

31 Anina ma ekalesia au Judea, Galili ma Samaria ana nuubaii i mae. Ma Arua Vivivireina ana aguei ekalesia ai tumaģana i vovai-virewapani, Ma ai boru i rarata, ma tau BADA i vivirana-kauei.

### *Aeneas ma Dorkas*

32 Nai maranaina Peter dobu maģamaģau i naeni, ma God ana tauvitumaģana awarii i ģeta au Lidda.

33 Kampa oroto wavana Aeneas i nelaģai, tauna gwaģagwaģana madeģa 8 ana au aravi i matave.

34 Peter i riwa, "Aeneas, Iesu Keriso i vilawanim! Ma vomairi ma am aravi ma noui!" Ma maratagoģi i lawana.

35 Anina ma rava maģamaģau au Lidda ma Sharon wapuna melagaina, i mae-tavirei BADA awarina.

36 Au Joppa tauvitumaģana tagoģi wavana Tabitha (Greek ponanei lamna Dorkas) tauna marana patapatana kaua maģamaģau aiaii i kaukauei molamokai aubaii.

37 Wei marana tauna i doria ma i'raģe ma tupuana i oģai ma numa vatavatara au aidamo, i vimataveni.

38 Lidda, lamna Joppa au ģereģerena ma maranai tauvitumaģana i nonori da Peter au Lidda, tau ai rava ruaģa i paritawanei da Peter i egari i pa, "Laģilaģina ma nei!"

<sup>39</sup> Ma Peter tau i maiteni i nae da i ġeta ma i taravaina-ruiei au numa vatavatara. Kaikaiababa maġamaġau ana toutoui Peter i mairi kwaviviroi. Maranai Dorkas lawalawaina ma kwama da gara i popopoa Peter i viatataiei.

<sup>40</sup> Wate Peter anapui i vibaġai da i opu au doa, ma aetutunei i mae-ġaira ma i raupari, ma taubeu i riwei, “Tabitha, ma vomairi!” Tabitha matana i kala ma maranai Peter i ’nanai, i vomairi da i kiala.

<sup>41</sup> Peter urana i viloloi ma i voagui da i vomairi. Ma tauvitumaġana anapui ma kaikaiababa maiteni i kwatueiai, ma wavine lawalawaina tau i verei.

<sup>42</sup> Ma wei riwana dobu Joppa i naeni ma rava maġamaġau Iesu i vitumaġanei.

<sup>43</sup> Peter au Joppa i mae au pom biaga nanare Simon ġamoġamo opina taurauġaroġroeina ana au numa.

## 10

### *Peter ma Cornelius*

<sup>1</sup> Au Caesarea oroto\* wavana Cornelius, tauna mai Italy sorodia boruna ai bada.

<sup>2</sup> Tauna rava jijimanina ma patupatutuna, ma ana numa ravai maiteni God taurauduneleina. Ma molamolakai i paipaina-kauei ma marana patapatai i raraupari God awarina.

<sup>3</sup> Au bigai tagogi 3 oklok nanare i raraupari ma ana au inana, God ana anela au aiaina i ’nanai, i nei awarina ma i riwa, “Cornelius!”

<sup>4</sup> Cornelius ana rovona anela i ’nana-tunutunui ma i riwa, “Au bada, menanare!”

Ma anela i paribelei, “Am pari ma am verena molamolakai awarii, i ġeta God awarina me pulo apuapunana ġabuna.

<sup>5</sup> Ma marina nelara ġelau ma paritawanei au Joppa ma ravana wavana Simon wavana ġelauna Peter ina taravainiai.

<sup>6</sup> Tauna rava wavana Simon, ġamoġamo opina taurauġaroġroeina awarina e mamae gera au ririvana.”

<sup>7</sup> Maranai anela i nae, Cornelius ana taunola ruaġa i ġoreiai, ma ġelauna lamna sorodia, tauna ana tauvipaipai, tauna God tauvitumaġaneiana.

<sup>8</sup> Tauna aiwai anapuna tau i riwei ma i paritawanei au Joppa.

### *Peter Cornelius i raugenari*

<sup>9</sup> Maratomna au benai nanare maranai nelarai Joppa i tuġereġerei, Peter i ġeta numa au tepana da ita raupari.

<sup>10</sup> Ma am i ’raġe ma i ġoei da aiwai ita ani, maranai tau lam i vovokaukauei, ma Peter matanei rauboni i ’nanai.

\* **10:1:** Wei ravana jentail.

11 I 'nanai mara i wanatawanei ma purapura inanana me puru gāeāena au adana 4 i vojijini ma marei i tere-gāireiai au dobu.

12 Au orana lamna sia tapuna ma tapuna, tetetei me mota ma kiu au aidamo lavelavei.

13 Ma pona i riwa, "Peter ma vomairi, ma viraḡena ma ma am!"

14 Wate Peter i paribelei, "Eḡa! Lamna eḡa melanai ana kauēi. Eḡa melanai lam viviḡana ata am-dadani."

15 Wate pona i babani me, "Aiwai God i viviaiainia, eḡa ma riwa da i apoapoe."

16 Mara tonuḡa wenanare i tupua ma me marana puruna i ḡaiana-melei au mara.

17 Ma Peter aiwai i 'nainanai anona i vinua-notenotei, nanare ma Cornelius nelara i paripari-tawanei, tau Simon ana numa i nelaḡai ma i ḡeta ana au metaeta.

18 Tau i paridadana, "Weka rava wavana Simon-Peter e mamae bo eḡa?"

19 Peter amapo da wei i vivinua-notenotei maranai Arua vi-vivireina i riwa, "Simon, nelara tonuḡa e baibaieim!

20 Lamna aubaina ma vomairi ma ma ḡaira au gabaura, eḡa ma geduai, aubaina tau a paritawanei awarim."

21 Peter i ḡaira ma awarii i riwa, "Tau mi tau o baibaieu bo, Ami ḡoana aiwai?"

22 Ma nelarai i paribelei, "Tauai Cornelius mai Rome ai sorodia ai bada i paritawanelai, tauna rava jijimanina ma God tauvoepaepana, ma mai Jew maḡamaḡau tauna e vivivirei. Anela vivivireina i riwei da uta nei ana au numa da aiwai u araramanei uta riwei."

23 Ma Peter nelarai i ḡorei da i rui au numa ma kampa i matave.

### *Peter Cornelius ana au numa*

Ma maratamna anapui i nae, Tauvitumaḡana ḡelau i au Joppa maiteni i vomairi.

24 Ma au pom ḡelauna tau i au Caesarea i ḡeta. Cornelius tau i paipaini, ma ana numa ravai ma ana rava i ḡorei da i nei.

25 Ma maranai Peter i ruirui au numa, Cornelius Peter i 'nanai ma i mae-ḡaira au ae karena ma ana vivirana i raudune.

26 Wate Peter tauna i voepai ma i riwa, "Ma vomairi, Tau rava ota me tam."

27 Peter ma Cornelius i bababani ma i ruirui au numa. Ma i 'nanai da patara tauna i paipaini.

28 Peter tau i riwei, "Tau mi o aramana-kauēi da tauta mai Jew ata tarawatu e viviḡaeta da Jentail maiteni tana mae-gogona bo tana raugenari. Wate God i viatataieu da eḡa rava ana ḡorei rava apoapoena bo miramirana.

29 Lamna aubaina maranai u vibaḡaiu da ata nei, Tau au nota aiainei a nei. Tau ata pari-dadanem, Marina ma riweu aiwai aubaina au riwa u paritawanei?”

30 Cornelius i paribelei, “Au benai wenanare au pom 4 marina i kwa, au numa a raraupari, nanare ma rava ana gara ararapoirina ma namanamarina au naoiu i raumairiei.

31 Ma i riwa, ‘Cornelius! God am pari i nonori ma am verena molamolakai awarii i vinuiaiiei!

32 Ma nelara ma paritawanei au Joppa da Simon e ḡoreḡorei Peter awarina. Tauna Simon, ḡamoḡamo opina taurauḡaroḡaroena ana au numa e mamae.’

33 Lamna aubaina da am riwa laḡilaḡina ava a paritawanei, ma i ai da tam u nei. Tauai anatapuiai marina weka God au matana a vivipapai da BADA aiwai i riwem ana nonori.”

### *Peter ana babani*

34 Ma Peter babani i raukarei, “Marina a inana-kauei da God rava anatapui e vaivaia da tagogina.

35 Wate dobu dobuai ravai God e vivivirei ma kaua aiiai e kaukauei, Tauna wei ravai e ḡoeḡoei,

36 Taumi o aramanei God Riwana Aiaina i paritawanei mai Israel awarii da rava ina mae-kaua God maiteni, maranai Iesu Keriso ina vitumaḡanei ma tauna ai lawana ina vibadei.

37 Taumi o aramanei Iesu aiwai i kauei Judea au anatapuna, au Galili i vikarei maranai John babataito ai kaua i raugugulei.

38 God Arua Vivivireina ma rewapana Iesu Nasaretei i verei da dobu maḡamaḡai i naeni ma kaua aiiai i kaukauei, ma rava au orai arua apoapoe i ruiruini, i vilawani.

39 —Aiwai anatapuna au Judah provins ma au Jerusalem i kaukauei tauai anatapuiai a vimatematei ma a bababaniei. Tauna au korosi i tutui da i’raḡe.

40 Wate God tauna iraḡelei i voepa-melei aupom au vitonuina ma i kauei da ḡelauai awariai i eḡa.

41 Eḡa rava maḡamaḡai tauna ita inanai, anina tauvimata-mata i vinevinei awari ava i ḡeta. Lamna tauai maiteni a uma ma am ana vomairi au murina.

42 Ma i egariai da dobu au anatapuna ana raugugula ma ana jima da God Iesu i vinei da rava anatapui lawalawaii ma irairaḡei ina rauetarei.

43 Peroveta anatapui ijimei da maranai rava Iesu i vitumaḡanei, Tauna wavinei God tauai ai ḡo’apoapoe ina vaitawanei.”

44 Maranai Peter i bababani ma Arua Vivivireina i ḡairai ma rava i raurautaniḡana i vioai.

<sup>45</sup> Ma mai Jew Joppei i nenei Peter maiteni, i ba kaua maranai God Arua Vivivireina i paritawana ġairei Jentail awarii.

<sup>46</sup> Au baina mai Jew i nonori tau i pona tapune i bababani ma God i vivimae-ġaeġaeni. Anina ma Peter i riwa,

<sup>47</sup> “Tau i Arua Vivivireina i vaia me tauta. Wei lamna aubaina eġa aiai ina viġaeta da wei ravai tana babataitoi.”

<sup>48</sup> Ma tau i Cornelius ana numa ravai maiteni ma ana rava ġelau i Iesu Keriso wavane i babataitoi, ma tau i Peter i vibaġai da maiteni ita mae mara aburuna.

## 11

### *Peter ana babani*

<sup>1</sup> Apasol ma tauvitumaġana au Judea provins i nonori da Jentail maiteni God riwana i nonori ma i vitumaġana.

<sup>2</sup> Ma maranai Peter i ġeta me au Jerusalem tauvitumaġana mai Jew ġelau tauna i eni i pa,

<sup>3</sup> “Tam Jentail ai au numa u rui, ma maiteni u am!”

<sup>4</sup> Anina ma kaua menanare i tuputupuane i anatapura Peter tau i parivere i:

<sup>5</sup> I riwa i pa:

Maranai a raraupari au Joppa ma matauei kaua a inanai, ma purapura inanana me puru ġaeġaena adana 4 i vojijini ma mare i tere-ġaireiai awariu.

<sup>6</sup> Au orana a inana lamna ġamoġamo maramaraġamai ma moduei, tetetei me mota ma kiu au aidamo lavelavei.

<sup>7</sup> Ma pona a nonori i pa, “Peter ma vomairi, ma viraġena ma ma am!”

<sup>8</sup> Tau a paribelei, “Eġa! Lamna eġa melanai ana kauei. Eġa melanai lam viviġana ata am-dadani.”

<sup>9</sup> Wate pona mare i mara viruaina i babani, “Aiwai purapurana God i riwa da i ai, tam eġa ma riwa da i apoapoe.”

<sup>10</sup> Mara tonuġa wenanare i tupua, ma puruna i ġaiana-melei au mara.

<sup>11</sup> Nai maranaina mai Caesarea ai rava tonuġa i pariparitawaneiai, au metaeta i raumairiei.

<sup>12</sup> Ma Arua Vivivireina i riweu da eġa aiwai ana notai ma orau taputapune i ana nae. Mai Joppa tauvitumaġana 6 maiteni a nae ma ravana ana au numa a rui.

<sup>13</sup> Cornelius i riwelai da anela awarina i eġa, ma i riwei, “Rava ma paritawane i au Joppa da rava wavana Simon Peter ina neiai.”

<sup>14</sup> Tauna wei riwana ina neiai ma lamnei tam ma am numa ravai maiteni ina vilawanimi.

15 Ma babani a raukarei ma Arua Vivivireina i ġairai da tau i vioai me au naona awarita i tupua nanare.

16 ✨Anina ma Iesu aiwai i ririwei a notai, “John wairei i babataito, wate taumi Arua Vivivireinei ina babataitoimi.”

17 Inanana au aiaina da God Jentail pulona tagogina i verei, me tauta i verevereta maranai Iesu Keriso ta vitumaġanei, ma tau ai ai da God ata viġaei?

18 Tau i vigamopotai maranai wei i nonori, ma God i viborumei i pa, “Riwa kaua da God Jentail maiteni i vianinei da ina rupena ma ina lawana.”

*Ekalesia au Antiok*

19 ✨Ekalesia ġelau i rau-iviapoapoe i rovoei maranai Stephen i viraġeni ma i vilamonei au uama. Ġelau i ruba nae au Phonisia, au Saipras ma Antiok, ma kampa Iesu Riwana Aiaina i raugugulei mai Jew ava awarii.

20 Wate ekalesia ġelau mai Saipras ma mai Sairini i nae au Antiok Jentail awarii ma Iesu Riwana Aiaina i raugugulei.

21 BADA ana rewapana tau i orai i mae ma Jentail maġamaġau i vitumaġana ma i mae-tavirei BADA awarina.

22 Wei riwana i ġeta ekalesia awarii au Jerusalem, ma tau i Barnabas i paritawanei au Antiok.

23-24 Maranai i ġeta ma i 'nanai da God ravai i viaiaina-kauei, tauna i vinuai ai ma i egari da BADA awarina ina vipatutu orai taputapune i. Barnabas tauna rava aiaina, Arua Vivivireina orana i oai ma ana tumaġana i rata, ma God ana agui ei, i rauguga ma rava maġamaġau i taini BADA awarina.

25 Ma Barnabas i nae au Tarsus da Saul ita baiei.

26 Ma i nelaġai ma i neiai au Antiok, ma kampa tau vitumaġana maiteni i mae madeġa tagogi i kwa, ma patara ġaeġaena awarii i viaramana. (Weka au Antiok lamna i vikarei da tau vitumaġana i viġorei Kerisiana)

27 Wei au marana peroveta ġelau Jerusalem ei i ġairai.

28 ✨Peroveta tagogi wavana Agabas i vomairi ma God ana rewapanei i vieġa da gomara e nenei au naoii dobu au anatapuna (Caesar Claudius ana vibada au marana gomarana i nei).

29 Tau votaġotaġo au Antiok i vianina da tau i ava ita kauanaguratei da mane vounaina ita kauei da ai rava ekalesia au Judea ita voagui.

30 Tau i nanare i kauei ma manena Barnabas ma Saul au urai i terei ma tau i ekalesia ai babada au Jerusalem i verei.

## 12

### *James i viragēni ma Peter i pani*

<sup>1</sup> Lamna maranai, gulau Herod Agrippa\* i raukarei da ekalesia gēlaui i rau-iviapoapoelei.

<sup>2</sup> James, John tuana uana sodei i bori-tuini.

<sup>3</sup> Ma maranai Herod i 'nanai da mai Jew wei kauana i vinuaiaiei, ma ana sorodia i egari da Peter maiteni ita pani da au pani numana ita terei. Wei kauana Palawa Bagibagina ana au torela i tupua.

<sup>4</sup> ✧ Ma Peter i pani ma au pani numana i terei ma sorodia 16 tauna i paini. [Sorodia 16 i terei da borui 4 ma i vipaipai.] Herod i gōei da Peter ita vojijini da raḡona torelana au murina ma au deba ita rautarei.

<sup>5</sup> Ma lamna aubaina Peter au pani numana i vojijini mara aburuna. Wate ekalesia i raraupari guratana God awarina Peter aubaina.

### *Peter pani numanei i tere-opunei*

<sup>6</sup> Ma nai waguvaraina, ma maratonna da Peter ita rautarei, Peter sorodia ruaḡa au poui i matamatave. Urana seinei i raḡini sorodia ruaḡa au urai, ma sorodia gēlaui au metaeta i vipaipai.

<sup>7</sup> Maratagogi BADA ana anela i eḡa ma pani numana i ravilalai. Ma Peter i vogugui da matana i kala ma i riwei, “Laḡilaḡina ma vomairi!” Ma sein au urana i dabarara.

<sup>8</sup> Ma Peter i riwei, “Ma vigara ma ae uma ma oteni.” Ma nanare i kauēi. Ma i egari, “Am kwama potopotona ma oteni ma ma votaḡotaḡoiu.”

<sup>9</sup> Peter anela i votaḡotaḡoi da pani numana i opu-tawanei, wate eḡa ita aramanei anela aiwai i kaukauēi, tauna i notai i rarauboni.

<sup>10</sup> Tauī, sorodia boruna ruaḡa au doa i netawanei, da i opu au metaeta iramei, wei e opuopu au taon. Metaeta ainelana i wanatawanei aubaii ma i opu. Tauī etanai tagogi i ḡairani ma maratagogi anela tauna i voterei.

<sup>11</sup> Peter ana nota i nememei ma i riwa, “Wei anina riwa kaua! BADA ana anela i paritawaneiai da Herod au urana i vaitawaneu, da mai Jew aiwai i notanotai da ita tupua lamna eḡa ita tupua.”

<sup>12</sup> Maranai ana nota i nememei tauna i nae Mary ana au numa. (Mary lamna John alona. John wavana gēlauna Mark). Kampa rava maḡamaḡai i vitagogiei ma i raraupari.

<sup>13</sup> Peter au metaeta i raupewapewa ma taunola wavana Rouda i nei da metaeta ita votawanei.

\* **12:1:** Tauna gulau Herod 1 ḡoḡana. ✧ **12:4:** Exo 12:1-27

14 Ma Peter ponana i nonori ma i aramanei da tauna, ma i vinuaii guratana da eġa metaeta ita votawanei ma i ruba-rui da i vinolanola i pa, “Peter au metaeta e maimairi!”

15 Wate tau i eġa ita vitumaġanei ma i riwei, “Tam ma bubual!” Wate tauna i riwa bagibagi. Ma tau i riwa, “Nai Peter ana anela.”

16 Wate Peter i rarau-pewapewa ma maranai tau i metaeta i votawanei ma i nanai da tauna, tau orai i auepai.

17 Peter urana i voepai da rava i genuana ma i riwei menanare BADA pani numanei i tere-opunei. Ma i riwei, “James<sup>†</sup> ma ekalesia ġelau wei ona pariveri.” Ma Peter i nae au dobuġela.

18 Maranai mara i tom kampa au pani numana nuabola ma vinuanaina ġaeġaena i peu sorodia awarii da aiwai i tupua Peter awarina

19 Herod, ana sorodia i egari da Peter i baiei wate eġa ita nelaġai. Lamna aubaina sorodia 16 i etarei ma i viraġeni. Muriai Herod Judea i netawanei ma i nae au Caesarea da ita mae mara aburuna.

### *Herod iraġe*

20 Marina Herod amlona i ġaiġai kaua Taia ma Sidon ravai awarii, lamna aubaina tau ana borui i nei da Herod maiteni wei i babaniei. Tau i Herod ana taunola ġaeġaena Blastus, i taravaini da ita voagui. Tau i rom i vibaġei Herod maiteni. Aubaina ai lam Herod ana dobuei i nenei.

21 Ma marana i ġetai da Herod maiteni ita viboru ma tauna ana vigulau garana i vigarei ma ana au anikiala i kiala ma awarii i babani.

22 Ma patara ana babani i nonori ma i logoi i pa, “Wei lamna god e bababani ma eġa rava!”

23 Maratagogi BADA ana anela Herod i vipeuni au doa ma motamota orana i ani da i raġe, aubaina tauna rava ai voepaepa i vinuaiiaiei ma eġa rava ita riwei da BADA ita voepaepai.

24 Ma ekalesia BADA riwana i rarausugulei ma rava maġamaġau i nenei BADA awarina ma ekalesia i rarata.

25 Maranai Barnabas ma Saul ai nola au Jerusalem i vikwai, tau i John-Mark i taravaini da maiteni i nei au Jerusalem.

## 13

### *Barnabas ma Saul i viaiaini ma i paritawanei*

1 Kerisiana au Antiok au orai peroveta ma taugiu wavai wenanare, Barnabas, Simeon (e ġoreġorei Gawara),

<sup>†</sup> 12:17: Iesu ana tevera



Lusias Sairinie, Manaen (Tauna gulau Herod Antipas maiteni i rata tagogi), ma Saul.

<sup>2</sup> Mara tagogi maranai tau i ujiuji ma BADA i vovoepapai ma Arua Vivivireina i riwa i pa, “Tau, Barnabas ma Saul a vinei, ona tereriei au nola aubaina.”

<sup>3</sup> Anina ma uji ma pari au murina tau urai Barnabas ma Saul au tepai i terei ma God ruaḡai i viaiaini ma i paritawanei.

### *Au Saipras*

<sup>4</sup> Ma Arua Vivivireina Barnabas ma Saul i paritawanei da i ḡaira au Selus ma kampa i amkuka damana au bonabona Saipras.

<sup>5</sup> Ma au Salamis i ḡota ma i nae mai Jew ai au boru numana ma God riwana i raugugulei. John-Mark tau maiteni i nae da ai tauagu.

<sup>6-7</sup> Tau bonabonana i kwaviviroi da au Paphos taon i ḡeta. Weka Jew ei barabaravuna ma peroveta morumoruna i nebelei wavana Bariesu. Tauna bonabonana ana gavena Segius Paulus i vituranei, Segius Paulus rava nualaulaunana ma i ḡoei da God ana babani ita nonori ma lamna aubaina Barnabas ma Saul i rauḡoreiai.

<sup>8</sup> Wate barabaravuna Bariesu (Greek ponanei lamna Elimas) Saul ma Barnabas i viḡaviei da gavena ana tumagana ita viapoapoeni.

<sup>9</sup> Saul wavana ḡelauna Paul, Arua Vivivireina orana i oai ma barabaravuna matana i 'nana-tunutunui.

<sup>10</sup> Ma i pa “Tam Satan natuna ma kaua aiaii ma jijimani tauviapoapoenina! Tam morumoru kaukauam ma gwalag-walamerum. Ma amapo da BADA ana kaua ma voviravirai da moru.

<sup>11</sup> Ma marina BADA urana ina kovoḡim da matam ina apoapoe mara aburuna ma eḡa madeḡa lalalaina ma inanai.” Maratagogi matana i vinawanawa ma i gimtona ma nare da were i voladaḡa-nae da rava au urana ita vojijina.

<sup>12</sup> Maranai gavena i 'nanai aiwai i tupua ma i vitumagana, aubaina tauna BADA ana viararamana i bana-kauei.

### *Paul God Riwana Aiaina i jimejime i au Antiok taon au Pisidia*

<sup>13</sup> Paul ana rava maiteni Paphos i voterei ma i amkuka damana au Perga taon au Pamphilia provins, Ma weka John-Mark tau i voterei ma i naeme au Jerusalem.

<sup>14</sup> Perga i voterei ma i rui da au Antiok taon au Pisidia provins. Ma au Sabate i rui au boru-numana ma i kiala.

<sup>15</sup> Ma rava ḡelai, Moses ana tarawatu bukana ma peroveta ḡelai ai buka i 'avi, ma babada riwa i paritawanei Paul ma

Barnabas awari i pa, “Varevareiu! Mepa da awarimi nota aiwai da ota voagui ai lamna marina ona ġei da ona babaniei.”

16 Paul i vomairi ma urana i voepai da rava i genuana ma babani i vikarei i pa:

Mai Israel ma taumi eġa mai Jew ai God tauviborumeina, ona rautaniġaneu!

17 ✨Mai Israel ai God noinoita i vinei, ma i vimaurai ai au mae au Egypt, ma ana rewapana ġaeġaenei dobunei i taravaina-opunei.

18 ✨Madeġa 40 au mutulua ami kaua apoapoei ami beura ma ami gunura anatapai am-iauei.

19 ✨Dam ġaeġaei 7 i vipupui au Canaan ma dobuna mai Israel i verei da i viġariana-nonoei.

20 \*Wei anatapuna madeġa 450 au orana i tupua. Wei au murina God taurauetara† i terei da tau i vibadei da peroveta Samuel ana mara.

21 ‡Anina ma rava God i vibaġai da gulau ita verei. Ma God Saul, Kish natuna Benjamin ana damei i terei; ai gulau da madeġa 40 i kwa.

22 §Ma God Saul i tere-opunei ma David i terei ai gulau. Ma wenanare i riwa i pa, “Tau a aramanei da David, Jesse natuna orau ana rauoġara, ma au ġoana anatapuna ina kau ei.”

23 Muriai me God i parivainuaġani nanare, Mai Israel ai Tauvilawana, Iesu David ana damei i nei.

24 ✨Muriai da Iesu ita nei, John mai Israel anatapai awari i jima da ai ġo’apoapoe ina voterei ma ina mae-tavirei God awarina ma ina babataito.

25 ✨Ma John ana nola au damona i riwa, “Taumi o notanotai da tau Tauvilawana bo? Eġa! Tau eġa tauna. Wate ona rautaniġana, rava au muriu e nenei tauna i ġetelara, tau eġa tagotagogina da ana ae uma ġuravana ana rupeni.”

26 Varevareu - Abraham natunatuna ma taumi Jentail God tauviviborumeina, God tauta awarita, kwakokwako i vilawanai riwana i paritawaneiai!

27 Mai Jerusalem ai babada maiteni God ana Tauvilawana i vinua-nainei, ma lamnei Iesu i kovoġi, Peroveta wei lamna i jimejime i au Sabate marana patapatana.

28 ✨Tau i eġa ana apoapoen a aiwai ita nelaġai da Iesu ita viraġeni, wate Pilate i vibaġai da ita viraġeni.

✨ 13:17: Exo 1:7 ✨ 13:18: Num 14:34 ✨ 13:19: Deu 7:1 \* 13:20: (a) Jdg 2:16; (b) 1Sa 3:20 † 13:20: Wei ravai lamna ai ġavia babadai ma ai tauravena ma taurauetara *Judge*. ‡ 13:21: (a) 1Sa 8:5; (b) 1Sa 10:21 § 13:22: (a) 1Sa 13:14; (b) 1Sa 16:12 ✨ 13:24: Mrk 1:4 ✨ 13:25: Mrk 1:7 ✨ 13:28: Mrk 15:13-14

29 ✨ Maranai rava ai babada maiteni, ai nuabola Iesu awarina i kauana-paiei me peroveta i ririwei nanare, ma tupuana au korosi i tere-gairei ma au guba i vimataveni.

30 Wate God Iesu iraḡelei i vovaimairini.

31 ✨ Ma au pom maḡamaḡau Iesu tauī maiteni au Galili da i ḡeḡae au Jerusalem awari i eḡa. Wei ravai marina e vivimatamata rava awarii.

32 Marina tauai Riwana Aiaina a paripariveremi. Wei parivainuaḡanana wariḡa noinoita awari i kauēi.

33 Ma God nanare i kauēi tauta eda muri aubaita, da Iesu iraḡelei i vovaimairini, au Psalm viruaina wenanare I girumi,  
*Tam natu.*

*Amadodo Tau a viamanem. (Psalm 2:7)*

34 God Iesu iraḡelei i vovaimairini da eḡa tupuana ina buda. Me i girugirumi nanare i pa,  
*Au viaiaina vivivireina David a parivainuaḡani tam ana verem. (Isaiah 55:3)*

35 Psalm ḡelauna wenanare i girumi,  
*A 'ramanei da Tam am Messiah-Tauvilawana tupuana eḡa au kokoḡa ma voterei da ina buda. (Psalm 16:10)*

36 Maranai David i mamae ma God ana nola i kauēi ma i'raḡe, ma amamana maiteni i doboi ma tupuana i buda.

37 Wate God Iesu iraḡelei i vovaimairini ma tupuana eḡa ita buda.

38-39 Lamna aubaina au rava, ona aramanei da Iesu awarinei God ami ḡo'apoapoe ina nota-tawanei. Rava anata-pui da Iesu e vivitumaḡanei, ai ḡo'apoapoe e notanota-tawanei ma ai viturana e viviaiaiini. Wei Moses ana tarawatu eḡa ita kaukauei.

40 Ona paina-melemi da peroveta aiwai i ririwei eḡa awarimi ina tupua. Aubaina i riwa;

41 *Ona rautaniḡana vivijiboḡami,  
kaua ḡaeḡaena ana kauēi da Ona baei ma ona iraḡe!  
Aubaina ami au lawana kaua ḡaeḡaena ana kauēi da taumi  
ona vitumaḡana-avei.*

42 Paul ma Barnabas i opuopu ma rava i nei ma i vibaḡa-guratei da ita nememei au Sabate ḡelauna da Tauvilawana ana kaua ita baḡanana-kauēi.

43 Boru i kwa da rava i vilamonei, mai Jew borui ma ḡelauī marina ina bori i vaia da i vimai-jew, tauī Paul ma Barnabas i votaḡoi, ma i riwana-guratei da Iesu ana aḡuei ina mae jijina.

44 Au Sabate ḡelauna taon ravai anatapui i ḡeta da Iesu riwana aiaina ita nonori.

45 Maranai mai Jew wei patarana i 'nanai ma orai unura i oai ma Paul i vikaua-morumoruei ma i vitepaubaubai.

46 Ma Paul ma Barnabas ana tepatorai i babani, “God riwana a jimei awarimi au naona, wate taumi wei riwana o geduaiei. Wei e viviatataiana da taumi lawana mamae-nonoana eġa ota ġoġoġoi. Lamna aubaina ana voteremi ma God riwana ana jimei Jentail awarii.

47 BADA wenanare riwa bagibaginei i riwelai,  
*Tau a vinemi da lalalaina Jentail awarii,*  
*da rava anatapui au dobu ona riwei menanare ai*  
*ġo’apoapoe a nota-tawanei ma a vilawani. (Isaiah 49:6)*

48 Maranai Jentail wei riwana i nonori, tau i vinuai ai kaua ma BADA Riwana Aiaina i voepaepai, ma tau da God i vinei lawana mamae-nonoana ita vaia, i vitumaġana.

49 Ma BADA Riwana Aiaina i vituai nai au paratana.

50 Wate mai Jew Jentail waivinei manemanei ma mai Jew ġelau i egari da Paul ma Barnabas ai ġavia i vomairi ma dobunei i viaġaġana-opunei.

51 ☆ Anina ma tau i aei pokauna i rauabuabui da ita viatataiei da BADA eġa ita vinuai ai awarii ma i nae au Ikoniam taon.

52 Wate Arua Vivivireina kerisiana voui au Antiok orai i oai ma i vinuai ai kaua.

## 14

*Paul ma Barnabas i jima au Ikoniam.*

1 Kauana tagogina i tupua au Ikoniam. Paul ma Barnabas i nae mai Jew ai au boru numana ma menanare i babaninei da mai Jew ma Jentail maġamaġau i vitumaġana.

2 Wate mai Jew ġelau eġa vivitumaġana i Jentail i kelari ma ai nota i barai da Paul ma Barnabas i geduaiei.

3 Avena ma Paul ma Barnabas kampa i mae guratana ma ana tepatorai BADA ana aguei i jimajima. Ma kaua babaii ma vivirewapanai maġamaġau i kauai. Wei i vimataira da ai jima lamna riwa kaua.

4 Taon i kai ġelau mai Jew aubaii i mairi ma ġelau Aposol aubaii i mairi.

5 Ma mai Jew ma Jentail ġelau i vioga da Paul ma Barnabas ġaime i ita viraurauei.

6 Wate tau i riwana i vaia ma dobu na i ruġa-tawanei ma i nae au taon ġaġaġei Listara ma Derbi au Laikonia provins ma taon au ririvai.

7 Ma weka Riwana Aiaina i jimana-naiei.

*Rava i notai da Paul ma Barnabas god*

8 Au Listara oroto aena ġokokokarana, alona manawanei gwaġagwaġana i vinatunei ma eġa ita babara dadana.

<sup>9</sup> Kampa i kiala ma Paul i bababani i rarautaniḡanei. Paul matana itawanei ma i 'nanai da tauna i vitumaḡana da ita lawana

<sup>10</sup> ma i garara awarina, "Aemei ma mairi!" Ma orotona aenei i mairi ma babara i vikarei.

<sup>11</sup> Maranai patara i 'nanai Paul aiwai i kauai tui ava ai ponei i babani vivira, "god ruaḡa i ḡairai awarita me \*rava."

<sup>12</sup> Tui i riwa da Barnabas lamna mai Greek ai god Zeus† ma Paul i vitauvibabani aubaina i riwa da tauna Hermes.

<sup>13</sup> Zeus ana pulo gabuna, taon au giana, Zeus ana pirisi patara maiteni bull ma berana ulaulai i neiai taon au metaetana da Apasol ita puloi.

<sup>14</sup> Wate maranai Paul ma Barnabas wei riwana i nonori, tui ai gara i sikai ma i ruba-opu patara awarii ma i garara,

<sup>15</sup> ☆ "Aiwai aubaina wei kauana o kaukai? Tauai rava ota me taumi nanare! Tauai Riwa Aiaina a neneiai da nai kauai kwakwavi ona voterei ma ona nae BADA lawalawaina ona viborumei. Tauna mara ma dobu ma boga ma aiwai anapuna au orai i kauai.

<sup>16</sup> Wariaḡa tauna rava i voterei da ai ḡoanei i mae.

<sup>17</sup> Wate marana patapatai e viviatataiemi da tauna e mamae ma ana nuavaina e verevereta, garewa marei ma maura ma lam e vereveremi ma au orami nuai ai e oaoai."

<sup>18</sup> Apasol i bababani ma i kauana-guratei da ravai ita viḡaei da tui avena ita puloi.

*Mai Listara Paul ḡaimei i virauraei.*

<sup>19</sup> Mai Jew ḡelau Antiok ei ma Ikoniam ei i nei ma patarana i egari da Paul ḡaimei i virauraei ma taonei i taina-opunei, i notai da tauna iraḡe.

<sup>20</sup> Wate maranai vivitumaḡanai i ḡeta da i mae-kwaviviroi, tauna i vomairi ma i naeme au taon.

Aupom ḡelauna tauna ma Barnabas i nae au Derbi.

<sup>21</sup> Paul ma Barnabas Riwana Aiaina i jimei au Derbi ma ekalesia voui maḡamaḡau i rui. Ma i nae me au Listara, Ikoniam ma Antiok.

<sup>22</sup> Metauna au dobuna i jimajima kampa tauvitumaḡana i ririwana-guratei ma i vovai-virewapani da ina mairi-jijina ai au tumaḡana i pa, "Piripiri maḡamaḡau au orana ona rui wate au murina God ana au vibadana ona rui."

---

\* **14:11:** Paul ma Barnabas Greek ponanei i bababani † **14:12:** Zeus lamna mai Greek ai god ḡaeḡaena. Rava ai vitumaḡana da godna e vivilawani. Hermes lamna Zeus natuna ma tauna lana Tau-vinolanolana. Zeus ma god ḡelau aubaii. Rava i notai da Hermes lana e kauwei da rava e babana-kauwa ma ai babara e aiiai. Wate nanarena e notanotai da tauna kauwa aiaina e vivitupui ma e kauwei da rava e vivinatuna kauwa.

☆ **14:15:** Exo 20:11

23 Paul ma Barnabas ekalesia nununai ai babada i vinei ma i raupari ma i uji BADA awarina, da ai ekalesia ma ai babada ina paini.

24 Anina ma au Pisidia provins i verautua da i nae me au Pamphilia provins.

25 Au Perga BADA riwana i jimei ma i ġaira au Atalia.

26 Ma kampa i amkuka ma i nae me au Antiok au Syria provins, weka ai nola i vikarei, maranai ekalesia kampa God i vibaġai da tau i ita viaiaini ai au nola ma i paritawanei ma marina ai nola e vivikwai.

27 Ma kampa i ġeta ma ekalesia i vitagogiei, ma aiwai anata-puna God ana aguei i kaukauei rava i vieġei, ma menanare Iesu metaeta i votawanei da Jentail maiteni Tauna i vitumaġanei.

28 Ma kampa tauvitumaġana maiteni i mae guratana.

## 15

### *Boru au Jerusalem*

1 Wate nelara ġelau Judeaei i ġairai au Antiok ma ekalesia i viararamani i pa, “Mepa da eġa inibori ona vaia Moses ana tarawatu e ririwei nanare, God taumi eġa ina vilawanimi.”

2 Ma karuwaġawaġa ġaeġaena i bauni Paul ma Barnabas maiteni. Ma tau i Paul, Barnabas ma rava ġelau i vinei da i ġae au Jerusalem da Apasol ma babada ita inana i wei babanina aubaina.

3 Ma i paritawanei au Jerusalem, Ma ai au vaġai ekalesia au Phonisia ma Samaria provins i parivere i menanare Jentail i mae-tavirei God awarina. Ma tau i vinuiai i kua maraina wei i nonori.

4 Maranai i ġeta au Jerusalem, ekalesia ma Apasol i nei da i nebelei. Tau i parivere i menanare kua anatapui God ana aguei i tupua.

5 Wate ekalesia ġelau mai Pharisi, i vomairi ma i babani guratana i pa, “Jentail anina da inibori ina vaia ma ona egari da Moses ana tarawatu ina voteletelei.”

6 Apasol ma babada i viboru da wei babanina i okei.

7 \*Ma i vitarapiri guratana ma Peter i vomairi ma tau i riwei i pa, “Au rava! O aramane i da au orata God i vineu da Ri-wana Aiaina ana jimei Jentail awarii da tau i ina nonori ma ina vitumaġana.

8 \*God rava anatapui ai nota e araramane i, ma Jentail Aru-ana Vivivireina i verei me tauta nanare. Wei matairana i viatataieta da God i vianina.

9 Tauna Jentail ma tauta e vaivainita da tagogina, ma ata vitumaḡanei orata i viaiaiani.

10 Marina aiwai aubaina God o viviamlo-ḡaiḡaini? Tauta amamata maiteni eḡa tata virewapana da tarawatu tata vojijina-kauei. Wate marina wei vitana Jentail ta verevere-damanei.

11 Eḡateni! Tauta anaputa ta vivitumaḡana da BADA Iesu ana aguei tana lawana, ma nanare Jentail maiteni.”

12 Rava anapui i genuana ma Barnabas ma Paul i rautaniḡanei, tau i bababani menanare ana au vaḡai God ana aguei kava aniba ma vivirewapana i kauei Jentail awarii.

13 Maranai i babani vorovei, James\* babani i vikarei, “Au rava ona rautaniḡaneu.

14 —Peter †au naona i pariveremi menanare God Jentail i raugenari ma ḡelau i vinei da tauna ḡarinei.

15 Ma Peroveta nununai wei kauai i bababaniei marina nanare e tuputupua:

16 *Wei au murina ana nememei,  
ma David ana numa gara ana voa-melei.*

*Ana vituramairini  
ma ana kauei da ina virewapana me.‡*

17 *Da rava mamae-terenai  
BADA ina baiei,*

*Wate Jentail a rauḡorei da ḡariuei, BADAi riwa. (Amos 9:11-12)*

18 *Wariaḡa da marina wei ta aramanei.*

19-21 —✧Lamna au baina eḡa tana kauei da ina piri-piri Jentail aubaii, tau e mamae-tavirei God awarina. Wate pepa tana girumi ma tana egari da lam e pulopuloei god morumorui awarii eḡa ina ani, eḡa ina viawawana labalababa, ḡamoḡamo uai e kikiki eḡa ina ani ma sia ana tarana eḡa ina ani. Aubaina wariaḡa da marina Moses ana tarawatu e raugugulei boru au numai Sabatena patapatana.”

*Pepa i girumi Jentail awarii*

22 Ma Apasol, babada ma ekalesia anapui rava ḡelau i vinei ma i paritawanei au Antiok au Syria provins Paul ma Barnabas maiteni. Tau ai babada ruaḡa i vinei wavai Judas wavana ḡelauna Barsabas ma Sailas.

23 Ma wei pepana au urai i terei,  
Aposol, ekalesia babadai, varevareimi.

Jentail ekalesia au Antiok, Syria provins ma Silisia provins. Varevareiai, egualau!

\* 15:13: Iesu ana tevera † 15:14: Peter wavana ḡelauna Simon. ‡ 15:16: Maranai God David ana numagara e bababaniei lamna David ana vibadana vouna e ririwei ma eḡa ana epaepaia. ✧ 15:19-21: Lev 18:6-23; Lev 17:10-16

24 Tauai riwana a vaia da rava ḡelau i ai au boru i ḡairai ma ai viararamani i vinuabolaimi ma i visina-viraviraimi, wate tauai nai ravai eḡa ata paritawanei.

25 Lamna aubaina tauai a viboru ma a vianina da taupariv-erena ata paritawaneiai, ata rava Paul ma Barnabas maiteni,

26 tau i verena-melei ma ai lawana eḡa ita vinuabolei BADA Iesu Keriso wavana aubaina.

27 Judas ma Sailas a pariparitawanei da tau i gamoiei ina riwemi aiwai tauai a girumi.

28 Arua Vivivireina ma tauai ai ḡoana da eḡa vita ḡaeḡaena ana veremi, anina wei tarawatuna ava.

29 Lam god morumorui i puloi eḡa ona ani,

Eḡa tara ona umai, Eḡa ḡamoḡamo uana kikikina vioana ana tarana ona ani.

Eḡa ona viawawana labalababa,§

Mepa da wei tarawatui ona vojijina-kauei, taumi kaua aiaina o kaukauei.

Eḡalau kaua.\*

30 Ma nelarai i paritawanei da i ḡaira au Antiok, ma ekalesia i rieiai da pepa i verei.

31 Ma tau i 'avi ma i vinuaiai kaua pariverena aiaina aubaina.

32 Judas ma Sailas tau i God ana peroveta ma i babani guratana awarii ma wei tau i vinuaiaiei ma ai tumaḡana i vovai-virewapani.

33 Ma kampa i mae mara aburuna ma ekalesia ana nuubai i paritawana-melei au Jerusalem.

34 †

35 Wate Paul ma Barnabas au Antiok i mae, ma tau i maiteni BADA Riwana Aiaina i viararamani ma i raugugulei.

*Paul ma Barnabas i vilamonei*

36 Ma muriai Paul, Barnabas i riwei, "Tana nae dobu au anat-apuna mepa BADA Riwana Aiaina ta raugugulei ma ekalesia tana raugenari, ma tana inanai tau i anina bo eḡa."

37 Barnabas i ḡoei da John-Mark ita taravaini.

38 ☆ Wate Paul wei notana eḡa ita ḡoei aubaina au naona John tau i au Pamphilia i ruba-tawanei ma eḡa ita mae da maiteni ita nola.

---

§ 15:29: Viawawana labalababa ḡelau wei: Rava ḡelau awawai maiteni e viawawana. (Exo 20:14, Deu 5:18) Mane aubaina e viawawana (Lev 19:19, 1 Cor 6:15) Am femili ravai o viviawawanei (Lev 18:22, Rom 1:26-27) ḡamoḡamo e viviawawanei (Lev 18:23) Rava eḡa uta ravaḡi ma e viviawawanei (Eph 5:3) Rava u egari da u viawawanei. (Gen 34:7, Deu 22:25-28)

\* 15:29: Kaua ḡaeḡaena lamna eḡa ini bori ma Iesu ana aguei, u korosi i take aubaita. † 15:34: Buka waduwaduboi au orai vs 34 eḡa ita mae "Wate Sailas i ḡoei da kampa ita mae."

☆ 15:38: Act 13:13



<sup>39</sup> Ai viparipariniġai i apoapoe guratana da tau i vilamonei. Barnabas, Mark i taravaini ma kukei i damana au au Saipras.

<sup>40</sup> Paul, Sailas i vinei. Ma ekalesia, BADA i vibaġai da ana aguei tau ai au nola ina paini.

<sup>41</sup> Tau Syria da Silisia i naeni ma ekalesia i raugenari ma i vinua-terenei.

## 16

*Timothy Paul ma Barnabas maiteni i nae*

<sup>1</sup> Paul i nae au Derbi da au Listara, kampa tauvotaġotaġo i mae wavana Timothy. Tauna alona Jew ei ma kerisiana, Wate amana Jentail.

<sup>2</sup> Ekalesia au Listara ma Ikoniam Timothy i voepaepana-kauai.

<sup>3</sup> Paul i ġoei da tauna ita taravaini ana au vaġai, lamna aubaina ini bori i verei aubaina mai Jew kampa i aramane i da tauna amana Jentail.

<sup>4</sup> Maranai taon nununai i nenaeni, ma ekalesia kampa i paripari-verei Apasol ma babada au Jerusalem ai nota, ma i riwei da tarawatu i ririwei ina votaġotaġoi.

<sup>5</sup> Ma ekalesia ai vitumaġana i vovai-virewapanai ma tauvitu-maġana voui i ruirui marana patapatai.

*Paul ana rauboni*

<sup>6</sup> Arua Vivivireina Paul ana rava maiteni i viġaei da eġa BADA riwana ita jimei au Eisia provins, ma Pirijia ma Galatia paratana i naeni.

<sup>7</sup> Maranai i nei Maisia ana au provins ma i ġoei da ita damana au Bithinia provins. Wate Iesu Aruana eġa ita vianinei.

<sup>8</sup> Ma Maisia i verautuini da i nae au Troas.

<sup>9</sup> Waguaraina Paul ana au inana i 'nanai oroto Macedonie i maimairi ma i vivibaġai i pa, "Ma damanai au Masedonia da ma voagui!"

<sup>10</sup> Paul ana rauboni au murina tauai a vioga da laġilaġina ana vomairi Masedonia provins aubaina. Tauai a vitumaġana da God i ġorelai da Riwana Aiaina kampa ana jimei.

*Paul i nae au Philipai.*

<sup>11</sup> Au Troas tauai amkuka, a viaruana damana au Samotreis bonabonana a ġeta ma au pom ġela a kuka-nae au Neapolis.

<sup>12</sup> Ma kampa da a babara nae au Philipai taon au Masedonia provins, weka mai Rome ai sorodia ai bareki ġaeġaena i mae, kampa a veraumae.

13 Ma au Sabate taon a opu-tawanei ma a nae au waira, a notanotai da kampa boru gabuna wate eġa. A kiala ma waivine ruaġa ota kampa i rauriei awari a babani.

14 Taurautaniġana tagogi lamna Jentail wavinena wavana Lidia ma ana dobu Thaiataira. Tauna gara lebalebarina miana ġaeġaena taugimareina ma God i vitumaġanei, ma God orana i votawanei da aiwai Paul i bababaniei i rautaniġanana kauiei.

15 Maranai wavine ana numa ravai i babataito ma i rauġorelai i pa, “Ona nei au numa mepa da o notanotai da tau kerisiana ririwa kauana.” Ma i egariai da ana au numa a mae.

*Paul ma Sailas au panipani numana au Philipai*

16 Mara tagogi a nena boru au gabuna ma taunola guguini a nebelei, Tauna au orana arua apoapoena i mae ma lamnei aiwai amapo da ina tupua i vivieġai. Ma mane ġaeġaena i kaukauei ana taniwaga aubaina.

17 Tauna Paul ma tauai i votaġotaġoia ma i garagarara “Wei nelarai God ġeġetelarana ana taunola! E vivinolanola menanare God e vivilawananei.”

18 Wei kauana i kauiei au pom biāġa da Paul i viamlo-ġaiġaini da i mae-tavirei ma arua apoapoena i riwei, “Iesu Keriso wavaniei a egaegarim da wavine ma opu-tawanei!” Maratagogi arua apoapoena wavine i opu-tawanei.

19 Maranai taunola guguini ana taniwaga i aramanei da ai mane etanaina i vine-boai, tau Paul ma Sailas i vojijini ma i taina naiei au deba Gabemani awarii.

20 Tau i nei ai taurauetara awarina ma i riwa, “Wei nelarai mai Jew wei dobuna ravai e vivinuarāġaraġai.

21 Tau i ata rava kua ġelau i viviararamani ma wei ata giu e teretereġairei.”

22 Ma patara i rui Paul ma Sailas vunuai aubaina. Ma gabemani Paul ma Sailas, ai gara i sikai ma wipiei i kwapui.

23 I vunu-kauiei ma i tawana-ruiei au panipani numana. Ma numana badana i egari da ita paina-kauiei da eġa ita ruba.

24 Anina ma Panipani badana tau i tawana-ruiei, panipani numana au orana ma aei, ai vivitainiei au orana i raġita-jijini.

25 Nubautuvai Paul ma Sailas i raraupari ma i welawela God awarina ma panipani ġelau i rarautaniġana.

26 Nanare ma lolo ġaeġaeotana dobuna i gui. Ma maratagogi pani numana metaetana i wana-tawatawanei ma panipani anatapui ai sein i dabarara.

27 Pani numana badana i vomairi ma ita inanai da metaeta wanatawanana ma i notai da panipani i ruba ma lamna aubaina ana sod i lavui da ita virāġena-melei.

28 Wate Paul i garara, “Eġa ma vunū-melem! Tauai anatapuai weka!”

29 Pani numana badana ana taunola i ġorei da lalalaina ita neiai ma i ruba-rui ma ana sisisina i mae-peu Paul ma Sailas au naoi.

30 Ma i opunei au doa ma i paridadanei, “Babada aiwai ana kauē da ana lawana?”

31 Tau i paribelei, “BADA Iesu Keriso ma vitumaġanei ma ma lawana, am numa ravai maiteni.”

32 Ma God riwana i raugugulei tauna ma ana numa ravai awari.

33 Nai maranaina avena da waguvarai, pani numana badana Paul ma Sailas i naiei ma keroi i oġai, Ma maratagogi tauna, ana numa ravai maiteni i babataito.

34 Paul ma Sailas i ġaiei ana au numa da i viambagibagi. Tauna ana numa ravai maiteni i vinuaiāi kua da marina God i vitumaġanei.

35 Ma marana i tom ma tauetara ana taunola\* i paritawanei pani numana badana awarina ma i egari i pa, “Nelara ma voterei da ina nae.”

36 Pani numana badana Paul i riwei, “Taurauetara i egariu da ana voteremi da ona nae. Marina ana nuubami ona nae.”

37 Wate Paul, taurauetara i riwei, “Tauai eġa ita rauetarelai ma i vunū-kauelai patara au matai. Ma avena da tauai mai †Rome, wate marina i ġoei da govagovaġanei ina paritawanelai bo? Eġateni kua! Ona voterei da taurauetara ina nei weka da ina naielai.”

38 Tau i wei babanina i najana-melei da babada i riwei ma tau i rovo kaukua maranai riwana i nonori da Paul ma Sailas lamna mai Rome.

39 Ma i nei au pani numana ma i riwa, “Tauai a kauana-boai, ai ġo’apoapoe ona nota-tawanei.” Ma i tere-opunei ma i vibaġa-guratei da dobuna ita oputawanei.

40 Ma Paul ma Sailas pani numana i opu-tawanei ma i nae Lidia ana au numa ma kampa kerisiana maiteni i viboruboru ma i vovai-virewapani. Anina ma tau i dobuna i netawanei.

## 17

### *Au Thesalonika*

1 Paul ma Sailas Amphipolis taon ma Apolonia taon i voterei da i nae au Thesalonika taon. Weka mai Jew ai boru numana i mamae.

\* 16:35: vs. 20 ma inana. † 16:37: Mai Rome ai tarawatu lamna, “Eġa rava Romei ma kwapu labalababai bo ma pani da au naona ma rauetarei.” Rome Israel i vibadei Iesu ana au mara.

<sup>2</sup> Ma i rui au boru numana au Sabate me mara patapatai i kaukauei nanare, kampa Sabate tonuḡa rava awari God riwana i viararamani.

<sup>3</sup> Ma God riwanei i viararamana da Keriso ina vinuapoapoe ma iraḡelei ina vomairi me, “Wei ravana a bababaniei awarimi, tauna Iesu Keriso.”

<sup>4</sup> Mai Jew ḡelau orai i taini ma tau i votaḡotaḡoi. Ma nanare Jentail nelara maḡamaḡagau God taurauduneleina ma waivine wavai naenaei maḡamaḡau.

<sup>5</sup> Wate mai Jew i unura ma rava ora-potapotai maḡamaḡau au etanai i tami ma au taon vikaruwaḡawaḡa i vikarei. Ma oroto wavana Jason ana numa i ruini Paul ma Sailas i baibaiei da ita opunei patara awari.

<sup>6</sup> Wate maranai eḡa ita nelaḡai tau Jason ma kerisiana ḡelau i taina-naiei taon babadai awari, ma i garara, “Wei ravai dobu au anataputa apoapoe maḡamaḡau i kauei, marina i ḡetai ata au dobu.”

<sup>7</sup> Ma Jason, Paul ma Sailas i taravaini ana au numa. Tau Caesar ana tarawatu e viviaigai ma e ririwa da gulau ḡelauna e mame wavana Iesu.

<sup>8</sup> Maranai patara ma taon babadai wei babanina i nonori tau amloi i ḡaiḡai kaua,

<sup>9</sup> ma Jason i egari da mane ḡaeḡaena i vimaiei da eḡa mae boaboa ḡelauna ina vitupui. Ma tau Jason i voterei da i nae.

### *Au Berea*

<sup>10</sup> Ma waguvarai tauvitumaḡana Paul ma Sailas i paritawanei au Berea. Maranai kampa i ḡeta, ma i rui au boru numana.

<sup>11</sup> Mai Berea i viaiaii, eḡa me mai Thesalonika. Tau i rautaniḡana ma i votelatela ma marana patapatana God ana buka i 'aiavi da ita aramanei da Paul aiwai i bababaniei lamna riwa kaua.

<sup>12</sup> Ma lamnei mai Jew maḡamaḡau i vitumaḡana, ma nanare mai Greek waivinei wavai naenaei ma nelara.

<sup>13</sup> Maranai mai Jew au Thesalonika paratana i nonori da Paul God riwana i raraugugulei au Berea, tau maiteni i nae kampa, ma rava i rauegari da ḡavia ita vikarei.

<sup>14</sup> Maratagogi kerisiana Paul i paritawanei au gera wate Sailas ma Timothy au Berea provins i mae.

<sup>15</sup> Ma nelara Paul i tauvigwanigwaniei da au Athens, ma Paul nelarai i riwei ma i paritawanei au Berea da Sailas ma Timothy ita riwei da laḡilaḡina ita nei awarina.

### *Paul au Athens i raugugula*

<sup>16</sup> Ma Paul au Athens ana rava i paipaini, ma i 'nanai da kampa kokoitau i maḡa kaua ma i vinuabola kaua.

17 Mai Jew ma mai Greek God tauviborumeina awari i jima guratana au pari numana ma nanare au deba, aiai da i ġeta ma i rautaniġana.

18 Ma rava ġelau nuaulaulai i ġetai ma maiteni i vitarapiri, tui e ġoreġorei mai Epicure ma mai Stoic\*, tui lawana ai kaua tauviararamanai. Ma ai rava ġelau i paridadana, “Wei ravana aiwai e voġavoġanei?” Ġelau i riwa, “Mepa da tauna dobu ġelau ai god e babaniei.” Tui wenanare i babani aubaina Paul Iesu Riwana Aiaina ma ana iraġe ma ana vomairi me, i raugugulei.

19 Ma i taravaini ma i naiei ai au boru e ġoreġorei Areopagus ma i riwei, “Ma nei ma a ġoei da am viararamanana vouna e babaniei, ata aramanei.

20 Kaua ġelau e babaniei tauai a vivinuanainei, ma a ġoei da ana aramanei anona aiwai?”

21 (Taumana ma mai Athens marana patapatai ai nola eġa aiwai, da kaua voui ina virarautuei ma ina nononori.)

22 Ma Paul babadai au naoi i mairi ma i riwa:

Dogadogara mai Athens! A inana da taumi vipatupatumi ami god awarii,

23 A bababara ma ami pulo aniapunana a inainanai, ma tagogi a inanai au tepana i giruma, “Wei God eġa ata araramaneia aubaina.” Wei Godna o viviborumei wate eġa ota aramanei. Tau ana riwemi nai Godna aiai.

24 ✧ Tauna God mara ma dobu ma aiwai anatapuna au orana i kauai. Ma tauna mara ma dobu badana, ma numa rava uranei e voavoai au orana eġa ita mamae.

25 Ma eġa rava ai agu ita paipaini, tauna agu eġa ita ġoeġoei. Aubaina tauna rava lawana ma lavutu ma anatapuna e vereverei.

26 Au karena rava tagogi i kauai ma nai ravanei dam patarai i vitupua ma dobu i maeni. Tauna ainelana rava ai mara i terei da ina mae ma ina iraġe ma animae paratana i aiterei.

27 God wenanare i kauai da rava tauna ina baiei da mepa ina nelaġai. Wate tauna au ġereġereta, eġa au uama.

28 Taugiruma ġelauna Greekei i riwai pa, “Taunei ta mamae ma ta bababara ma anatapuna ta kaukai.”† Ma wate ami

\* **17:18:** Mai Epicure rava wavana Epicurus ana viararamana i votaġotaġoi. I viararamana da lawana ana ano lamna nuaiaii. Da tui aiwai da tupuai ma matai ana rauoġara, e vivinuaiaiei. Ma aiwai da e virovorovoi bo iniviaru e verevereia. Tui wei lamna e ġeduġeduai. Tui e ririwa da God rava eġa ita vinuavainei Stoic rava wavana Zeno ana viararamana e votaġotaġoi. I viararamana da rava ma ai maiteni au ririvata ta mamae (nature) ita vivirei, Tui ai ġoana ma ai erawa ita teretawanei ma ita vinuanotanota kaua ma avena rava ġelau ai agu ita raunenelei. Tui e ririwa, “Nu-aiaii lamna kaua e vovoterei da mena ina tupua nei nanare ina tupua.” ✧ **17:24:** 1Ki 8:27; Act 7:48 † **17:28:** Epimenides Ciritei au 6 century BC.

taugiruma ġelauna i girumi i pa, “Tauai nanare tauna natunatuna.”<sup>‡</sup>

<sup>29</sup> Ma tauta God natunatuna, eġa tana notai da God lamna me kokoitau, goldei bo silvei i kauei. Rava uraiei ma ana nuaulaulauei i kauei.

<sup>30</sup> Wariaġa rava God eġa ita aramanei wate God tau i nana-tawanei, wate marina anaputa egaegarita da tana rupena ma tana mae-tavireta awarina.

<sup>31</sup> Aubaina mara i vinei maranai rava anapui aiainei ma jijimaninei ina kovoġi. Rava i vinei da taunei ina kovoġa. God wei ravana iraġelei i vovaimairini lamna ina vimataira rava awari da ravana anina tauna.

<sup>32</sup> Maranai Paul iraġelei vomairina i babaniei, rava i nonori ma ġelau tauna i vinamei wate ġelau i riwa, “Tauai a ġoei da muriai wei babanina ma babaniana-melei.”

<sup>33</sup> Ma Paul ai boru i opu-tawanei ma boru i gudu.

<sup>34</sup> Wate ġelau i vitumaġana ma Paul i votaġotaġoi. Tagogi lamna Dionisius, Areopagus boruna au orana, ma wavine wavana Damaris, ma rava ġelau.

## 18

*Paul i nae au Corinth da rava awari Iesu ita jimej*

<sup>1</sup> Paul Athens i netawanei ma i nae au Corinth.

<sup>2</sup> Kampa Akwila tauna Jew au Pontus i tupua, marinaota au Italy<sup>\*</sup> da i nei awana Prisila maiteni. Aubaina Rome ai gulau Claudius mai Jew anapui i viaġaġei da Rome i opu-tawanei. Paul i nae da tau i ita inamai.

<sup>3</sup> Paul tau i maiteni i mae, tau i tauampopo, (ġamoġamo opina ma gara i popopoi numa aubaina ma i gimagimarei) me Paul ai nola tagogina.

<sup>4</sup> Sabate patapatana au pari numana tauna mai Jew ma Jentail awari i jima guratana da orai ita sinavirai.

<sup>5</sup> Maranai Sailas ma Timothy au Masedonia da i ġetai, Marina Paul BADA riwana ava i raugugulei mai Jew awarii da Iesu tauna anina God ana Vinevine Keriso.

<sup>6</sup> Wate mai Jew Paul i viġaviei ma riwa apoapoenei i ririwei. Ma tauna ana gara i rauabuabui ma awari i riwa, “Mepa da o kwako, lamna ona viwavu-melemi, eġa tau ona viwavuii! Marina da e nanae, ana nae Jentail awari.”

<sup>7</sup> Ma tau i voterei ma i nae Jentail wavana Titus Justus ana au numa i mae, tauna God tauviborumeina ma ana numa pari numana au ġereġerena.

<sup>‡</sup> 17:28: Aratus Silisiei 3 century BC.      \* 18:2: Rome taon lamna taon ġaeġaena au Italy ma ai kapital AD. 49 au orana kampa viġaiġaiawa ġaeġaena da wavalatona Claudius mai Jew i riwei da dobuna i netawanei.

<sup>8</sup> Crispus, pari numana ai bada, BADA i vitumaḡanei ana numa ravai maiteni, ma mai Corinth maḡamaḡau Paul i rautaniḡanei, i vitumaḡana ma i babataito.

<sup>9</sup> Waguvara tagogi BADA Paul ana au inana i babani i pa, “Eḡa ma rovo, ma babani ma eḡa ma genuana.”

<sup>10</sup> Aubaina Tau tam maiteni. Ma rava eḡa ina rau-iviapoapoelem aubaina au tauvotaḡotaḡo i maḡa wei au dobona.

<sup>11</sup> Ma Paul kampa i mae madeḡa tagogi ma nawaravi six, ma God riwana i jimei.

<sup>12</sup> Wate maranai Galio i vi-Gavena au Akaia provins, mai Jew kampa i vitagogiei ma Paul i vojijini ma i naei Gavena awarina da ita rauetarei.

<sup>13</sup> Ma tau i viwavui 'pa, “Wei orotona ana moruei rava orai e taitaini da God e viviborumei ma ata tarawatu e viviaigai.”†

<sup>14</sup> Ma Paul gamona i laḡi da ita babani ma Galio i babani mai Jew awari i pa, “Mepa da taumi wei ravana o viviwavui da kaua ḡaeḡaei bo kaua apoapoe aubaina, lamna tau au nola da ata rau-taniḡanemi.

<sup>15</sup> Wate wei taumi ami babani ami wava ma ami tarawatu, ana voterei au urami. Tau eḡa wei kauai ana rauetarei.”

<sup>16</sup> Ma etara numanei i viaḡaḡana-opunei.

<sup>17</sup> Tau i anatapui pari numana ai bada Sothenis i vojijini ma i vunui etara numana au naona wate Galio tau i 'nana-tawanei.

### *Paul i nae me au Antiok au Syria*

<sup>18</sup> Paul i mae mara aburuna tauvitumaḡana maiteni au Corinth ma wagei i nae au ḡereḡere au Cenkirei waga ai au animae. Prisila ma Akwila maiteni. Ma kampa Paul ana parivainuaḡana aubaina aparana i ḡari, ma anatapui i nae au Syria

<sup>19</sup> Tau i Ephesus i ḡeta ma Paul, Prisila ma Akwila i voterei. Ma i nae au boru numana Mai Jew awari i jima.

<sup>20</sup> Rava i vibaḡai da ita mae mara aburuna wate tauna eḡa ita vianina.

<sup>21</sup> Wate maranai i opu da ita nae ma tau i iriwei, “Ana nememei mepa da God ana ḡoana, ma Ephesus i netawanei ma wagei i damana.”

<sup>22</sup> Maranai i ḡeta au Caesarea ma i nae au Jerusalem da kerisiana i raugenari ma i nae au Antiok.

† **18:13:** Mai Jew e ririwa da Paul eḡa tau ai vitumaḡana oina ita viararamani ma wei Rome ai tarawatu i vianinei, wate e ririwa da Paul rava taparoro vouna e viararamani ma wei Rome ana tarawatu e viviaigai, lamna aubaina tau i ḡoei da Rome ai bada Paul ina kovogi. Ma inanai Act 16:20-21 ma 17:7.

<sup>23</sup> Au Antiok i mae mara aburuna ma Galatia provins ma Pirijia provins i naeni ma kerisiana i vovai-virewapani.

*Apolos mai Ephesus awari i raugugula*

<sup>24</sup> Wei marana Apolos tauna Jew, au Alexandria da Egypt da i nei au Ephesus. Tauna BADA riwana ma ana giruma i aramana-kauei ma rava bababanina.

<sup>25</sup> Rava gelaui, Apolos BADA ana etanai babanina, i viararamani, ma ana tepatorana i jima ma Iesu ana kaua ma ana lawana i viararamana-kauei. Wate tauna John Taubabataito ana babataito babani ava i aramanei.

<sup>26</sup> Ma i vikarei da ana tepatorana i raugugula au boru-numana. Wate maranai Prisila ma Akwila tauna ana babani i nonori. Ma i gōrei da maiteni i nae ai au numa ma BADA ana etanai ana babani i viaramana-kauei.

<sup>27</sup> Maranai Apolos i nenaē au Akaia, kerisiana Apolos i vovai-virewapani. Ma kerisiana au Akaia ai pepa i giruma da ita parivere i da tauna ita nebelei. Maranai au Akaia i gēta ma tau i God ana aguei i vivitumaḡana, agu ḡaēḡaena i verei.

<sup>28</sup> Tauna ana babanie i au deba mai Jew i vovaiubai. Ma God riwana i vaia ma lamnei rava i viararamani da Iesu anina Keriso.

## 19

*Paul au Ephesus*

<sup>1</sup> Apolos au Corinth taon Akaia provins i mae, ma Paul ola i taḡoni da au Ephesus i gēta. Kerisiana gelaui kampa

<sup>2</sup> ma i paridadanei i pa, “Arua vivivireina o vaia bo eḡa maranai o babataito?”

Tau i paribelei i pa, “Eḡa, Tauai eḡa ata aramanei da Arua vivivireina e mamae.”

<sup>3</sup> Ma Paul i paridadana, “Aiwai babaitona o vaia?”

Tau i paribelana, “John ana babataito a vaia.”

<sup>4</sup> ✧ Paul i riwa, “John ana babataito lamna mataira da tau i ai ḡo’apoapoelei i mae-tavirei; ma mai Israel i riwei da Tauna au muriu e nenei ona vitumaḡanei lamna Iesu.”

<sup>5</sup> Maranai wei i nonori ma i aramanei tau i babataito BADA Iesu wavanei.

<sup>6</sup> Ma Paul urana au kolai i terei ma Arua vivivireina au orai i rui. Ma i vikarei da pona tapunei i bababani ma God riwana i raugugulei.

<sup>7</sup> Tau i nelara iavana twelve.



<sup>8</sup> Paul i nae au boru-numana ma kampa nawaravi tonuḡa au orana ana tepatorana mai Jew awarii i bababani. Da rava orai ita sinavirai da BADA ana vigulau ita vitumaḡanei.

<sup>9</sup> Wate ḡelau kampa orai i bagibagi ma eḡa ita ḡoei da ita vitumaḡana, ma patara au matai Iesu ana etanai i vijiboḡi. Ma Paul tau i voterei ma kerisiana i taravaini ma i nae Tairanus ana au numa, ma kampa i viararamana ma i giugiu pompom.

<sup>10</sup> Ma nanare i mae madeḡa ruaḡa i kwa, da mai Jew ma Jentail ravai maḡamaḡau au Eisia provins maemaei BADA riwana i nonori.

*Sceva natunatuna*

<sup>11</sup> Ma God ana rewapanei Paul kua ḡaeḡaei ma aniba i kaukauei,

<sup>12</sup> lamna avena wate rava ai agesi da ai nola garai i naiei Paul awarina da i vodadani ma i naei da rava doridoriai i vodadani, ma arua apoapoei i opu-tawanei ma i lawana.

<sup>13</sup> Mai Jew ḡelau dobuna i naeni ma arua apoapoei i viviaḡana-opunei ma i raudadana Iesu wavanei da arua apoapoei i viviaḡaḡei. Tau i arua apoapoei i riwei i pa, “Iesu wavanei, taunei Paul e raraugugula, Tau a egarim da ma opu.”

<sup>14</sup> Skeva, pirisi ai bada natunatuna nelarai seven wei kauana i kaukauei.

<sup>15</sup> Wate mara tagogi arua apoapoena i paribelei, “Iesu a aramanei ma Paul a aramanei ma taumi aiavoi?”

<sup>16</sup> Ma rava au orana arua apoapoena maemaena i auepai ma tau i vunui da eḡa ita vikalokaloei. Ai gara i sika-naei ma ana kovakovai ma tararatai numei i viopuopuana ma i viruberubei.

<sup>17</sup> Mai Jew ma Jentail ravai au Ephesus maemaei wei riwana i nonori ma rovo orai i ḡaeni ma Iesu wavana i vivirana-kauei.

<sup>18</sup> Maḡamaḡau i vitumaḡana ma i nae kerisiana awarii ma ai ḡo’apoapoe i rupeni.

<sup>19</sup> Tauvitumaḡana voui maḡamaḡau paraparaumai,\* ai buka i vidamni au deba ma i apui. Marana i bukai ai maia i ’avi da silver 50,000†.

<sup>20</sup> Kaua babai me wei, Iesu riwana i vibabarai nai au dobuna ma rava maḡamaḡau i vitumaḡana.

<sup>21</sup> Wei anatapuna au murina Paul au orana i vinua-notanota da au Masedonia da Akaia ita verautuini da ita damana au Jerusalem ma i riwa, “Ana nae au Jerusalem ma muriai ana nae da Rome ana inanai.”

---

\* **19:19:** Au Deu 18:10-14 God ana rava e vivigaei da eḡa ina parauma. † **19:19:** Dracma coin tagogi lamna tau-vobagibagi ana maia au pom tagogi aubaina. Marina lamna million biaḡa.

22 Ma Paul ana tauagu ruaḡa Timothy ma Erastus i aiparitawanei au Masedonia provins, ma tauna kampa i mae mara aburuna au Eisia provins.

*Vigaiḡaiawa au Ephesus*

23 Iesu ana babani ma ana kaua vouna aubaina, ma vigaiḡaiawa ḡaeḡaena i tupua au Ephesus.

24 Silver taunoleina wavana Demetrius, mai Greek ai god wavinena ana numa taparoro kokoitau i rarau-ḡaroḡaroei da i gimagimarei, ma wei nolana mane ḡaeḡaena e neineiai silver taunoleina nai au dobuna aubaii.

25 Ma tau i anatapui ai rava nolana tagogina e kaukauei maiteni i rauḡoreiai ma i riwa, “Au rava, o aramanei da ata maura wei nolanei ta vaivaia.

26 Ma o inana ma o nonori menanare wei ravana Paul e kaukauei, Rava ai nota i sinavirai da maḡamaḡau god Artemis raudunena i voterei au Ephesus ma dobu Eisia paratana anatapuna. Ma e ririwa da ‘rava god i rauḡaroḡaroei, lamna eḡa god.’

27 Tauta tana inana kaua da wavata ma ata mane ani kauana eḡa ina apoapoe. Ma ata god ḡetelarana Artemis ana numa taparoro ma wavana eḡa ina vijiboḡi, eḡa au Eisia provins ava ma dobu au anatapuna.”

28 Maranai patara wei babanina i nonori tau i meji kaua ma i vigaragarei, “Artemis mai Ephesus ai god i ḡetelera!”

29 Ma tau i garagarara rava nai au dobuna i nonori ma tau maiteni i garara labalababa. Anina ma patara Gaius ma Aristakas i vojijini tau ruaḡai mai Masedonia Paul ana tauvigwanigwaniana, ma i rubana-naiei nai dobuna ana boru gabuna.‡

30 Paul i ḡoei da patara au naoi ita rui da ita babani wate kerisiana eḡa ita vianinei.

31 Wate nanare Paul ana rava ḡelau i gabemani tauna i viḡaei da eḡa ina nae au boru.

32 Patara i vinuanaina, i logologoi ma i garagarara labalababa ma eḡa ita aramanei aiwai aubaina weka i nei.

33 Mai Jew oroto tagogi i dudu-opunei au naoi wavana Alexander ma patara ḡelau i garara awarina da ita babani. Alexander urana i voepai da tau i ita genuana ma tauna ana rava aubai ita babani.

34 Wate maranai i aramanei da tauna Jew. Tau i anatapui pona tagoginei wenanare i garagarara, “Tauta mai Ephesus ata god Artemis i ḡetelera!” da *hour* ruaḡa i kwa.

‡ 19:29: Dobuna ana boru gabuna lamna numa ḡaeḡaena. Eḡa poewana, ma inana me nawaravi gebona. Rava maḡamaḡau 26,000, nanare ina kiala **meeting place**. Rava e nanae kampa da kalo tapuna ma e raruabiḡa.

<sup>35</sup> Ma taon badana patara i riwei da i genuana ma i riwa, “Au rava mai Ephesus, rava anatapui au dobu i aramanei da tauta tauvipaipai mai Ephesus ai god ġeġetelarana Artemis ana numa taparoro ma ana ġaima vivireina marei i peuai aubaina.

<sup>36</sup> Eġa aiwei ina vikaua-moruei. Lamna aubaina orami ina rauei ma eġa aiwai apoapoena ona kauai.

<sup>37</sup> Wei ravai o neiai weka wate tau i eġa au numa taparoro aiwai ita danenei bo ata god ita riwana-boei.

<sup>38</sup> Mepa da Demetrius ana rava maiteni e viviwavui tau i ina nae ina rautara ma ami viwavu ona naei kampa taurautara awarina.

<sup>39</sup> Ma mepa da ami nuabola ġelau i mamae lamna taon babadai ai au boru ona babaniei ma ona tere-jjimani.

<sup>40</sup> Ma amadodo aiwai i tupua, tau a rovo da ina viwavu ma mae-boaboa aubaina. Wei vikaruwaġawaġana anona eġa, ma mepa da Rome ina paridadana ma tauta menanare tana paribelananei.

<sup>41</sup> Anina ma boru i gudui ma rava i vilamonei.”

## 20

*Paul i nae au Masedonia ma Greece*

<sup>1</sup> Vikaruwaġawaġa au Ephesus taon i kwa ma au murina Paul kerisiana i raukwatueiai da i vinua-terenei, i viegualau i ma i netawanei da i nae au Masedonia provins.

<sup>2</sup> Ma dobuna ġaeġaenana i naeni ma kaua maġamaġau kerisiana i vinua-terenei. Anina ma au Akaia\* i ġeta.

<sup>3</sup> Kampa nawaravi tonuġa i mae. Tauna i vokaukaua da ita nae au Syria ma wate i nelaġai da mai Jew ġelau i viraġenana i vivioġatarei lamna aubaina da i nae me au Masedonia.

<sup>4</sup> Nelara ġelau i votaġotaġo tau i lamna Piras natuna Sopater ana dobu Berea; Aristakas ma Sekundus, mai Thesalonika, ma Gaius tauna ana dobu Derbi; ma Tijikus ma Trophimus ai dobu Eisia provins; ma Timothy.

<sup>5</sup> Tau i wagei i ainae au Troas ma kampa i painiai.

<sup>6</sup> Ma palawa bagibagina torelana au murina, wagei Philipai taon au Masedonia provins a netawanei. Ma aupom 5 au murina au Troas a ġeta ai rava awari, kampa aupom 7 a mae.

*Au Troas, Paul Eutikus iragħelei i vovaimairini*

<sup>7</sup> Wiki au karena - Sunday tauai a vitagogielai voepaepa ma BADA ana amogona aubaina, ma kampa Paul i jima da nubautuva, aubaina maratonna da ita nae.

<sup>8</sup> Numa vatavatara au tepana a vitagogielai, ma kampa rampa maġamaġau i ararata.

\* **20:2:** Marina e ġoreġorei Greek.

9 Orotō laragana wavana Eutikus au windo i kiakiala ma Paul i raraugugula, ma tauna matana i pota kaua da i raunuavuru, ma kampa au tepa dewadewana i peu-ġaira da au doa i rauei. Maranai tau i ġaira da ita voepai, tauna irairāgena.

10 Paul i ġaira, i matave-tepani ma i rapai ma rava i riwei i pa, “Eġa ona vinuabola, tauna lawalawaina!”

11 Anina ma Paul i ġae me au numa ma kerisiana maiteni BADA ana amgogona amna i ani ma awari i babani maratōm. Ma Paul nai dobuna i netawanei.

12 Tau laragana lawalawaina i naiei au numa ma rava orai i rauei.

*Paul i amkuka au Miletus*

13 Paul aenei i nae au Assos ma tauai i riwelai da wagei ana nae au Assos da tauna kampa ana vigerui.

14 Ma au Assos a vigerui ma a nae au Miletus

15 Maratōmna bonabona Kios au ġereġerena a nae. Ma marana i tom au Samos a ġeta, ma maratōm ġela au Miletus a ġota.

16 Paul i ġoei da jijimanina ina nae ma avena ita rui au Ephesus, eġa ita ġoei da au Eisia provins ina mae-guratana. Tauna i vipaparana ma mepa da tagotagogina au Jerusalem ina ġeta muriai da Pentecost torelana.

*Paul kerisiana au Ephesus i netawanei*

17 Au Miletus Paul riwa i paritawanei au Ephesus taon kerisiana babadai awari da ita nebelei.

18 Maranai au Ephesus taon i ġetai ma tau i riwei i pa:

O aramanei au lawana menanare maranai vovounai weka au Eisia provins a ġetai.

19 Mai Jew i ġoei da ita rau-iviapoapoeleu wate tau a vilamolamona ma ana toutou BADA awarina a vivitaunola.

20 O aramanei da maranai God Riwana Aiaina awarimi a raugugulei, riwa aiaina aniaguimi eġa ata tajijini. Au deba a raraugugula rava maġamaġau au naoi, ma ami au numa a viararamanimi

21 Riwa bagibagina mai Jew ma Jentail a verei, A riwei da ita rupena ma ita mae-tavirei God awarina ma Iesu ita vitumaġanei.

22 Ma marina Arua Vivivireina i riweu da aṅa nae au Jerusalem. Eġa ata aramanei kampa aiwai awariu ina tupua.

23 Wate taon nununai awari a nena ma Arua Vivivireina e vivieġeu da amapu ina panu ma au deri ina tereu ma ina rau-iviapoapoeleu.

24 Ma mepa da ina viraġeniu, wei lamna eġa kaua ġaeġaena tau awariu. Wate kaua ġaeġaena lamna BADA Iesu nola

i verevereu da ana vikwai. Wei nolana lamna, God ana iviaiai maemaena, riwana ana raugugulei.

<sup>25</sup> Maḡamaḡaumi awarimi a nei ma God ana vigulau a raugugulei wate marina a aramanei da amadodo da i nenaē, naou eḡa ona inana-melei.

<sup>26-27</sup> God ana vilawana ogatarana rava aubaii eḡa ata govaḡi awarimi lamna aubaina riwa bagibaginei a ririwemi da mepa da rava au babani eḡa ina vitumaḡanei ma ana lawana maemae-nonoana ina vine-boai, lamna eḡa tau au wavu.

<sup>28</sup> Taumi babada ma ona paina-melemi, nanare tauvitu-maḡana tau aiavoi da Arua vivivireina au urami i teretereia. Ona inana-vaitetei me sipu taupainana ana sipu e paipaini. Tau lamna God ana vinevine taranei i gimarai.

<sup>29</sup> A aramanei da ana nae ma au muriu tauraugugula morumorui ina nei awarimi ma rava ai tumaḡana ina viapoapoeni, me auou moduei sipu au boruna viragaena aubaina.

<sup>30</sup> Ma rava ḡelau ami au dam oina ina vomairi ma ina viararamana ma moruei rava orai ina taini da tau ina votaḡotaḡoi.

<sup>31</sup> Lamna aubaina matami ina kala ma ona aramanei da madeḡa tonuḡa marai ma waguvarai a notanotaimi ma ana toutou a viviararamanimi.

<sup>32</sup> Ma marina God au urana a tereteremi. Ana agu e verevereoimi ona vivitumaḡanei. Wei aguina e vovavirewapanimi, ma ami pulo ina veremi, aubaina taumi God natunatuna viaiainai.

<sup>33</sup> Ma tau eḡa rava ana mane bo ana purapura ata rauoḡarei

<sup>34</sup> Taumi o aramana-kauei da tau nimauei a nola da mane a vaia da tau au taubagibagi turau aubaii.

<sup>35</sup> Nanare, a viataiaimi da ona nola guratana da mane ona vaia ma molaka ona voagui. Iesu ana babani eḡa nuanuami ina vuru, Tauna i riwa i pa, “Verena i ai kaua eḡa me vainana.”

<sup>36</sup> Paul i babani vorovei ma anapui i mae-ḡaira au doa ma i raupari.

<sup>37-38</sup> I vinolanola i pa, “Amapo eḡa naou ona inana-melei.” Wei riwana i vinuabolai da i vitouana, Paul i taragwabai ma i vigialaḡolaḡonei. Ma i naiei da au waga i vigeruei.

## 21

### *Paul ana vaḡai au Jerusalem*

<sup>1</sup> Ephesus kerisiana babadai a viegualauei ma wagei jijimanina a nae au Cous bonabonana ma ubaubanai a nae au Roudes bonabonana, kampa da a damana au Patara taon.

<sup>2</sup> Weka waga ḡelauna i nenaē au Phonisia a gerui,

<sup>3</sup> da au Saipras bonabonana a rubatawanei, au kelakelauai da a nae au Taia au Syria provins a ġota, da purapura ita viopuni.

<sup>4</sup> Kampa tauvitumaġana a baiei ma aupom 7 maiteni a mae. Arua Vivivireina kerisiana i riwei da Paul awarina aiwai ina tupua, ma lamna aubaina Paul i viġaei da eġa ina nae au Jerusalem.

<sup>5</sup> Ma mara i ġetai da ata vomairi, kerisiana awawai maiteni da natunatui taon i voterei ma anatapuiai a ġaira au gera, a raupari gogona.

<sup>6</sup> A vieġualau da tauai au waga a geru ma tau i nae-me ai au numa.

<sup>7</sup> Au Taia ma a nae au Tolemais taon a ġeta. Tauvitumaġana kampa a nebelei ma aupom tagogi maiteni a mae.

<sup>8</sup> ✧Ma marana i tom ma dobuna a voterei ma a nae au Caesarea, kampa God riwana taujimeina Philip ana au numa a mae, tauna oroto vi-7-na au Jerusalem i vinevinei da lam taupainina.

<sup>9</sup> Tauna natunatuna waivinei 4 eġa tavitavinei, tau i God ana riwa i vivieġai rava awari.

<sup>10</sup> ✧Aupom vomaġau i kwa, kerisiana wavana Agabas, tauna nanare God riwana i vivieġai, Judeaei i ġairai au Caesarea.

<sup>11</sup> Ma i nei awariai da Paul ana tairoro i vaia ma tauna urana ma aena i raġina-melei ma i riwa i pa, “Arua Vivivireina e ririwa, da Jew babadai wei tairorona taniwagana wenanare ina raġini, ma Jentail au urai ina terei.”

<sup>12</sup> Maranai wei riwana a nonori, tauai kerisiana ġelau i maiteni Paul a vibaġana-guratei, da avena ita nae au Jerusalem.

<sup>13</sup> Wate i pa, “Aiwai aubaina o vivitouana ma orau o viviapoapoeni! Tau a vokaukaua nonoa da ina raġiniu, wate eġa lamna ava ma ina viragġeniu au Jerusalem, BADA Iesu a vovotaġotaġoi aubaina.”

<sup>14</sup> Tauai a viviġaei ma eġa tagotagogina da nuanuana ata sinavirai lamna aubaina riwanana a voterei ma a riwa a pa, “BADA ana ġoanei nanare ina tupua.”

<sup>15</sup> Wei au murina a vokaukaua ma a vomairi au Jerusalem.

<sup>16</sup> Kerisiana ġelau i mai Caesarea I naielai Nason ana au numa ma kampa a mae. Tauna oroto Saiprasiei, ma Iesu votaġona i vikareni maranaina rava vovounai i vikarei da Iesu Riwana Aiaina i rarau-gugulei.

*Paul, James i raugenari*

17 Maranai au Jerusalem a ġeta kerisiana ana nuaiiai i nebelelai.

18 Maratom ġela Paul maiteni a nae da\* James a raugenari,† dogadogara anatapui kampa.

19 Paul tau i viegualauei ma ana au vaġai God aiwai i kaukauei Jentail awari anatapuna tau i pariveri.

20 Maranaina wei riwai i nonori, tau God i voepaepai ma Paul i riwa i pa, “Turaiai u aramanei mai Jew ai maġa tausan nanare weka Iesu e vivitumaġanei, ma God ana tarawatu e vovotaġo-kauei.

21 Wate rava Jew kerisiana weka au Jerusalem am kaua i vibenabenaeci, da tam Jew Jentail maiteni e mamae e viaramani da Moses ana tarawatu ina gedugeduai. Ma u riwei da natunatu ini eġa ina bori ma ai kaua ġelau eġa ina votaġotaġoi.

22 Tau i aramanei da tam u ġetai, Marina aiwai tana kauei?

23 Aiwei a ririwemi ona kauei. Au nelara 4, tau parivain-uāġana bagibagina God awarina i kauei.

24 Ma taravaini ma ona nae au Tempol ma ona viaiaina-melemi ma ma vimaia da tau ai viaiaina pulona ina kauei. Anina ma tau kolai ina ġari ma rava anatapui ina aramanei da tam Moses ana tarawatu anina e vovotaġotaġoi, ma babani au naona lamna anatapuna moru kaua.

25 \*Ma Jentail marina i vivitumaġana aubaii pepa a girumi ma wenanare a riwei, sia e pulopuloei kokoitau awarii eġa ina ani, Tara eġa ina umai, Rava ġamoġamo uai e kikiki tarai eġa ita toi-tawanana, eġa ona ani. Eġa ona viawawana labalababa.”‡

26 Anina ma marana i tom Paul nai nelarai 4 maiteni i viaina-melei God au matana. Muriai Paul i rui Tempol au orana ma i vinolanola pirisi awarii da mara aiwai tau ai viaiaina ina voterei. Ma maranaina pulo ita terei tau tagotagogi ava aubai.

*Paul i pani.*

27-29 \*Ma aupom 7 aburuna ava da ita kwa ma Jew ġelau au Eisia provins maemae tau Paul i 'nanai Tempol au orana. Au

\* **21:18:** Wei lamna Iesu ana tevera. Act 12:17; 15:13 ma Mrk 6:3 † **21:18:** Mane anatapui ai au vaġai i tami bo rava i puloi i verei damanai mane taupainina i verei ☆ **21:25:** Act 15:29 ‡ **21:25:** Viawawana labalababa wei anatapuna e vaivaipai: Rava ġela awana oroto bo wavine maiteni e viawawana (Exo 20:14, Deu 5:18); Rava ġela maiteni e viawawana mane bo purapura aubaina (Lev 19:29, 1 Cor 6:15); Natuoim maiteni e viawawana, me oroto natuna wavinena maiteni bo wavine natuna orotona maiteni (Lev 18:6); Orotu ma oroto bo wavine ma wavine e viawawana (Lev 18:22, Rom 1:26-27); Rava ma ġamoġamo e viviawawana (Lev 18:23); Rava ġela, eġa awaoim maiteni e viawawana (Eph 5:3); Rava ġelau e gaegari da maiteni ma viawawana. (Gen 34:7, Deu 22:25-28). ☆ **21:27-29:** Act 20:4

naonei tau Paul i 'nanai oroto Ephesusei wavana Trophimus maiteni, au taon i bababara ma i notai da tauna Trophimus i ruiei Tempol au orana. Tau Paul i vojijini ma i garara i pa, "Nelara mai Israel ona nei, ona voaguiai! Wei orotona dobu anapuna e nenaeni ma rava anapui e viviararamani da mai Jew ma ata tarawatu ma Tempol i parivirevirei. Tauna Jentail i neiai gabuna au vivivireina ma i tuvaidoedoei God au matana!"

<sup>30</sup> Ma rava anapui i nonori da au Tempol viḡaiḡaiawa i tupua ma anapui kampa i ruba. Ma Paul i vojijini ma i taina-opunei au doa ma Tempol metaetana i gudui.

<sup>31</sup> Maranai tau Paul viragēnana i kaukauei, Mai Rome sorodia ai bada ḡaeḡaena i nonori da viḡaiḡaiawa ḡaeḡaena i tupua au Tempol.

<sup>32</sup> Tauna laḡilaḡina ana sorodia ma ai babada i vaini ma i ruba kampa, maranai rava tau i 'nanai, Tau Paul vunuaana i voterei.

<sup>33</sup> Sorodia ai bada i nei Paul awarina da i vojijini ma ana sorodia ruaḡa i riwei da seinei Paul urana au urai i pani jijini. Anina ma tauna patara i vitara-virevirei i pa, "Wei aiai orotona? Aiwai i kauēi?"

<sup>34</sup> Patara au orana rava ḡelau babani tagogi i gararei, ma rava ḡelau babani tapuna i gararei. Rava were da nare i garagarara da sorodia ai bada menanare ita nelaḡai gaiawa karena aiwai, lamna aubaina ana sorodia i egari da Paul ita naiei, ai au bareki.

<sup>35</sup> Maranai Paul bareki tetena i tutuḡereḡerei, patara i ḡaiawa guratana aubaina sorodia Paul i voepai da i avarai da ita gagaloei.

<sup>36</sup> Patara amapo da tau i vovotaḡotaḡoi ma i garagarara i pa, "Ona viragēni, ona viragēni!"

*Paul patara awarii i babani.*

<sup>37</sup> Maranai tau aburuna ava da au bareki ita rui, Paul Greekei sorodia ai bada i riwei i pa, "Anina bo eḡa da awarim ata babani?"

Ma tauna i auepai ma i riwa i pa, "Tam Greek u aramane bo?"

<sup>38</sup> Tau a notai da tam Egyptei, rorova ai babada u viḡavie, Ma rava 4,000 orai potapotai u opunei au mutulua, Tam nai ravana bo?"

<sup>39</sup> Paul i paribelana i pa, "Eḡa! Tau Jew ei, au taon Tarsus a tupua, au Silisia provins, a vivibaḡaim da rava awari ana babani."

<sup>40</sup> Tauna i vianina ma Paul au tete i mairi. Tauna urana i voepai da patara garara i voterei. Maranai tau i genuana, Paul tau awarii ai ponanei i babani i pa.



## 22

1 “Amamau ma varevareiu, ona rautaniġaneu ma ana viatataiemi da tau eġa aiwai ata kauana-boai.”

2 Maranai patarana Paul i nonori da tau i ponei i bababani, tau i genuana ma i rautaniġana.

3 <sup>✠</sup>I riwa:

Tau Jew ei, Tarsus au Silisia provins a tupua wate weka au Jerusalem a rata ma a giruma. Amamata ai tarawatu a girumei ma au tauviararamana Gamaliel.<sup>\*</sup> A ġoana-guratei da God ata voepaepa-kauei me taumi anatapumi nanare.

4 <sup>✠</sup>Tau Iesu ana etanai tauvotaġotaġoina a rau-iviapoapoelei da ġelau i raġe. Nelara ma waivine a pani ma au numa panipani a tawana-ruiei.

5 Pirisi ġeġetelarana ana boru ġeġetelarana<sup>†</sup> maiteni i aramanei da tau a ririwa kaua. Tau i vianina pepana i vereu da ai rava au Damaskas ata verei ma a nae au Damaskas da kerisiana ata pani ma a neiai da kovoġa ita vaia weka au Jerusalem.

6 Aubenai Damaskas a tuġereġerei ma maratagogi lalaina gamrina ġaeġaena marei i ġairai da i tunui.

7 A peu au doa ma pona a nonori i pa, “Saul! Saul! Aiwai aubaina e rarau-iviapoapoeleu?”

8 Tau a paribelei, “Bada tam aiai?”

Tauna i paribelei, “Iesu Nasaretei e rarau-iviapoapoelei.”

9 Rava maiteni a nena lalalaina i 'nanai wate babani eġa ita nonori.

10 A paridadana a pa, “Bada Aiwai ana kauei?” Ma Tauna i riwa i pa, “Ma vomairi ma nae au Damaskas. Kampa rava am nola ina pariverem.”

11 Lalalaina gamrina i rata guratana ma matau i kamoi da eġa ata inainana. Ma tauvigwanigwaniana au urai i voa ma i naieu au Damaskas.

12 Orotu wavana Ananias kampa i mae tauna God i voepaepai ma ana tarawatu i vovojijina-nonoei. Mai Jew tauna i vivirana-kauei.

13 I nei da au ririvau i mairi ma i riwa, “Vareiu Saul ma inana me!” Nai marana a inana me.

14 Anina ma i riwa, “Amamata ai God i rautanim, da ana ġoana ma aramanei, ana Taunola Jijimanina<sup>‡</sup> - matamei ma inana, ma riwana taniġamei ma nonori.

✠ 22:3: Act 5:34-39 \* 22:3: *Gamaliel* tauna tauviararamana ma rava aiaina Paul ana au mara. Tauna Pharisi ma boru ġetelarana (Sanhedrin) au orana. ✠ 22:4: Act 8:3; 26:9-11 † 22:5: Sanhedrin ‡ 22:14: Rava Jijimanina bo bulobulona, lamna Iesu wavana. Paul eġa Iesu wavana ita latoni mepa da taurautaniġana mai Jew ita viamloġaiġaini.

15 Aiwai u inainanai ma u nononori ma vimatematei rava anatapuī awarii.

16 Marina aiwai e paipaini! Tauai ana babataitoim ma BADA awarina ma raupari da am ḡo'apoapoei ina oḡa-tawanei."

17 Anina ma a nae au Jerusalem. Au Tempol a raraupari ma matauei kaua a inanai.

18 A inanai BADA awariu i bababani i pa, "Rava weka am jima tau aubaiu eḡa nonorana ita ḡoeḡoei. Laḡilaḡina Jerusalem ma opu-tawanei."

19 Wate tau a paribelei, "BADA wei ravai i aramanei da pari numai a nepai da kerisiana a vunui ma a pani-naiei.

20 \*Ma maranai am peroveta Stephen tarana i toi, tau kampa a maimairi ma ana iraḡe a vianinei ma ḡaima tautawanai ai gara a paipaini."

21 Ma BADA i riweu, "Ma nae a paripari-tawanem aueia Jentaīl awarii."

*Paul e ririwa da tauna Romei*

22 Patarana Paul i rarautaniḡanei ma maranai wei babanina i kauē tauī i meji guratana ma i vigaragararei i pa, "Ona viraḡena-tawanei, eḡa ina mael!"

23 Tauī i vigaragararei, ai kwama i kwajikwajiei ma pokau i tawatawanei awarina.

24 Ma sorodia ai bada sorodia i egari da Paul i naiei ai au bareki. Ma i riwei da Paul ita wipi da ita vieḡa aiwai aubaina ana rava amloi i ḡaiḡai ma awarina i garagarara.

25 Ma urana ruaḡa i terepai au aidamo ma i raḡiraḡini da ita wipi ma Paul sorodia ai bada i riwei i pa, "Tau Rome-ei, Eḡa ota etareu ma o vunuyunu-labalababaiu. Lamna menanare?"

26 Maranai sorodia ai bada wei i nonori ma i nae da ai bada ḡaeḡaena i parivereī. Ma tauna i vitara-virevireī i pa, "Aiwai e kaukauei? Wei ravana Rome-ei!"

27 Sorodia ai bada i nae Paul awarina ma i paridadanei, "Ma riweu! Riwa kaua da tam Rome-ei bo?"

Ma Paul i paribelei, "Ee, lamna riwa kaua!"

28 Sorodia ai bada Paul i riwei, "Tau mane ḡaeḡaena Rome gabemanina a verei da a vimai Rome."

Paul tauna i riwei, "Tau a tupua da Rome-ei."

29 Sorodia i ḡoei da Paul ita etarei wate maratagogi ita ḡori-melei. Ai bada ita ḡori ma i rovo-kaukaua maranai i aramanei da i kauana-boai da Paul, Rome-ei seinei i pani.

*Paul Jew ai boru ḡetelaranaŠ au naoi i mairi.*

30 Au maratomna sorodia ai bada i ḡoei da ita aramana-kauē mai Jew ai viwavu aiwai Paul awarina. Ma lamna aubaina

Paul ana seini i votawatawanei ma i opunei boru ġetelarana au naona i vimairini.

## 23

<sup>1</sup> Paul boru ġeġetelarana i 'nana-jijini ma i riwa, “Varevareiu tau au nola God awarina i jijimana ma orau aiaina da wei paratana.”

<sup>2</sup> Ma Pirisi ġeġetelarana Ananias rava ġelauna Paul au ririvana i maimairi i egari da Paul i raunavanavai.

<sup>3</sup> Ma Paul Ananias i riwei, “God ina raunavanavaim, tam morumorum! Moses ana tarawatuei e rarauetareu wate maranai am rava u riwei da i raunavanavaiu tam tarawatu u viaigai.”

<sup>4</sup> Tau Paul au ġereġerena i maimairi Paul i riwei, “Aiwai aubaina God ana Pirisi Ġetelarana e vivijiboġi?”

<sup>5</sup> Paul i paribelei, “Varevareiu eġa ata aramane i da tauna God ana Pirisi ġeġetelarana. Au buka i terei da *Eġa God ana taunola ma parivai-apoapoeni.*” (Exodus 22:27)

<sup>6</sup> ✧ Anina ma Paul i 'nanai da Sadusi ma Pharisi ġelau kampa ma ponana i rata ma i riwa, “Varevareiu tau Pharisi, amau maiteni Pharisi. A vivitumaġana da God rava iraġelei ina vovaimairini wei lamna aubaina taumi o etaetareu!”

<sup>7</sup> Maranai wei i latoni Pharisi ma Sadusi viparipariniġai i raukarei ma boru i kai da ruaġa.

<sup>8</sup> ✧ Aubaina Sadusi e ririwa da rava e irairaġe lamna eġa ita vovomairi me, ma anela da aruarua eġa ita vivitumaġanei, wate Pharisi wei anatapui e vivitumaġanei.

<sup>9</sup> Ġaiawa ġaeġaena i tupua ma tarawatu babadai ġelau tau Pharisi, i vomairi ma i babani guratana i pa, “Tauai eġa aiwai apoapoeni ata inana i wei ravana awarina! Mepa da anela bo Bada Aruana tauna awarina i babani?”

<sup>10</sup> Viġaiġaiawa ġaeġaena i tupua ma sorodia ai bada i rovo mepa da rava Paul ina viaisikasikai ma sorodia i egari da i rui ma Paul i taravaina-opunei ma ina naieiau bareki.

<sup>11</sup> Ma waguvarai ġelauna, BADA Paul au ririvana i mairi ma i riwei, “Tepam ina tora! Me aubai u jima au Jerusalem nanare aubai u Rome ma jima.”

*Mai Jew i vioga da Paul ina viraġeni*

<sup>12</sup> Ubaubanai mai Jew ġelau i vitagodie ma i viogata ma i parivainuaġana da eġa ina am bo ina uma da Paul ina viraġeni.

<sup>13</sup> Nelara 40 nanare i vianina da Paul ina viraġeni.

<sup>14</sup> Tau i nae pirisi babadai ma dogadogara awarii ma i riwei, “Tauai parivainuaġana bagibagina a kauei da eġa ana am da Paul ana viraġeni.”

15 Taumi Boru gēgetelarana maiteni ona moru ma riwa ona pari-tawanei sorodia badana awarina da Paul ina neiai ma ona vitara-virevirei da riwa kaua ona vaia. Tauai ana vipaipai da ana viraḡeni muriai da weka ina ḡetai.

16 Wate maranai Paul avuna wei ogatarana i nonori ma i nae sorodia ai au bareki ma Paul i pariverei.

17 Ma Paul sorodia badana i ḡoreiai ma i riwei, “Wei laragana laḡilaḡina ma naiei ami bada awarina da ana riwa ina riwei.”

18 Ma i naiei ai bada ḡaeḡaena awarina ma i riwei, “Panipani wavana Paul riwa i paritawanei awariu ma i riweu da wei laragana ata neiai awarim aubaina am riwa awarina.”

19 Sorodia ai bada ḡaeḡaena laraga i vinimavoai ma i maeria ma i paridadanei, “Am riwa aiwai ma riweu?”

20 I riwa, “Mai Jew i riwa da ita vibaḡaim da au maratomi Paul uta naiei ai au Boru gēgetelarana, Wei anatapana moru.

21 Wate eḡa ma rautaniḡanei aubaina rava 40 nanare pota e paipaini da ina viraḡeni. Tauai i vioga da eḡa ina am da Paul ina viraḡeni. Tauai i vokaukaua ma am vianina ava e paipaini.”

22 Ma bada laraga i riwei da eḡa aiai ina riwei ma i paritawanei.

*Tauai Paul i paritawanei Gavena Felix awarina.*

23 Anina ma sorodia ai bada ḡaeḡaena babada ruaḡa i ḡoreiai ma i riwei, i pa, “Sorodia sod ravai 200, aiera ravai 200 ma hos ravai 70 ma vaia ma ona vokaukaua da waguvarai 9 oklok ona vomairi.

24 Hos biaḡa ona vaia Paul aubaina da aiaina ona naiei gavena Felix awarina au Caesarea.”

25 Ma sorodia ai bada pepa wenanare i girumi:

26 Tau Claudius Lisias, a girugiruma awarim au bada vinu-  
alaulaunam, Gavena Felix.

Egualau.

27 Mai Jew wei orotona i vojijini ma ita viraḡeni, wate maranai a nonori da tauna Rome-ei ma lamna aubaina au sorodia maiteni a opu da au urai a vaitawanei.

28 A ḡoei da ata aramanei ana apoapoe aiwai, da ata naiei ai Boru gēgetelerana awarina.

29 Ma a nelaḡai da viwavuna lamna tauivava ai tumaḡana kauai ma Rome ana tarawatuei lamna tauna eḡa aiwai apoapoena ita kauai da ata viraḡeni bo ata pani.

30 Maranai riwana a vaia da mai Jew i ḡoei da govago-  
vaḡanei tauna ita vunui. Lamna maratagogi a paritawanei awarim, ma nanare tauviwavu a riwana-guratei da kampa ina ḡetai da ai viwavu ina kauai.

31 Ma sorodia ai babada i ririweia nanare i kauai ma wagu-  
varai Paul i taravaini ma i naiei da au taon Antipatris i ḡeta.

<sup>32</sup> Au maratamna aiera ma sod sorodiai i naeme au Jerusalem ma hosi sorodia Paul i naei au Caesarea.

<sup>33</sup> Maranai hosi sorodiai au Caesarea i ġeta pepana ma Paul gavena i veredamanei au urana.

<sup>34</sup> Gavena pepa i 'avi ma Paul i paridadanei metauna provins-na u tupua ma i riwa, "Silisia."

<sup>35</sup> Gavena i riwa i pa, "Am etara ana nonori maranai am tau-viwavu ina ġetai." Ma sorodia i naiei Herod numa i voavoiana da ita inana-vaitetei.

## 24

*Paul Gavena Felix au naona i mairi*

<sup>1</sup> Aupom 5 au murina Pirisi ġeġetelarana Ananias ma dogadogara i ġaira au Caesarea ai taurauetara wavana Tertelus maiteni.

<sup>2</sup> Ma Paul i ġoreiai gabemani au naona. Ma Tertelus i vomairi ma viwavuna i vikarei:

Au bada Felix \*vinualaulaunam, Am vibadanei ta mae ubauba ma ata nota eġa aiwai. Ma kaua vouii ma aiiai u kaukauei ata dobu voana aubaina i voagu-kaueta.

<sup>3</sup> Anatapuii mepamepa a mamae a vinuaii kaua tam awarim.

<sup>4</sup> Wate eġa ata ġoei da ana visina-viraviraim. Ma lamna aubaina a ġoeġoei da uta rautaniġaneu mara aburuna ava.

<sup>5</sup> Tauai a nelaġai da wei ravana lamna orana potapotana ma viġaiġaiawa tauvikareina mai Jew awarii dobu au anatapuna. Tauna boru vouna e ġoreġorei mai Nasaret† ai bada.

<sup>6</sup> Taii i ġoei da Tempol maiteni ita tuvaideoeoi ma lamna aubaina a pani.

<sup>7</sup> ‡

<sup>8</sup> Ma rautarei ma ma nelaġai da ai viwavu lamna anatapui riwa kaua.

<sup>9</sup> Ma mai Jew Tertelus au murina i mairi ma i riwa, "Wei babani anatapui riwa kaua!"

<sup>10</sup> Anina ma Gavena Felix Paul i raumotemotei da ita babani. Paul babani i vikarei i pa:

\* **24:2:** Felix ana au vibadana lamna eġa ita ai. Tertelus lamna Felix i gwalagwalamerui da Paul ita viwavui ma ita pani. Felix rava vita gaeġaei i verei da madeġa ruaġa i kwa Sisaei Nero wei ravana i viopuni. Ġavia gaeġaena i tupua ma Jew Rome i viġaviei ma taui Jerusalem i rikai da eġa aiwaina ita mae. † **24:5:** Wava Nazarene lamna Iesu ana tauvotaġotaġoi e babaniei aubaina tauna Nasaretei. Maranai Tertelus tau i ġorei Nazarene Lamna Kerisiana e vivijiboġi. Jew Jerusalem ei ma Judea Provins anatapuna mai Galili provins ravai e inainana ġairei, (John 1:46 ma iavi). Tauna wate e ririwa da menanare Paul e tapataparoro nei lamna mai Rome ai tarawatu e viviaigai. ‡ **24:7:** Verse 7 lamna buka waduwaduboi biagava au orana e mamae, wate buka Greek ponanei i girugirumi maġamaġai wei ves-na au orana eġa.

Au bada vinualaulaunam, a aramanei da tam madeḡa biaḡa wei dobuna ai taurauetara lamna aubaina tau ana nuaubau ana babani aubaiu.

11 Am rava ina riwem da tau pom ota aupom 12 nanare a ḡeta memei au Jerusalem da BADA ata voepaepai.

12 Au tauviwavu eḡa ita nelaḡaiu ata viḡaiḡaiawa au Tempol bo au boru-numana bo mepa nanare au Jerusalem.

13 Ma ai viwavu tau awariu menanare tana aramanei da lamna riwa kaua?

14 Wate riwa kaua da tau amamata ai God a voepaepai ma BADA Iesu ana etanai, a vogaḡotaḡoi ma tau i ririwa da wei lamna taparoro morumoruna. Wate nanare Moses tarawatu i girugirumi ma God ana peroveta nununai i girugirumia anata-puna a vititumaḡanei.

15 Tau God awarina a vititumaḡana guratana me ravai nanare, da tauna muriai rava anatapui iraḡelei ina vilawana-melei, ravai aiiai ma rava apoapoei.

16 Lamna aubaina a kaukauana guratei da orau ina ai rava ma BADA awarii.

17 ✨Jerusalem a netawanei madeḡa biaḡa i kwa ma pom ota a nememei da molamolakai ata puloi ma pulo ata kau ei God awarina. §

18 Tau ai aiu, maranaina i nelaḡaiu au Tempol viaina pulona a kaukauei. Eḡa patara maiteni ma eḡa visinaviravira.

19 Wate mai Jew ḡelau Eisia provinsei i nei kampa. Tau i mepa marina! Ita nei au naom da ai viwavu ita terei.

20 Bo babada weka ita riweta au apoapoe aiwai maranai boru ḡeḡetelarana au naona a mairi.

21 ✨Wate mepa da maratagogi awarii a garara a pa, “A vititumaḡana da God rava anatapui iraḡelei ina vovaimairini! Lamna aubaina tau weka a maimairi.”

22 Felix tauna BADA Iesu ana Etanai riwana i aramana-kau ei, boru i gudui ma i riwa, “Maranai sorodia ai bada Claudius Lisias ina nei, ma ina paribelem.”

23 Ma sorodia ai bada i egari da Paul ita inana-vaitetei ma ita voterei da ita bababara ma ana rava ita nei da ita raraugenari.

*Paul Felix i viararamani*

24 Aupom biaḡa au murina Felix awana Drusila maiteni i nei. Drusila lamna wavine Jew ei. Ma riwa i paritawanei da

---

✨ 24:17: Act 21:17-28 § 24:17: Madeḡa 5 i kwa ma Paul i nememei au Jerusalem da ita mae mara aburuna da tauvititumaḡana ita vovaiwirewapani ma ana babara ma nolana aiaina ita virarautuei. (Act 18.22) ✨ 24:21: Act 23:6

Paul i nei ai, ma rava ai tumaḡana Iesu Keriso awarina i babanie i ma Felix i rautaniḡana. \*

<sup>25</sup> Wate maranai Paul babani i vikarei da God ana ḡoana, da rava lawana aiaina ma jijimanina ina maeni, ma erawa kauai ma ḡo'apoapoe ina geduaiei, aubaina mara e nenei maranai rava anatapui ina etarei. Felix wei babanina i nonori tauna i rovo ma Paul i riwei, “Ma nae! Ma maranai ana ḡoem lamna ana kwatuem.”

<sup>26</sup> Ma Felix i ḡoeḡoei da Paul tauna manelei ita gwalai ma lamna aubaina mara i maḡa i raukwatuei ma awarina i babani.

<sup>27</sup> Madeḡa ruaḡa au murina Felix i rautom ma ana gabu Posias Festus i vaia. Felix i ḡoei da wavana ita ai mai Jew awarii lamna aubaina Paul au numa panipani i votere-tawanei.

## 25

*Paul i vibaḡa da Sisa au naona ita mairi*

<sup>1</sup> Festus i ḡeta au Caesarea da ana nola ita vikarei ma aupom vitonuina i ḡae au Jerusalem.

<sup>2</sup> Weka pirisi ḡeḡetelarana ma dogadogara Festus i nebelei ma ai viwavu Paul awarina tauna i verei.

<sup>3</sup> Ma Festus i vibaḡai da ita voagui da Paul ita paritawanei au Jerusalem. Tau i ava i vioga da Paul au etanai ita viraḡeni.

<sup>4</sup> Wate Festus i paribelei i pa, “Paul au deri au Caesarea ma tau a ḡaiḡaira me kampa aupom ruaḡa au murina.

<sup>5</sup> Mepa da Paul aiwai i kauana-boai lamna ami Babada maiteni ana ḡaira da kampa ami viwavu ina terei.”

<sup>6</sup> Aupom 8 da 10 nanare au murina Festus i ḡaira me au Caesarea ma maratamna au numaetara i kiala ma ana sorodia i eḡara da Paul ita ruieiai au naona.

<sup>7</sup> Maranai Paul i ruieiai, ma Jew babadai Jerusalem ei i ḡairai i nei awari ma ina viwavui, kua maḡamaḡau apoapoei aubaii. Wate tau i viwavu anatapui anona eḡa.

<sup>8</sup> Paul wei \*viwavui i vinua-naini ma i pa, “Tau eḡa aiwai apoapoena ata kauei mai Jew ai tarawatu awarina bo ai Tempol awarina bo Caesar awarina.”

<sup>9</sup> Wate Festus i ḡoei da mai Jew ita vinuaiaini lamna aubaina Paul i paridadanei i pa, “E ḡoeḡoei bo eḡa da tana ḡae au Jerusalem ma etara?”

\* **24:24:** Mepa da Drusila Jew wavinena awarinei Felix wei ravai e ḡoreḡorei tauvituḡana i aramanei. Drusila lamna Herod Agrippa natuna guguinina umauna ana madeḡa 20. Tauna wavalatona Siriei i ravaḡi wate i voterei maranai ana madeḡa 16 da Felix i ravaḡi. Wei lamna ana tavine viruiaina ma Felix ana tavine vitonuina.

\* **25:8:** *Paul au Tarsus i tupua wate tauna wavana Rome gabemanina awarina. Lamna aubaina tauna ana rewapana e mamea da ana nuabola ina naiei au Rome da Caesar ina rautarei.*

10 Paul i riwa, “Tau marina Caesar ana au etara gabuna a maimairi, weka ina etareu. Tam u aramana-kauei da tau eġa aiwai apoapoena ata kauei mai Jew awarii.

11 Wate mepa da aiwai apoapoena a kauei lamna ma viraġeniu. Tau eġa iraġe ata rovoei. Wate mepa da wei lamna viwavu moru lamna eġa ai ai ana rewapana ita mamae da ina veredamaneu. Tau a vivibaġa Caesar awarina!”

12 Festus Caesar ana dogadogara ai nota i vaia ma i paribelana i pa, “Tam u vibaġa Caesar awarina, Anina Caesar awarina ma nae.”

*Festus Paul ana babani gulau Agrippa i pariveri*

13 Aupom biaġa au murina gulau Agrippa† novuna Benisi maiteni i nei au Caesarea da gavena vouna Festus i raugenari da ita viegualaei.

14 Ma i mae aupom vomaġauna ma Festus Paul i raruetaara gulau i pariveri i pa, “Felix panipani tagogi weka i voterei.

15 Ma maranai a nae au Jerusalem mai Jew ai pirisi babadai ma dogadogara ai viwavu i neiai awariu ma i vibaġaiu da Paul ata viraġeni.

16 —Ma a riwei da tauai mai Rome ai tarawatu e ririwa da eġa rava ana kovoġa labalababai da au naona ana rauetarei. Tui ina ġetai da ai viwavu taurauetara au naona ina mairi da ina gagaloana-melei.

17 Maranai tauviwavu maiteni weka a ġetai. Tau eġa ata vipaipai ma maratonna a eġara da ravana i neiai da ita etara.

18 Tauviwavu i vomairi ma a notai da aiwai apoapoena aubaina ita viwavui wate eġa.

19 Anina kaua biaġa ava ai taparoro kauai, ma rava tagogi irairiġena wavana Iesu i vitarapiriei. Wate Paul e ririwa da Iesu lawalawaina.

20 Tau nuanuau i raġaraġa menanare riwa kaua ana vainei ma Paul a paridadanei da i vianina da maiteni ata ġae au Jerusalem da kampa ata etarei.

21 Wate Paul i vibaġa da Caesar ana viwavu ina rautaniġanei. Ma sorodia a eġari da au numa panipani ina paini da ana paritawanei Caesar awarina.”

22 Ma Agrippa Festus i riwei, “A ġoei da ravana ana babani ana rautaniġanei.”

Ma Festus i paribelei, “Anina, au maratoma ma rautaniġanei.”

*Gulau Agrippa Paul i rautaniġanei*

† 25:13: Wei lamna Herod Agrippa 11, Herod Agrippa 1 natuna.



23 Au maratamna gulau Agrippa ma Benisi gulau garai i oteni ma ana gabemani babadai gaegae maiteni, i arana-ruiei au boru numana. Festus ana sorodia i egari da Paul i ruieiai.

24 Festus i riwa, “Gulau Agrippa ma anapapumi o rieiai weka, wei ravana o inainanai! Tauna mai Jew au Jerusalem ma weka au Caesarea e goegoei da ina ira<sup>ge</sup>.

25 Wate tau a nela<sup>gai</sup> da tauna e<sup>ga</sup> aiwai ita kauana-boai da ina ira<sup>ge</sup>. Wate i viba<sup>ga</sup> da Caesar tauna ina rauetarei. Lamna aubaina a pariparitawanei Caesar awarina.

26 Wate Caesar aiwai ana riwei, e<sup>ga</sup> ata aramanei aiwai ana girumi? Lamna aubaina a neiai awarimi ma tam gulau Agrippa maiteni da tana babaniei da nota ona vereu da aiwai ana girumi.

27 Aubaina e<sup>ga</sup> ita ai da panipani ana paritawanei Caesar awarina ma ana viwavuna e<sup>ga</sup>!”

## 26

### *Paul ana gudu i tarai*

1 Ma Agrippa Paul i riwei, “A vianinem da ma babani.” Ma Paul urana i voepai ma ana gudu tarana i vikarei

2 i pa:

I ai kaua gulau Agrippa da amadodo tam au etara e rarautani<sup>gane</sup>i da Jew babadai ai viwavu awariu ana tere-vaijijimani.

3 Tau aramanei da tam mai Jew ai giu ma ai paripari<sup>gai</sup> u aramanana-kauei. Lamna aubaina a viviba<sup>gaim</sup> da au paribelana ma rautani<sup>ganana</sup>-kauei.

4 Mai Jew anapapui au lawana i aramanei, aburu da marina, au dobu oina da au Jerusalem.

5 <sup>☆</sup>Tau roroya aya i aramaneu ma ina riwem da tau ai boru bagibagina ma piripirina, Pharisi au orana a rui ma tarawatu anapapuna a vojijina-kauei.

6 Ma marina a vivituma<sup>gana</sup> da God aiwai noinoita i parivainua<sup>gani</sup> ina kauei. Ma lamna aubaina tau weka a maimairi.

7 Wei parivai-nua<sup>ganana</sup> ata dam 12 e vipaipaiei da ina nei lamna aubaina ata rava i vipatutu ma marai ma waguvarai God e viviborumei. Au gulau wei vituma<sup>ganana</sup> aubaina mai Jew e vivivavuii.

8 Aiwai aubaina o notanotai da God e<sup>ga</sup> tagotagogina da rava ira<sup>ge</sup>lei ina vovaimairini?

9 <sup>☆</sup>Tau au naona a notai da aiwai anapapuna ata kauei da Iesu Nasaretei ata vi<sup>gavie</sup>i.

10 Ma anina lamna a kauēi au Jerusalem. Pirisi gēgetelerana babadai pepa i verei ma lamna i vovai-virewapaniu ma kerisiana vivivirei ma gāma gāu au numa panipani a terei, ma nanare ai iraḡe a vianinei.

11 Mara ma gāma gāu boru numai a naeni da kerisiana a vununaiei da ai tumaḡana ita boviei. Amlou i ḡaiḡai kua da dobu ḡelau i naeni kerisiana a baibaiei.

12 Mara tagogi pirisi babadai au Jerusalem pepa i vereu da rewapana i vereu ma a nae au Damaskas.

13 Ma aubenai nanare, tau au etanai a nēnae ma a inanai, lalalaina marei i ḡairai ma i lalalai, gamrina madeḡa i ḡetawanei! Au rava maiteni a bababara i lalalai.

14 Anatapui ai a vipeuana au doa ma pona Hebrewei awariu i bababani. I riwa, “Saul, Saul aiwai aubaina e viviḡavieu? Tam e ḡoeḡoei da Tau ma viapoapoeniu wate eḡa da tam e viviapoapoena-melem!”

15 Ma a paridadana, “Bada tam aiai?”

Ma BADA i paribelei, “Tau Iesu, ravana tauna e viviḡaviei.

16 Wate ma vomairi. Tau a nei awarim da vaivai ata verem da ma vitaunola Tau aubaiu, ma amadodo aiwai u inanai ma aiwai ana viatataiem, ma vimatamatei rava awarii.

17 Tau ana gagaloem am rava mai Israel awarii ma nanare Jentail ravai awari, ma ana paritawanem Jentail awarii,

18 da matai ma vikalai, da ai lawana apoapoe ina voterei ma ina nei au lalalaina, ma Satan ana rewapana ina votere-tawanei ma ina nei God awarina. Tauna ai ḡo’apoapoe ina notatawanei, ma ina taravaini natunatuna rarautanii, ai tumaḡana awariu aubaina.”

19 Lamna aubaina Gulau Agrippa, tau riwa marei au inana a inanai a voteletelei.

20 ✨Au naona a jima mai Jew awarii au Damaskas ma nanare au Jerusalem ma Judea anatapuna ma muriai Jentail maiteni awarii. A jima da ai ḡo’apoapoe ina votere-tawanei ma ina mae-tavirei God awarina, ma ai lawana ina vimataira da ai kua apoapoe i voterei-tawanei.

21 Wei babanii aubaina mai Jew au Tempol i vojijiniu ma i ḡoei da ita viragēniu.

22 Wate God i vilawaniu da marina, ma weka a maimairi da a vimatamata rava muomuoi ma nanare rava ḡaeḡaei awarii. Aiwai a bababaniei lamna peroveta nununai ma Moses i ririweta ina tupua.

23 ✨Tau i riwa da tauvilawana Keriso ina vinuapoapoe. Ma tauna ina iraḡe ma ina vinoa da ina vomairi me ma wei

matairana ina vinolanola da tauna God lalalaina mai Jew ma Jentail aubaii.

<sup>24</sup> Weka Festus i vionaḡi ma i garara Paul awarina, “Tam u bua! Am aramana i vibuaim!”

<sup>25</sup> Wate Paul i paribelei, “Au bada Festus tau eḡa ata bua. Tau aiwai a bababaniei lamna riwa kaua ma babani anona.

<sup>26</sup> Wei kaua eḡa govagovaḡana ma aramanei da Gulau Agrippa anatapuna i aramanei, ma lamna aubaina ana tegratorau wei kauai ana babaniei awarina.”

<sup>27</sup> Paul Gulau Agrippa i riwei i pa, “Peroveta e vivitumaḡanei bo eḡa? A aramanei da nanare!”

<sup>28</sup> Ma Agrippa i paribelei, “U notai da tau laḡilaḡina ma sinaviraiu da ana vikerisiana!”

<sup>29</sup> Paul i paribelei, “Laḡilaḡina bo amapo, a raraupari God awarina da tam ma rava anatapui wei au boruna ina tupua-vira me tau nanare wate eḡa sein maiteni.”

<sup>30</sup> Anina ma gulau ma gavena ma Benisi i vomairi ma i nae.

<sup>31</sup> Ma anatapui i nenaē ma i babani vivira ma i vianina i pa, “Wei ravana eḡa aiwai apoapoena ita kauē da tana viraḡeni bo tana pani.”

<sup>32</sup> Ma Agrippa Festus i riwei, “Mepa da eḡa ita vibaḡa ḡae Caesar awarina, lamna marina tata rupeni.”

## 27

### *Paul wagei i vaḡai nae au Rome*

<sup>1</sup> Festus mara i tereterei i ḡetai da tauai ata nae au Rome. Paul ma tau ma panipani ḡelau maiteni au waga a geru ma a vaḡai Rome aubaina. Rome ai sorodia badana wavana Julius au urana i terelai. Tauna Caesar ana sorodia vinevinena.

<sup>2</sup> Waga Adaramitei i nei da a geru ma wagana i ḡota-nae au Eisia provins gerana. Oroto wavana Aristakas ana dobu Thesalonika au Masedonia provins tauna maiteni i geru.

<sup>3</sup> Au maratamna au Sidon taon a ḡota, Julius ivina i ai Paul awarina ma i voterei da i opu au gera da ana rava ita raugenari ma ana ḡoana aiwai ita vibaḡei.

<sup>4</sup> Muriai wagei a opu da a nenaē ma ive i verau-matamataniai ma lamna aubaina bonabona au Saipras ma dobu ḡaeḡaena au pouna au mulaḡina ambori.

<sup>5</sup> Ma boga ḡaeḡaena a bori da Silisia provins da Pamphilia provins geraii a voterei da au Maira taon a rui au Lisia provins

<sup>6</sup> Au Maira taon kampa sorodia badana mai Egypt ai waga Alexandriei i nenaē au Italy kampa i vigeruaii.

<sup>7</sup> Ma aupom maḡamaḡai nuatauai a ruba ma a voia guratana da Cinidus taon a tuḡereḡerei wate ive i verau-matamataniai da kampa waga a virai da Crete bonabonana ma mutu Samone au poui au mulaḡina a nae.

<sup>8</sup> Ma kampa nuatauai bonabona Crete gerana a naeni aubaina mara i apoapoe ma a ḡeta dobu e ḡoreḡorei U Aiaina, Lasea taon au ḡereḡerena.

<sup>9</sup> Mara ḡaeḡaena a vine-boai au vaḡai\* ma Rupena Ujina marana boiboḡi i kwa,† marina lamna ive ma rabama ai mara ma boga babarana i vinirovorovo.

<sup>10</sup> Ma Paul i riwa, “Nelara, malana a vaivaia da ata vaḡai ina apoapoe kaua ma waga ma purapura tana vine-boa-pai. Ata lawana maiteni tana vineboai.”

<sup>11</sup> Wate sorodia ai bada, kapena ana babani i rautaniḡanei ma eḡa Paul da kampa ata mae ma eḡa ata nae.

<sup>12</sup> Wei gabuna eḡa ita ai wei ivena au marana ma rava maḡamaḡai i goei da waganei ata nae da Phinix una, Crete au bonabonana da kampa ata mae da bodu ita kwa. Wei u ḡaeḡaena ma mutuii lavarata ma rauanaḡa e vinoa-vereverei, da au mulaḡina e mamae.

### *Kojikojira Ḡaeḡaena*

<sup>13</sup> Maranai rauanaḡa i vikarei ma waga ravai i notai da marina mara aiaina da ita nae au Phinix una. Ma anika i taini ma Crete bonabona geraei i nae.

<sup>14</sup> Ma eḡa barana ita uama ma kojikojira‡ olei iveiai.

<sup>15</sup> Ive wagana i verau-matamatani ma waga eḡa tagotagogina da ita vobelei ma i voterei da ive waga i avara-opunei.

<sup>16</sup> Bonabona aburuna Kauda gerana au mulaḡina a ruba ma kampa a voia guratana da dingy a terepai au waga da a ragita-jijini.

<sup>17</sup> Wei i kauana vorovei ma ḡuravei waga au gabaurina da waga adana i raḡita-kwaviviroi. Tau i rovo mepa da au maratete ina amḡaena au Syrtis,§ Libya au gerana. Lamna aubaina ḡuravei ai da kuka, i raḡita-tagogiei ma au boga i viorereni da waga ita bibi. Ma i voterei da kojikojira waga i avara-naiei.

<sup>18</sup> Maratomna kojikojirana i rarau-guratanelei da purapura ḡelau i boga a viorereni.

<sup>19</sup> Aupom vitonuina tau i waga purapurai i viorereni au boga.

<sup>20</sup> Kojikojira i ruba da aupom biaḡa da madeḡa ma ubona i purui. Ravai ai nota i kwa.

\* **27:9:** Iri i parei da kojikojira ana mara ma i vaḡai. † **27:9:** Eng. *Atonement* bo *Yom Kippur* marana wei lamna September bo October rabama ma ive ai mara

‡ **27:14:** Kariwabu ḡaeḡaena § **27:17:** Wei lamna maratete.

21 Wei au marana rava au waga am i kauana-avei, anina ma Paul i vomairi ma tau i riwei, “Nelara ota rautaniġaneu ma Crete eġa tata oputawanei, amapo waga eġa tata viapoapoeni ma ata purapura eġa tata vineboai.

22 Wate a ririwana-guratemi da eġa orami ina peu! Aubaina avena da waga ina monu wate eġa ina iraġe.

23 God lamna tau au BADA ma ana taunola tau. Waguvarai God ana anela i paritawaneiai awariu.

24 Ma i riwa, ‘Eġa ma rovo! Tam anina da Caesar au naona ma etara! Ma ġelauna lamna God ana nuavaina maemaena rava anatapui maiteni e vaġavaġai ina lawana.’

25 Lamna aubaina tepami ina tora! Aubaina tau God a vivitumaġanei ma menanare i ririweia nanarena ina tupua.

26 Wate tauta au maratete tana amġaena.”

27 Kojikojira i avara-naielai au Mediterranean Bogana da aupom 14 i kwa ma nubautuva waga ravai malana i vaia da tau gera i tuġereġerei.

28 Ma barawa au giana ġaima i raġini ma au boga i tawanana-ġairei da topa ana gabinou ita aramanei. Ma i aramanei da 40 meter ma i mae aburuna ma i raudadana-melei lamna marina 30 meter.

29 Ma tau i rovo mepa da rabama waga au kira ina viairikarikai lamna aubaina waga au ipuna anika 4 i tawana ġairei ma i vipaipai da mara ina tom tawanana.

30 Ma waga ravai ai kua i kaukauei da ita ruba-govaġa. Ma i vioga da dingiei ita opu waga au naona da anika ita dubaranaiei, ma lamna aubaina dingy i teretere-ġairei au boga,

31 Wate Paul sorodia ai bada maiteni i riwei, “Mepa da waga ravai ina rubatawanemi lamna anatapumi ona iraġe.”

32 Ma sorodia dingy ġuravana i borituini ma dingy kwakwavina i peu au boga ma i avara-naiei.

33 Ma maratomtomi Paul rava anatapui i egari da ita am, i pa, “Taumi marina aupom 14 rovo i kauemi ma eġa ota am.”

34 “Tau a vivibaġa-guratemi da ona am da ona virewapana, eġa aiai tagogi ina iraġe.”

35 Paul i babani vorovei ma au matai palawa i vaia, BADA i viegualauei ma i vogimai ma i ani.

36 Ma rava anatapui inanai ma orai i bagibagi ma am i vikarei.

37 Tauai anatapuiai 276 au waga.

38 Ma rava anatapui i am da i am-iaua. Ma witi baikei au boga i viorereni da waga ita votelatelai da au gera ita ġota da avena ita amġaina.

*Waga au maratete i amġaena*

<sup>39</sup> Maranai mara i tom tawanana tau i dobu i 'nanai wate gerana eġa ita aramanei, wate U inanai da gerana aiaina ma i notai da gerana aiaina da waga kampa ita viġaeni.

<sup>40</sup> Anina ma anika ġuravai i viaituituini, ma labilabi i tere-ġairei, ma waga au naona kuka voaburunei i votawatawanei ma gera aubaina i ruba.

<sup>41</sup> Wate waga au maratete i amġaena da i tapaiei, ma rabama waga ipuna i viairikarikai.

<sup>42</sup> Sorodia i ġoei da panipani ita viraġeni, da avena ita toa-ġaira au gera ma ita viruberubei.

<sup>43</sup> Wate sorodia ai bada i ġoei da Paul ita vilawani ma i viġaei, anina ma ai viogatara eġa ita kauai. Ma tau i aiavoi toa i aramanei i egari da i viauepa au boga ma i toa-ġaira au gera.

<sup>44</sup> Ma ġelau i aiwai da i tenatenam i vidauei. Ma nanare anata-pui lawalawaii au gera i ġota.

## 28

### *Paul au Malta bonabonana*

<sup>1</sup> Maranai a ġota au gera ma a aramanei da tauai au Malta bonabonana.

<sup>2</sup> Dobuna ravai i nebelelai ma ivii i ai kua awariai. Garewa atuna i vikarei ma i ubauba, ma tau i au gera ai i viviri.

<sup>3</sup> Ma Paul ai ragorago i ġuna da ai au tepana i tereterei ma mota ġaiġaiawana ai bolana malana i vaia da i opui ma Paul nimana i ani.

<sup>4</sup> Dobuna ravai i 'nanai da motana Paul au nimana i dawedawe ma i pari-ararava, "Wei ravana lamna tauviraġena ma eġa ita monu wate ata god\* e ririwa da tauna eġa ina lawana."

<sup>5</sup> Wate Paul motana i viaikwajiei da ai au menamenana i rauai ma tauna eġa ita kero.

<sup>6</sup> Rava i vipaipai da Paul nimana ita dodo bo ita peu da ita iraġe. Wate maranai i vipaipai guratana ma i 'nanai da tauna anina, tau ai nota i virai ma i riwa da tauna god ġelauna.

<sup>7</sup> Au gerana a ġotaġota - lana au ġereġerena lamna dobuna badana Publius ana wapu ġaeġaena. Tauna i taravainiai ma i paina-kaulalai da aupom tonuġa

<sup>8</sup> Publius amana i doria manawa ruba ma iniġuġura i vaia da i matamatave, Paul i rui inanana aubaina ma urana au tepana i terei ma i raupariei ma i vilawani.

<sup>9</sup> Anina ma rava anata-pui doridoriai au bonabona i nei ma i vilawani.

### *Paul au bonabona Malta da i nae au Rome*

<sup>10-11</sup> Kampa mai Malta maiteni a mae nawaravi tonuġa. Ma ravai i voagu-kaulalai ma maranai ata vomairi, ai ġoana vaġai

---

\* **28:4:** God wavinena wavana kua aiaina bo kua jijimanina (Justice).

aubaina anapuna i verelai. Ma waga ġelauna a gerui lamna mai Alexandria ai waga bodu aubaina kampa i mae. Waga au naona lamna ai god ruaġa kokoitau i tai†.

12 Kampa ma a amkuka-nae da au Sairakius a ġota ma a mae aupom tonuġa

13 Kampa da ambori damana au Regium ma maratamna rauanaġa i wanabauni ma amkuka ma geraei a ruba da maratam ġela au Puteoli a ġota.

14 Kerisiana kampa a nelaġai ma i riwelai da maiteni a mae wiki tagogi. Anina ma a babara-nae da au Rome taon a ġeta.

15 Kerisiana au Rome riwai i vaia da a neni ma i ġei da ita nebelelai, ġelau i ġei au taon e ġoreġorei Vaġavaġai Tonuġa ai Numa ma ġelau i ġae Apius ana au maket. Maranai Paul wei ravai i 'nanai, ma i vinuaii kaua ma God i vieġualaei.

16 Maranai au Rome taon a ġeta tau Paul numa i verei da ainelana i mae ma sorodia i terei da i 'nana-vaitetei.

*Paul au Rome i raugugula*

17 Ma aupom tonuġa au murina Jew babadai kampa mae-mae i rauġoreiai ma awarii i babani, "Varevareiu tau eġa aiwai ata kauana-boai ata rava awarii bo amamata ai tarawatu ata viaigai. Wate au Jerusalem i panu ma i veredamaneu Rome gavena awarina.

18 Mai Rome i etareiu ma i ġoei da ita rupeniu aubaina eġa aiwai apoapoena ata kauai da ina viraġeniu.

19 ✨Wate Jew babadai wei eġa ita ġoei ma lamna aubaina Rome babadai a riwei da tau eġa ana mae wate ana ġae au ġaeġaena Caesar awarina da ita rauetareiu. Wate lamna eġa au rava ata viviġaviei, eġa.

20 Lamna aubaina a ġoremi weka da tata babani gogona, ma ata riwemi da tau a vipanipani aubaina a vitumaġana da mai Israel ai tauvilawana wariaġa i ririwei boiboġi i nei."

21 Tau i paribelei, "Tauai eġa pepa Judeaei ata vaia bo ai rava riwa ita neiai.

22 Tauai aramanei da ravai anapui kerisiana boruna e paripari-virevirei. Wate tauai a ġoei da am nota ana vaia."

23 Ma taui mara i terei da Paul maiteni ita viboru, ma patara i ġetai mepa Paul i maelana. Ma ubaubanai Paul God ana vigulau jimana i vikarei da waguvarai i vorovei. Moses ana tarawatu ma peroveta nununai ai au buka i mairi ma i jima. I ġoei da orai ita taini da Iesu ita vitumaġanei.

24 Ana babaniei ġelau orai i taini ma ġelau eġa ita vitumaġana.

† 28:10-11: Wei lamna mai Rome ai god raġaraġa wavai Castor ma Pollux ruaġai e ġoreġore Dioscuri bo **raġaraġa marei**, Tau lamna god Zeus ma Leda natunatui.

✨ 28:19: Act 25:11

25 Ma tau i ava babanina i viparipariniḡaiei ma muriai da ita vilamonei Paul wei riwana tagogi i latoni i pa, “Arua Vivireina riwa kaua Peroveta Isaiah ponanei amamami i riwei i pa:

26 *Ma nae am rava mai Israel awari da ma riwei, ona nononora wate eḡa ona araramanei  
ona inana i wate eḡa anona ona aramanei.*

27 *Aubaina wei ravai orai i bado.*

*Taniḡai i gudui,*

*Tau i matai i vopotai.*

*Mepa da tau i mataiei ita inainana,*

*taniḡaiei ita nononora*

*oraiei ita araramanei,*

*ma ita mae-tavirei awariu ma ata vilawani. (Isaiah 6:9-10)*

28-29 —Lamna aubaina ona aramanei da God Riwana Aiaina vai-melana aubaina i paritawanei Jentail awarii. Tau i ina rautaniḡana.”

30 Paul kampa numa i vivimaiei ma i mae madeḡa ruaḡa taputapuna. Ma rava maḡamaḡau i nenei da i raraugenari ma wei i vinuaiaiei.

31 Ana tepatorana God ana vigulau ma Iesu Keriso riwana Aiaina i jimei. Ma eḡa aiai ita viḡaei.